

1



BAHASA IBAN TINGKATAN 1

# BAHASA IBAN

TINGKATAN 1

RM 24.80

ISBN 978-983-49-1150-8



9 789834 911508

FT201003







# **RUKUN NEGARA**

**Bahawasanya Negara Kita Malaysia**

mendukung cita-cita hendak:

Mencapai perpaduan yang lebih erat dalam kalangan seluruh masyarakatnya;

Memelihara satu cara hidup demokrasi;

Mencipta satu masyarakat yang adil di mana kemakmuran negara akan dapat dinikmati bersama secara adil dan saksama;

Menjamin satu cara yang liberal terhadap tradisi-tradisi kebudayaannya yang kaya dan pelbagai corak;

Membina satu masyarakat progresif yang akan menggunakan sains dan teknologi moden.

MAKA KAMI, rakyat Malaysia,  
berikrar akan menumpukan  
seluruh tenaga dan usaha kami untuk mencapai cita-cita tersebut  
berdasarkan prinsip-prinsip yang berikut:

**KEPERCAYAAN KEPADA TUHAN  
KESETIAAN KEPADA RAJA DAN NEGARA  
KELUHURAN PERLEMBAGAAN  
KEDAULATAN UNDANG-UNDANG  
KESOPANAN DAN KESUSILAAN**

(Sumber: Jabatan Penerangan, Kementerian Komunikasi dan Multimedia Malaysia)



KURIKULUM STANDARD SEKOLAH MENENGAH

# BAHASA IBAN

## TINGKATAN 1

### **PENULIS**

Frankie Anak Uning  
Ricky Adon Chuat  
Ana Anak Rantai

### **EDITOR**

Jonathan Singki Anak Lintan  
Edith Sulie Bidas

### **PEREKA BENTUK**

Mohd Khairul Hakim bin Mat Hassan  
Izzah Syamilah binti Ahamad Fadzil

### **ILUSTRATOR**

Saiful Akmal bin Zainal  
Irni Norfarhana binti Md Nor  
Nurul Emira binti Abdul Jimin



DBP

Dewan Bahasa dan Pustaka  
Kuala Lumpur  
2016





KEMENTERIAN  
PENDIDIKAN  
MALAYSIA

No. Siri Buku: 0072

KK 499-221-0102061-49-1150-20101  
ISBN 978-983-49-1150-8

Cetakan Pertama 2016  
© Kementerian Pendidikan Malaysia 2016

Hak Cipta Terpelihara. Mana-mana bahan dalam buku ini tidak dibenarkan diterbitkan semula, disimpan dalam cara yang boleh dipergunakan lagi, ataupun dipindahkan dalam sebarang bentuk atau cara, baik dengan cara elektronik, mekanik, penggambaran semula mahupun dengan cara perakaman tanpa kebenaran terlebih dahulu daripada Ketua Pengarah Pelajaran Malaysia, Kementerian Pendidikan Malaysia. Perundingan tertakluk kepada perkiraan royalti atau honorarium.

Diterbitkan untuk Kementerian Pendidikan Malaysia oleh:

Dewan Bahasa dan Pustaka,  
Jalan Dewan Bahasa,  
50460 Kuala Lumpur.  
No. Telefon: 03-21479000 (8 talian)  
No. Faksimile: 03-21479643  
Laman Web: <http://www.dbp.gov.my>

Reka Letak dan Atur Huruf:  
Telaga Biru Sdn. Bhd.

Muka Taip Teks: Times New Roman  
Saiz Muka Taip Teks: 12 poin

Dicetak oleh:  
Gayawara Sdn. Bhd.,  
No.2, Jalan Nountun, Kg. Bambangan,  
Tingkat Bawah, Wisma Capital,  
Inanam, 88450 Kota Kinabalu,  
Sabah.

## PENGHARGAAN

Penerbitan buku teks ini melibatkan kerjasama banyak pihak. Sekalung penghargaan dan terima kasih ditujukan kepada semua pihak yang terlibat:

- Jawatankuasa Penambahbaikan Prof Muka Surat, Bahagian Buku Teks, Kementerian Pendidikan Malaysia.
- Jawatankuasa Penyemakan Pembetulan Prof Muka Surat, Bahagian Buku Teks, Kementerian Pendidikan Malaysia.
- Jawatankuasa Penyemakan Naskhah Sedia Kamera, Bahagian Buku Teks, Kementerian Pendidikan Malaysia.
- Pegawai-pegawai Bahagian Buku Teks dan Bahagian Pembangunan Kurikulum, Kementerian Pendidikan Malaysia.
- Jawatankuasa Peningkatan Mutu, Dewan Bahasa dan Pustaka.
- Yayasan Tun Jugah
- Association for the Educational Development of Iban Language (AEDIL)
- SMK Muara Tuang
- Majlis Adat Istiadat Negeri Sarawak
- Malaysian Medical Relief Society (MERCY)

Semua pihak yang terlibat secara langsung atau tidak langsung dalam menjayakan penerbitan buku ini.



## Pelasar Jaku

Bup teks Jaku Iban Pom 1 siti ari komponen pakej mata pelajar Jaku Iban ungkup ke nemiak Pom 1. Bup teks ke betemaka daya idup tu digaga dikena nangkup pinta Kurikulum Standard Sekolah Menengah. Aktiviti ke ditagaka dalam bup teks tu sigi dichirika dikena ngemudahka nemiak nguasa bidang jaku nyengkaum mending enggau bejaku, macha, nulis, bungai jaku enggau jalai jaku.

Aktiviti ke nyanding nemiak ngena pengelandik bepikir betikas tinggi balat dikemeratka dalam bup teks tu. Ari nya nemiak deka diseridika nyadi mensia ke landik meri pemutus penemu, pintar mutarka penanggul, beinovasyen enggau tau nengkebang. Dikena nempa peranak menua ke setimbang ari sukut intelek, rohani, emosyen enggau jasmani, elemen neresa kurikulum ke bisi diterangka dalam Dokumen Standard Kurikulum enggau Tisih mega diberi fokus dalam bup teks tu.

DVD audio siti agi komponen dikena nyanding nemiak kelebih agi ba aktiviti mending enggau bejaku, enggau leka main. Dikena nyanding nemiak bejalaika aktiviti, bup teks tu ngembuan penteba baka ke di baruh:



### Mending enggau Bejaku

Befokus ngerembaika pengelandik nemiak mending, meretika pekara ti didinga sereta bejaku ngenataika penemu.



### Macha

Befokus ngelatih sereta matih nemiak ngambika sida rindu mekuhka ulah macha ngambika sida ulih nambah lalu ngerekaika penemu.



### Nulis

Befokus nelebaka nemiak ngenataika penemu enggau idea ngena chara betulis ti menyana.



### Bungai Jaku

Befokus meri awak nemiak beperindang sambil belajarka leka main, jaku sempama enggau guna jaku.



### Jalai Jaku

Befokus ngansah penemu nemiak dalam mayuh bansa jaku sereta enggau struktur jalai jaku.



### Pengukuh

Seridi: Dikena nyanding nemiak ke agi lemi ba pelajar.

Pengaya: Dikena ngerembaika agi penemu nemiak.

Tisih: Dikena nisih pengelandik ke udah dipelajarka ba unit nya tauka unit ke udah ditengah.



### Tibang Penemu

Dikena nerangka sekeda pekara ti bisi dalam pengelandik nya.



### DVD Audio

Dikena ngenataika teks tauka skrip pengelandik mending.



### PBT

Pengelandik Bepikir Tikas Tinggi.



	Pelasar Jaku	iii
	Kar Pikir	x-xii
<b>UNIT 1</b>	Masuk Sekula Sekondari	1
<b>UNIT 2</b>	Saum Seati Segulai Sejalai	16
<b>UNIT 3</b>	Dunya Ensera	32
<b>UNIT 4</b>	Nyeratan Cherita	48
<b>UNIT 5</b>	Tenun Pesaka Berega	64
<b>UNIT 6</b>	Ngepan ke Tanda Identiti Iban	80
<b>UNIT 7</b>	Ubah Klimet	96
<b>UNIT 8</b>	Sayauka Rampa Menua	112
<b>UNIT 9</b>	Lumba enggau Main Disanding Sains enggau Teknologi	128
<b>UNIT 10</b>	Puncha Energi	144
<b>UNIT 11</b>	Pintar Mina Belanja	160
<b>UNIT 12</b>	Penguna Pintar	176
<b>UNIT 13</b>	Penyungkek Dagang Temuai	192
<b>UNIT 14</b>	Luar Jengkau Menua Serantau	208
	Sempama	224
	Glosari	225



## Pengelandik Tiap Unit

UNIT	Asil Pelajar				
	Mending enggau Bejaku	Macha	Nulis	Bungai Jaku	Jalai Jaku
<p style="text-align: center;"><b>1</b></p> <p><b>Masuk Sekula Sekondari 1-15</b></p>	<p>Mending enggau lenak sereta berati enggau silik.</p> <p>Ngayanka respons ti engkeman.</p> <p>Ngena jaku sapa ti engkeman.</p>	<p>Beratika teks ari segi fonemik.</p> <p>Ngaga inferens lalu ngambat reti.</p> <p>Meretika teks ngena penunjuk kontekstual.</p>	<p>Nulis enggau betul bepelasarka strategi nyepil.</p> <p>Nulis enggau betul bepelasarka pengaya jaku.</p> <p>Nentuka sepil ti betul nitihka standard.</p>	<p>Mending enggau lenak sereta berati enggau silik.</p> <p>Belematika elemen ukur pemanah sereta impak leka main.</p>	<p>Beratika struktur jalai jaku.</p> <p>Ngaga analisis penyilap ba struktur jalai jaku.</p>
<p style="text-align: center;"><b>2</b></p> <p><b>Saum Seati Segulai Sejalai 16-31</b></p>	<p>Ngena jaku sapa ti engkeman.</p> <p>Ngena kaul jaku ti nunjukka ruang.</p> <p>Ngena penanda kaul penemu.</p>	<p>Bacha lansa dikena beratika selampur idea.</p> <p>Bacha lenak dikena ngambi batang idea.</p>	<p>Nulis enggau betul bepelasarka strategi nyepil.</p> <p>Nulis enggau betul bepelasarka pengaya jaku.</p> <p>Nentuka sepil ti betul nitihka standard.</p>	<p>Nentuka tusun leka jaku bepegai rat ba batang enteli sereta belematika empas munyi aliterasyon enggau asonansyen.</p> <p>Nengkebang leka main pemerindang.</p> <p>Nukuka kualiti munyi leka jaku.</p>	<p>Meretika jaku nama rama.</p> <p>Meretika jaku nama tetap.</p>
<p style="text-align: center;"><b>3</b></p> <p><b>Dunya Ensera 32-47</b></p>	<p>Ngelala lalu nemu reti jaku bepangai ba entak sebut.</p> <p>Ngelala tubuh jaku sebut enggau tubuh jaku tulis.</p> <p>Nyebut leka jaku chara standard.</p>	<p>Nentuka reti teks visual.</p> <p>Ngaga analisis tusun penemu dalam teks.</p> <p>Ngaga penerang tambah ari mayuh bengkah medium.</p>	<p>Nulis enggau betul bepelasarka strategi nyepil.</p> <p>Nulis enggau betul bepelasarka pengaya jaku.</p> <p>Nentuka sepil ti betul nitihka standard.</p>	<p>Beratika gaya jaku dalam mayuh bengkah konteks ti meransang orang ngena sempama.</p> <p>Nemu tuju, konteks enggau impak sempama dalam pengidup.</p> <p>Nyebut leka jaku chara standard.</p>	<p>Nemu ngena penganap tesa dikena ba ukai utai idup.</p> <p>Nemu ngena penganap tesa dikena ba utai idup.</p> <p>Nemu ngena penganap tesa kardinal.</p>

UNIT	Asil Pelajar				
	Mending enggau Bejaku	Macha	Nulis	Bungai Jaku	Jalai Jaku
<p><b>4</b></p> <p><b>Nyeratan Cherita 48-63</b></p>	<p>Ngelala elemen jalai cherita, latar enggau watak.</p> <p>Beratika rurun cherita.</p> <p>Ngaga jangka enggau pelaba.</p>	<p>Macha sereta belematika selampur isi.</p> <p>Ngelabuhka pikir sechara imaginatif sereta kreatif.</p> <p>Nukuka niat enggau tuju penulis.</p>	<p>Merambu nitihka tuju, audiens enggau konteks.</p> <p>Meransang imaginasyen enggau napis idea.</p> <p>Nyeritaka situasyen enggau pengasai ati.</p>	<p>Belematika chunto jaku sempama.</p> <p>Nukuka reti jaku sempama.</p> <p>Bejaku chara terang.</p>	<p>Ngerembaika leka jaku nama ngagai rambai jaku nama.</p> <p>Ngena leka jaku nama enggau frasa nama nempa ayat dikena meri penerang tambah.</p>
<p><b>5</b></p> <p><b>Tenun Pesaka Berega 64-79</b></p>	<p>Nukuka leka jaku kunchi enggau frasa ba teks.</p> <p>Nukuka kualiti munyi leka jaku.</p> <p>Nukuka selampur penerang dalam teks.</p>	<p>Bekaulka fakta teks.</p> <p>Nyerenih penerang.</p> <p>Ngeraup penemu.</p>	<p>Merambu nitihka tuju, audiens enggau konteks nulis.</p> <p>Meransang imaginasyen enggau napis idea nitihka tuju nulis.</p> <p>Mantaika buah runding sereta mansutka gregayak ati sechara kreatif.</p>	<p>Beratika gaya jaku ti meransang orang ngena entelah.</p> <p>Beratika entelah bepelasarka pengidup.</p> <p>Mending enggau lenak sereta berati enggau silik.</p>	<p>Meretika jaku ganti nama.</p> <p>Meretika jaku ganti nama diri.</p> <p>Meretika jaku nama pengempu.</p>
<p><b>6</b></p> <p><b>Ngepan ke Tanda Identiti Iban 80-95</b></p>	<p>Beratika kaul fakta enggau peneleba diri.</p> <p>Nemu rurun pengawa enggau idea dalam teks.</p> <p>Ngaulka peneleba enggau konteks ti baru.</p>	<p>Ngaga analisis kaul antara teks enggau gempung idea.</p> <p>Muntis idea ari teks lalu ngena iya ba situasyen ti baru.</p> <p>Nentuka koherens dalam teks.</p>	<p>Merambu nitihka tuju, audiens enggau konteks nulis.</p> <p>Meransang imaginasyen, napis idea nitihka tuju nulis.</p> <p>Nyeritaka pengingat enggau peneleba senentang pekara.</p>	<p>Meretika struktur entelah.</p> <p>Belematika kaul entelah enggau pengidup.</p> <p>Nukuka kualiti munyi leka jaku.</p>	<p>Ngena banding komperatif enggau superlatif.</p>



UNIT	Asil Pelajar				
	Mending enggau Bejaku	Macha	Nulis	Bungai Jaku	Jalai Jaku
<p><b>7</b></p> <p><b>Ubah Klimet 96-111</b></p>	<p>Beratika empas pekara ti nyadi.</p> <p>Nemu berandau.</p> <p>Meretika prosedur.</p>	<p>Mandingka teks betulis enggau teks visual.</p> <p>Nentuka reti ari kaul teks betulis enggau teks visual.</p> <p>Ngukun fakta enggau idea ti beguna.</p>	<p>Mansutka pengasai ati ngena chara emotif.</p> <p>Ngena ayat topik dalam entelian (karang).</p>	<p>Mending enggau lenak sereta berati enggau silik.</p> <p>Mantaika buah runding sereta pengasai ati.</p>	<p>Ngena mayuh macham jaku adjektif.</p> <p>Ngena jaku adjektif pengasai tubuh.</p>
<p><b>8</b></p> <p><b>Sayauka Rampa Menua 112-127</b></p>	<p>Bejaku chara terang sereta terus.</p> <p>Bejaku ngena sada nyawa ti bekualiti.</p> <p>Nentuka batang penemu, penerang enggau chunto.</p>	<p>Ngayanka pemereti chara penulis mutarka runding.</p> <p>Meretika leka jaku ke dipilih.</p> <p>Beratika bansa ayat ti dikena.</p>	<p>Mansutka pengasai ati ngena chara emotif.</p> <p>Ngena ayat topik dalam entelian (karang).</p>	<p>Mending enggau lenak sereta berati enggau silik.</p> <p>Belematika elemen ukur pemanah.</p> <p>Nyebut leka jaku chara standard.</p>	<p>Ngena mayuh bengkah jaku pengawa.</p> <p>Ngena kaul subjek enggau jaku pengawa.</p> <p>Nukuka jaku pengawa berindik ba reti.</p>
<p><b>9</b></p> <p><b>Lumba enggau Main Disanding Sains enggau Teknologi 128-143</b></p>	<p>Meragam asai ati enggau beratika ulah.</p> <p>Ngaulka penemu ti bekait enggau pengidup.</p> <p>Nemu sekat jaku bepelasarka latar belakang audiens.</p>	<p>Belematika munyi enggau ginchir sebut leka jaku.</p> <p>Nemu reti leka jaku nitihka konteks.</p> <p>Meransang mayuh gaya nulis lebu ngarang.</p>	<p>Mansutka pengasai ati ngena chara emotif.</p> <p>Ngena ayat topik dalam entelian (karang).</p>	<p>Belematika tapis leka jaku dalam leka main ti bepegai rat ba batang enteli.</p> <p>Ngemesaika reti adat basa ti nanggam kaul enggau pemaik.</p> <p>Bejaku ngena sada nyawa ti bekualiti.</p>	<p>Ngena mayuh bengkah jaku adverb.</p>

UNIT	Asil Pelajar				
	Mending enggau Bejaku	Macha	Nulis	Bungai Jaku	Jalai Jaku
<p><b>10</b></p> <p><b>Puncha Energi</b> 144-159</p>	<p>Mending sereta beratika teks fungsional.</p> <p>Mending sereta beratika teks informasional.</p> <p>Mending sereta beratika fakta enggau data.</p>	<p>Nentuka tema lalu meri buah runding diri.</p> <p>Respons ngagai teks.</p> <p>Meransang imaginasyen sereta napis idea nitihka tuju.</p>	<p>Nulis chara kohesif.</p> <p>Nentuka leka jaku ti dikena ngambi ngenatai impak.</p>	<p>Bejaku chara cheremat sereta siru.</p> <p>Ngemeranka chara idup positif.</p> <p>Mantaika buah runding sereta pengasai ati.</p>	<p>Meretika jaku penyambung ayat.</p> <p>Meretika jaku praklausa.</p>
<p><b>11</b></p> <p><b>Pintar Mina Belanja</b> 160-175</p>	<p>Betatika baka ni reti ulih dikenataika ngena sebut ti terang sereta nyemetak.</p> <p>Bejaku chara engkeman bepelasarka fakta.</p> <p>Bejaku ngena pemuka enggau penutup ti engkeman.</p>	<p>Ngaga analisis gaya pendiau.</p> <p>Nentuka sagam penemu penulis.</p> <p>Ngukun fakta, idea enggau pekara ti berguna.</p>	<p>Nulis chara kohesif.</p> <p>Nentuka leka jaku ti dikena ngambi ngenatai impak.</p>	<p>Mending chara lenak sereta silik.</p> <p>Nyeritaka situasyen, pengasai ati enggau tuduh penemu.</p>	<p>Meretika jaku prafrasa.</p> <p>Meretika jaku pascajaku.</p>
<p><b>12</b></p> <p><b>Penguna Pintar</b> 176-191</p>	<p>Manding enggau mida penerang.</p> <p>Mindahka penerang ari mayuh sumber ngagai tunduh visual.</p> <p>Meretika idea ti abstrak.</p>	<p>Ngayanka penyedar berindik ari leka jaku penulis.</p> <p>Belematika pemanah enteli enggau tunduh jaku betandu.</p> <p>Nentuka sepil ti betul nitihka standard.</p>	<p>Nulis chara kohesif.</p> <p>Nentuka leka jaku ti dikena ngambi ngenatai impak.</p>	<p>Belematika tusun leka jaku ti bepegai rat ba batang enteli.</p> <p>Nyeritaka situasyen, pengasai ati enggau tuduh penemu.</p>	<p>Meretika ayat mudah.</p> <p>Meretika ayat belapis.</p> <p>Ngelala mayuh bansa ayat.</p>



UNIT	Asil Pelajar				
	Mending enggau Bejaku	Macha	Nulis	Bungai Jaku	Jalai Jaku
<p><b>13</b></p> <p><b>Penyungkok Dagang Temuai 192-207</b></p>	<p>Napis, nusun sereta nentuka tuju jaku tauka pesan ngambika nyemetak berindik ba penemu diri, fakta enggau data ti dikemisi.</p> <p>Mansutka jaku chara berani sereta terus.</p> <p>Nanya ngena tikas ti bebida.</p>	<p>Ngelala tokoh teks visual.</p> <p>Belabaka isi teks bepelasarka penemu diri.</p> <p>Merambu nitihka tuju, audiens enggau konteks.</p>	<p>Berati sereta nelusur draf ngambika nyelinting reti ti dikedekaka.</p> <p>Bacha pruf sereta ngedit draf.</p>	<p>Ngayanka pereti ngagai leka main.</p> <p>Nyeritaka situasyen, pengasai ati enggau tuduh penemu.</p>	<p>Meretika mayuh chara nulis ayat.</p> <p>Ngaga mayuh ayat tanya enggau saut.</p>
<p><b>14</b></p> <p><b>Luar Jengkau Menua Serantau 208-223</b></p>	<p>Nentuka jalai nanya ti engkeman.</p> <p>Nentuka pekara ti nyadi pelasar sesebengkah tanya.</p> <p>Nyaut ngena jaku ti belebas sereta engkeman.</p>	<p>Macha sereta belematika chara luas kereban bacha ti enchabar minda ari mayuh bengkah genre.</p> <p>Macha chara betandu.</p> <p>Ngayanka respons ti kritikal.</p>	<p>Berati sereta nelusur draf ngambika nyelinting reti ti dikedekaka.</p> <p>Bacha pruf sereta ngedit draf.</p>	<p>Meretika elemen pemanah jaku klasik.</p> <p>Belematika munyi enggau ginchir sebut leka jaku.</p>	<p>Nikalka sebut-nyebut orang ke dulu udah dituu.</p> <p>Gelih sebut ngena leka jaku ti sinonim.</p> <p>Rambai jaku pengawa dikena nelusur teks.</p>

## Guna Kar Pikir


Tiap penanggung begunaka kereban dikena mutarka iya, kelebihan agi ba pengawa belajar dalam kelas. Nya kebuah dituduhka dalam Bup Teks Jaku Iban Pom 1 tu kar pikir nyadi kereban pikir dikena nemiak nguasa undan pelajar sida.

Dikarapka ari ke ngena kar pikir nemiak ulih ngenataika penerang chara beripih tusun. Kelimpah ari nya, ulang kenang pelajar mega ulih dikereja jampat sereta efiyen. Nya kebuah tebal agi aktiviti enggau latih ke ditagaka dalam bup teks tu betuju matak nemiak ngena lapan bansa kar pikir ti bisi dipasukka dalam Program i-THINK ti udah dikerekaika ngagai selampur sekula di Malaysia.

Nama enggau penteba tiap-tiap iti kar pikir nya diterangka baka ti di baruh.

### KAR PIKIR


### PENERANG



Kar Segala Rata (*Circle Map*)

#### Definisyen nitihka konteks


1. Tulis topik ba segala tengah.
2. Isi pekara enggau penerang pasal topik ba segala besai.
3. Tulis ari ni penatai pekara tauka penerang ari dalam bingkai segi empat.



Kar Gelembung (*Bubble Map*)

#### Nerang ngena jaku adjektif


1. Tulis topik besai ba segala tengah.
2. Isi jaku adjektif dikena nerangka topik ba segala ke ngelingi.



Kar Gelembung Gandin  
(Double Bubble Map)

**Manding sereta mida**


1. Dikena manding sereta midaka objek tauka idea.
2. Tulis dua topik (idea/objek) ke deka dibandingka ba dua iti segala besai.
3. Segala antara dua topik endur nuliska pekara ke sama.
4. Isi semua bida ba segala ke nyambungka siti topik aja.



Kar Kayu (Tree Map)

**Dikena magi kategori**

1. Tulis batang pekara ba atas lalu garis.
2. Dero garis pampang dikena ngengkahka kategori.
3. Rantai chunto tauka penerang pasal kategori lalu digaris.



Kar Sukung (Brace Map)

**Sebagai ari semua**

1. Dikena mansik tauka analisis objek.
2. Tulis objek ke deka dipechahka lalu garis.
3. Tulis bagi tauka pechah besai.
4. Tulis bagi tauka komponen mit ke kanan lalu garis.
5. Dero ( ) dikena nyerakupka komponen enggau objek.







# Masuk Sekula Sekondari

Pengawa betarak ngiga penemu belabuh ari mit. Ngingkas ari sekula primari nemiak lalu angkat ngagai sekula sekondari. Besenutuk enggau nya mega tikas penemu ke deka ditapi mega majak nyungkak.



Nama penyadi enti kitai nadai besekula? Nama tuju kitai ngulihka penemu?







Tebal agi penyampau nemiak enggau pengajar ba sekula sekondari mayuh agi ari sekula primari. Pia mega penyampau kereban sanding belajar enggau aktiviti kokurikulum endang mayuh agi ba sekula sekondari.





## Aram Mending enggau Bejaku

Audio 1:



Tu hari keterubah Injat enggau bala pangan iya masuk sekula sekondari, SMK Tinting Tebilang. Peratika randau sida sebuat.

Selamat pagi semua. Aku Injat, nyadi tu bakih aku Megong.

Selamat bekelala, kami sebilik baru pindah ari Sabah.

O pia, kendua pan sama. Enti pia, kitai tu sama penepan, sama menalan.

Aku Nasir. Nama berita seduai? Tu pangan aku Ah Seng ari Sabah.

Kami duai Injat dalam Kelas 1 Nendak. Nuan dih, kelas ni?

Manah mih nya, segulai sejalai kitai ba Kelas 1 Nendak.



### AKTIVITI

1. Keluluka randau di atas.
2. Betanya saut enggau pangan nuan dikena ngulihka penerang pasal iya.
3. Bantaika penerang nuan ba mua kelas.
4. Ari perati nuan, baka ni asai ati sida ke baru betemu ba sekula sekondari. 🌸



### LATIH

1. Nama reti sempama sama penepan, sama menalan dalam randau di atas? 🌸
2. Baka ni chara Injat enggau bala pangan iya ulih begulai sejalai ba kelas? 🌸
3. Enti nyema nuan bisi enggau berandau dia, padahka asai ati nuan. 🌸



1.1.2



## Aram Mending enggau Bejaku

Injat enggau Ah Seng berandauka pasal aktiviti kokurikulum. Peratika randau seduai di baruh tu.

Selamat lemai, Ah Seng. Mayuh endar kelab enggau gerempung kokurikulum ke bisi ba sekula tu.

Oo, amat mayuh nya. Ba sekula primari suba enda ngemayuh nya iya!

Nya mih. Tak berasai beba ati deka milih bagi kelab ti deka dipasuk.

Amat endar, enti pia **anang jugau** kitai. Enggaika tak enda ingat ngerejista nyadi kaban kelab enggau gerempung kokurikulum.

Selamat lemai. Ba iya Injat, bisi 21 bansa kelab enggau gerempung kokurikulum.

Ni enda dih Injat, penyampau nemiak ga mimit ba sekula primari.

Endang amat. Enti nitih, minggu nyin ila pengawa ngerijista bagi kelab ti deka dipasuk diri.



### AKTIVITI

1. Keluluka randau di atas.
2. Sekula kita mega bisi mayuh bengkah kelab enggau gerempung kokurikulum. Kerandauka pasal pekara nya.
3. Enti nuan betemu enggau bakih, baka ni jaku dikena nuan nyapa iya? 🌸
4. Gaga siti randau pasal pemanah aktiviti kokurikulum enggau siku pengajar ari siti kelab ke bisi dipasuk nuan.



### LATIH

1. Nama reti leka jaku ke bechura biru bepelasarka randau di atas?
2. Gaga kar segala rata endur nuan nerangka pemanah aktiviti kokurikulum? 🌸
3. Ngena jaku sapa ke engkeman chukup beguna ba pengidup kitai besehari-sehari. Pejuraika pekara tu. 🌸



## Bacha diari di baruh tu.



Hari tu hari keterubah **aku** ngindikka kaki ngagai sekula baru aku, iya nya SMK Tinting Tebilang.

Pukul 8:00 pagi nemiak belabuh ngerejista diri. Mayuh nemiak bisi beg baru. Bisi mega ke agi ngena beg ke lama. Siku tuai nemiak manah ati nulung aku mai kereban sekula aku ke berupai mayuh. Semua nemiak sama bela kiruh dipeda aku.

Urung pukul 10:00 pagi, udah tembu ngerejista diri ba dewan sekula, kami duai Megong lalu diuluka bala tuai nemiak ngagai buding. Pama ga pema yuh nemiak ke deka bemalam ba buding.

Bala tuai nemiak mantu ngatur lalu nusun bala kami nitihka apak ke udah ditaga. **Bala** kami enda betanggung, tang lalu kisuk ngemas kereban diri empu. Nyambil nya kami pan sama bekelala enggau pangan diri.

Urung pukul 5:30 lemai, sebedau makai lemai nemiak ke pom satu diasuh bala tuai nemiak begempuru **laban** sida deka nerangka atur makai. Pukul 7:00 malam semua nemiak ke bemalam ningaka penerang pasal atur buding sekula.

Panjung ke baru betemu enggau pangan, tak ragak diri ga kami sebala bekelakar, nyau munyi burung ke makai buah kara. Hari berasai pandak laban mayuh cherita enggau bala pangan. Semua kami berupai gagit masuk sekula sekondari.


*Injat: 2 Januari 2017*

## AKTIVITI


1. Sebut leka jaku ke bechura biru dalam diari nya.
2. Giga siti penyama dalam tiga leka jaku ke bechura biru nya nitihka fonemik ti betul.
3. Bepelasarka diari nya giga leka jaku ba pun, ba tengah enggau ba ujung ti ngena urup konsonan ke sama.

## LATIH


1. Giga lalu terangka reti sempama ke bisi dikena dalam diari nya tadi.
2. Tembuka pitak di baruh tu.

Urup	Pun	Tengah	Ujung
b	bala	kaban	kelab
n		tanam	
e	enggau		

3. Tembuka kar rurun di baruh endur nuan nusun aktiviti dalam diari.



4. Nembiak ti diau ba buding bisi disediaka taga jam nyadi malin sida tetiap hari. Tembuka kar segala rata di baruh tu dikena nuan mantaika pemanah taga jam ngagai nembiak ke diau ba buding.



### Tibang Penemu

Penyama: Pekara tauka tukung ke sama bisi dikembuan dua tauka lebih objek.



### Tibang Penemu

Fonemik - Sebut nitihka sepil enggau sepil nitihka sebut.





## Aram Macha

Tiap-tiap ujung minggu nemiak Pom 1 Nendak SMK Tinting Tebilang bejalaika aktiviti ngerupan meresi kelas. Bacha lalu peratika teks pasal aktiviti nya.



- Notis gerah digaga tumu.
- Bala nemiak ulih besedia.



- Nemiak ningaka penerang.
- Nemiak dibagi ngagai raban.



- Nemiak belabuh gawa.
- Gawa nitihka ungkup diri.



- Nemiak ngemas kereban.
- Sida mulaika diri.



## AKTIVITI

1. Kerandauka pekara dalam teks di atas.
2. Gaga ayat topik ti engkeman ke teks nya.



## LATIH

1. Kelimpah ari ke bejalaika pengawa ngerupan meresi kelas, padahka endur bukai dalam sekula nuan ke patut diperesi.
2. Padahka pemanah aktiviti ngerupan ngena kar gelembung.
3. Siku ari mensia mayuh ke nguan genturung menua nuan bisi kena rampit penyakit denggi. Nama pekara ke patut dipejalaika dikena mentin penyakit nya. Padahka rasional nuan. 🌸



2.1.3



## Aram Nulis

Peratika gambar penerang di baruh.



Siti ari kereban ke dima tauka disandik.



Dikena nyaga pengelikon.



Organ dikena meda.



Pemakai ke bedau dipanduk.

## AKTIVITI

1. Sebut lalu tulis semua objek dalam gambar di atas.
2. Giga objek ke sama sepil ari gambar di atas.

## LATIH

1. Giga leka jaku bukai ti ngembuan sepil ke sama tang sebut bebida (homograf).
2. Gaga ayat ngena leka jaku homograf nya tadi.



## Tibang Penemu

Homograf - Leka jaku ti sebaka sepil tang enda sebaka sebut.



Bacha tibak ripot di baruh tu.

## Ripot Ngerejista Nembiak SMK Tinting Tebilang



Sehari tok hari ngeriport diri masuk sekula baru ba SMK Tinting Tebilang. Mayuh bendar mensio dalam kandang sekula sehari tok.

Apai indai enggau bala anak sidak nyau **besun-sun**. Bala apai indai dipeda kiruh bendar sama bebaika kereban dikena bala anak ngepunka pengawa sekula.

Nitihka penerang ari Pengajar Belawan ke lalu nyadi kepala pengajal, sehari tok nyadika endor sidak nembiak nemu entang kelas diri empu sereta ngambi bub tek ke dikenak sidak belajar sepemanjai tahun tok. Maya tu apai indai enggau pengajar bepeluang bekelala enggau pangan diri.

Disediaka ulih,  
Ana Jane

2 Januari 2017

## AKTIVITI

1. Giga lalu kemetulka leka jaku ti salah sepil dalam teks di atas.
2. Giga leka jaku ti ngundan tiga tauka lebih patah sebut dalam teks di atas. Uдах nya, gaga ayat ngena leka jaku nya.
3. Giga leka jaku injau ti bisi dikena dalam teks di atas.

## LATIH


1. Gaga siti ayat ari leka jaku ti ngundan tiga tauka lebih patah sebut. 🌸
2. Terangka reti leka jaku **besun-sun** nitihka guna dalam teks di atas. 🌸
3. Ba penemu nuan, nama kebuah kitai mesti nampung pelajar ngagai sekula sekondari? 🌸





## Aram Nulis

Peratika gambar di baruh tu.



## AKTIVITI

1. Tuliska sepil objek di atas bepelasarka sistem sepil ti engkeman.
2. Gaga ayat ari leka jaku nya.
3. Nginjau jaku bukai patut dikena ngemansangka jaku Iban. Pejuraika dalam raban penemu tu. 🌸



## LATIH

1. Tembuka pitak di baruh tu. 🌸

Lumur	Jaku Injau	
	Jaku English	Jaku Bukai
1		
2		
3		
4		
5		

2. Ba penemu nuan, terangka kebuah kitai mesti nginjau jaku ari jaku bukai. 🌸





Peratika dinding di baruh tu.

## Dinding Ajar Sekula

Ngena Kapal Geruda Lambung,  
Ari ulu undur ke nanga,  
Anang kita agi tegeunung,  
Dinga manah tu ajar sekula.

Aki Ungkuk nyandih ba tiang,  
Ini Andan benung muka pintu,  
Enti nuan deka idup lantang,  
Mesti belajar ngiga penemu.

Anak tupai labuh ba tebiang,  
Anak ingkat engkechit lari,  
Enti kita enggai tinggal orang,  
Mesti belajarka penemu ICT.

Malam tadi ujan labuh banget,  
Sehari tu panas datai ke lemai,  
Enti deka ke pengidup berekat,  
Anang ngelaban jaku apai indai.

Asi angkat lauk pan angkat,  
Ni enda angkat baru ditanggung,  
Kitai semua mesti sama ingat,  
Ngulihka pemandai chara betulung.

Ari ili mudik ke ulu,  
Kitai sama sampal sereta,  
Enti kitai kaya penemu,  
Enda tinggal pemansang dunya.

Malam hari ati berasai sunyi,  
Bintang bekebelik di langit tinggi,  
Kitai belajar anang nunda ati hari,  
Pengajar ngajar kitai anang betundi.

Enti bisi jarum ke patah,  
Anang nyimpan dalam lachi,  
Jaku aku ukai sengapa ngengkah,  
Ke chuan teladan kita dudi hari.

Ditengkebang: Frankie Uning, 2016

## AKTIVITI



1. Pendingka dinding di atas enggau lenak.
2. Sebut enggau terang tiap baris dalam dinding nya.
3. Sadaka dinding nya ngena aksyen ke engkeman.
4. Giga ayat ke bisi ngundan ajar manah dalam dinding di atas.






# LATIH


1. Tembuka genteran dinding tu ngena leka jaku ti disediaka di baruh tu.

- pintar
- kelas
- ditapat
- menyana
- tumpul
- mantul

Tumu pagi nurun ke ,  
 Datai di kelas lalu belajar,  
 Enti kitai semampai bagas,  
 Kitai sigi deka nyadi .

Spesimen ditepu dalam butul,  
 Kena eksperimen hari empat,  
 Belajar kitai anang ,  
 Mayuh penemu patut .

Kelas malam diatur belama,  
 Kelas disanding Pengajar Rani,  
 Enti deka idup ,  
 Mesti betarak ninting hari.

Dom Duna landik bemain bol,  
 Nyadi sanding tim Sarawak,  
 Runding anang ngasuh ,  
 Bisi penemu ngasuh tampak.



2. Nama ajar manah ke bisi dalam dinding di atas? 🌸
3. Gaga siti dinding ti ngundan dua rangkap ke betemaka pelajar. 🌸
4. Sapa bempu tanggung pengawa ngetanka leka main dinding? Tembuka kar gelembung di baruh tu endur kita meri tuduh penemu.



5. Pejuraika semua pekara ke udah dikenataika kita dalam kar gelembung di atas. Bantaika asil jurai kita dalam kelas. 🌸



## Bacha teks di baruh tu.

### Kelab Komputer


Sekula SMK Tinting Tebilang bisi kelab komputer. Kelab komputer tu udah ditumbuhka lima taun ke udah. Penumbuh kelab komputer tu endang asil ari sadang penemu kepala pengajar enggau sekeda pengajar ke bukai. Penyampau komputer ke bisi majak nambah ninting taun. Dalam taun tu bilik ke beairkon tu bisi ngundan 30 unit komputer. Dua iku pengajar udah dipaduka ngajar kaban kelab. Seduai tu ukai semina landik ngajar ngena komputer tang mega nemu miki komputer ke bisi penanggul.

Penyampau nemiak ke deka nyadi kaban kelab endang ditatak. Jam ke diatu kelab tu bisi 150 iku kaban. Pechah bagi ke nyadi kaban kelab tu iya nya ari kelas pom satu ngagai pom lima. Nemiak ke nyadi kaban kelab tu bisi bayar rejista sepenyampau RM3.00 enggau bayar bulan RM2.00. Mayuh bendar penguntung nemiak ke masuk kelab tu. Sida diajar chara memproses jaku, chara ngasilka dokumen, ngaga format dokumen, ngedit gambar, ngaga grafik, ngena internet enggau ngaga laman web. Kelimpah ari nya, nemiak mega bisi diajar pasal chara miki komputer. Pengawa tisih mega dipejalaika dikena nentuka pengulih nemiak ba penemu komputer. Nemiak ke pas ba tisih deka diberi setipikit.



### AKTIVITI

1. Kategorika jaku nama tetap, jaku nama rama enggau jaku ganti nama dalam teks di atas ngena kar kayu di baruh tu.



2. Giga rambai jaku nama dalam teks nya.



### LATIH


1. Kerandauka jaku nama rama, jaku nama tetap enggau jaku ganti nama ti bukai.
2. Gaga rambai jaku nama bepelasarka latih lumur 1.
3. Terangka reti jaku ditatak bepelasarka teks di atas.
4. Terangka penguntung kitai landik ba penemu komputer. 🌸





## Jalai Jaku

Bacha teks di baruh tu.




Injat chukup benasit laban ulih nyadi kaban kelab komputer. Iya siku nemiak ke bagas, nya kebuah iya jampat bendar nangkap pekara ke dipelajarka. Mayuh nemiak bukai pan sama baka Injat. Berindik ari nya, sida udah dipilih pengajar mantu ngajar sereta ngelatih nemiak bukai ke bedau tentu landik pasal penemu komputer. Bala nemiak ke diajar sida berasai gaga laban nerima ajar ke manah. Injat ngembuan juluk ati deka nyadi pakar komputer dudi hari ila. Dikena nyapai juluk ati tu, iya besemaya deka belajarka semua pekara ke diajar pengajar sida enggau silik.

### AKTIVITI

1. Giga rambai jaku nama ti bisi penerang pun dalam teks di atas.

*Chunto:* Laboratori komputer nya enda jauh ari opis sekula.



2. Giga rambai jaku nama ti bisi penerang tambah dalam teks di atas.

*Chunto:* Laboratori komputer nya besai lalu lantang endur ngatur pengawa belajar.



### LATIH

1. Pilih dua iti rambai jaku nama lalu gaga ayat dikena meri penerang pun.
2. Tangkir ayat ba latih lumur 1 ngambika ngembuan penerang tambah.



## PENGIKUH

### SERIDI

1. Tulis biodata nuan empu ngena kar gelembung.
2. Isi endur puang di baruh tu ngena jaku nama ke engkeman. Kena leka jaku ke udah disediakan.

sida

kami

nuan

seduai

mensia

aku

Tapak bejualka kuih diintu Megong. Nyadi tapak ke siti nyin dikemataka Ah Seng. Aku enggau Nasir bempu tanggung pengawa nyaga tapak nyual utai diirup. Tumu-tumu pagi udah napatka tapak diri empu. Urung pukul 8:00 pagi mayuh belabuh datai sedatai ngagai kandang sekula Bala ngelawa ari tapak siti ngagai tapak siti sambil ngalu.

“Sapa nyaga tapak nyual pansuh tu?” ku tanya Pengajar Linggir.

“Jawai enggau Menti” ku aku.

“Bisi meda iya, tadi Injat?”

“Tadi bisi betemu enggau ba kedai koperasi. Bisi penanggul pengajar?”

“Ulih nulung ngiga, pengajar?” ku tanya aku.

“Nadai ngawa, terima kasih. Lagi aku ngiga .

” ku Pengajar Linggir.

3. Tanda (✓) ba leka jaku injau lalu (×) jaku asal dalam pitak di baruh tu.

Leka jaku	(✓ / ×)
bul	
telefon	
baka	
perabung	
batu	

### PENGAYA

Maya minggu orientasyon kita diberi penerang pasal aktiviti kokurikulum. Pilih kelab ti deka dipasuk kita. Pejuraika penguntung milih kelab nya.





## Saum Seati Segulai Sejalai







Menua Malaysia ngintu mayuh macham pengerami bansa enggau agama. Cheritaka peneleba kita ngabang ngagai pengerami ke bisi dibantaika dalam gambar.



## Aram Mending enggau Bejaku

Bacha randau di baruh tu.

### Nuan Mih Pangan, Nuan Mih Kaban



Selamat Taun Baru China, Ah Seng. Terima kasih laban udah ngangauka kami ngabang.

Selamat taun baru ini.

Selamat datai Jingan, Injat enggau Megong. Aram lalu sama berami enggau kami sebilik.

Tama uchu, lalu ke rumah kami. Nya baru bisi 'ong', semua ngena baju bechura mirah.



#### Tibang Penemu

China: Menua China, bansa China ti ada di menua Malaysia.

### AKTIVITI

1. Belauluka gambar, sebutka tanda ti nunjukka sida Ah Seng sebilik ngintu Taun Baru China.
2. Cheritaka asai ati diri maya ngabang pengerami pupu raban bansa Malaysia. 🌸





Igat, endu, semua pemakai tu tau diempa magang. Tu buah limau, bela nyengkau kediri igat, endun.

Terima kasih ibu. Aku nulung nuan nyadung buah limau.

Nya baru iya. Enda sabar aku ka meda main singa lagi.

Nyengkau kuih dia igat, endu anang malu, panjaika jari. Sehari tu sama berami enggau kami sebilik. Anang berumban kita lagi, sama ngelilaka main singa enggau nebah merechun ba luar dia kitai lagi.

Au aya, mayuh amat bansa kuih tu. Nyamai magang dipeda aku.

Munah, nyuaka aku kuih nya wai.

Terima kasih aya. Tu enggi aku, dulu nyengkau kuih bakul.

Nyin sida Jingan baru datai. Baka ke udah besemaya sida tiga sama ngena baju bechura mirah.

## LATIH

1. Sebutka pengerami ti bisi diintu pupu raban bansa di menua Malaysia.
2. Ba runding nuan, terangka pemanah kitai ngabang ngagai pangan diri lebh ngintu pengerami. 🌸
3. Kerandauka dalam raban nama reti penyerakup pupu raban bansa dalam pengidup kitai.





Bacha teks di baruh tu ngena intonasyen ti betul.

### Negapka Kaul Antara Pupu Raban Bansa di Sekula

Menua Malaysia endang diuan mayuh raban bansa ti idup segulai sejalai. Sekeda ari chara negapka kaul, iya nya aktiviti kokurikulum di sekula mesti diambil semua nemiak. Kebuah pia, aktiviti kokurikulum tu tebal agi ngelatih nemiak belajarka rukun pengidup ke manah maya sida ke begulai enggau pangan diri. Ambika banding, maya bemain semua bansa nadai milih pengarap begulai lalu bemain manah enggau pangan diri. Penegap kaul ti ditelebaka ba sida ke nemiak tu deka dibai sida lebuah udah besai tuai lalu tau ngujungka sida seruran ngembuan **penyiru ati ke pangan diri** lalu pekara tu pulai ke pengelikon menua kitai.

Sekula mega ngembuan tanggung pengawa ke besai ngajar nemiak **negapka kaul enggau pangan diri**. Pengajar mesti nelebaka nemiak begulai pupu raban bansa lebuah ngaga pengawa latih, projek sekula enggau atur duduk dalam kelas. Ambika sema, maya ngaga latih sekula tauka projek mesti bisi gambar mandangka mayuh raban bansa segulai sejalai. Enti pekara manah baka tu meruan diterenakka ba nemiak kenyau ari mit, enda jerih udah besai sida nemu begulai enggau pangan diri lalu pulaika penyerakup semua raban bansa.

Kelimpah ari nya, lebuah proses belajar enggau ngajar dalam kelas, bala pengajar patut nyelitka **rukun pendiau ti menuku** ngagai bala nemiak. Tiap-tiap iku bala pengajar endang bisi tanggung pegawa ngajar bala nemiak pekara ke manah. Ambika chunto, bala pengajar ke ngajar subjek Pendidikan Moral enggau Sejarah endang patut bebendar ngansak bala nemiak ngembuan ulah ti menuku, bebasa enggau dibasa, **lurus ati ngagai pangan diri** lalu sama sayauka menua Malaysia. Nya alai, enti bala sida udah besai ila ulih nyadi peranak menua Malaysia ti begempung ati enggau pangan diri.

Nangkan ke nya, bala nemiak mesti diteleba belematika Rukun Menua. Rukun Menua tu beguna bendar nempa rayat Malaysia ti **beserakup nadai penyerekang**. Lima iti pampang Rukun Menua sigi patut diajar lalu diguna dalam pengidup sehari-hari ngambika tau nyadi teladan ke manah. Berindik ari nya, bala nemiak sekula deka nyadi rayat Malaysia ti ulih begempung besukung betulung enggau pangan diri munyi sempama **lempung sama nanggung, berat sama ngangkat**.

Nya alai, enti diperatika sekula ulih nyadi endur negapka kaul antara pupu raban bansa. Enti bala nemiak ulih negapka kaul lalu segulai sejalai enggau pangan diri, dia menua tu deka likun alai diau lalu pulaika pengelantang semua kitai.


(Dibali ari: *John Empenit, Chunto Karang, Jaku Iban SPM: 138-139 2012*)

## AKTIVITI

1. Betanya saut pekara ti negapka kaul antara pupu raban bansa di sekula.
2. Terangka reti rambai jaku di baruh tu nitihka konteks begulai pupu bansa di sekula. 🌸

Leka jaku	Reti dalam konteks begulai di sekula
penyiru ati ke pangan diri	
negapka kaul enggau pangan diri	
rukun pendiau ti menuku	
lurus ati ngagai pangan diri	
beserakup nadai penyerekang	

3. Ba runding nuan, nama penguntung enti semua raban bansa Malaysia ulih idup beserakup enggau pangan diri. Tuliska batang idea nuan ngena kar gelembung.



**LATIH**

1. Bepelasarka empat batang idea dalam teks, tulis chunto chara negapka kaul belalauka teks ba lambar 21–22.

Batang idea	Chara negapka kaul
Aktiviti kokurikulum	Bemain
Tanggung pengawa sekula	
Proses ngajar enggau belajar	
Rukun Menua	

2. Rintaika chara bukai dikena nerenakka penyerakup antara bansa. 🌸  
 3. Terangka reti sempama “**lempung sama nanggung, berat sama ngangkat**”.  
 4. Ngena chara beraban, pejuraika reti **beserakup nadai beserekang** dalam pengidup kitai. 🌸



Ah Seng terima pesan nengah telefon pintar enggau kad elektronik ari bala pangan iya.



### AKTIVITI

1. Kerandauka bida pemanah antara bekirumka pesan nengah telefon pintar enggau kad elektronik.
2. Baka ni chara bekirumka pesan ti dikerinduka nuan? Nama kebuah? 🌸
3. Tulis siti pesan nuju pangan nuan ti deka nyambut hari pengada.

### LATIH

1. Gaga siti pesan ngena kad elektronik ngena komputer nuju pangan nuan ti deka nyambut pengerami sida.
2. Sebut tulis leka jaku di baruh tu.

nasionalisme, begempung,  
jereki, deriba, bansa,  
begimat, kokurikulum,

ngabang, pengajar, nemiak,  
main singa, menua kitai, beguai





3. Pindahka penerang pasal bansa pemakai sereta tanda pengerami raban bansa di baruh tu ngagai teks.





Pendingka CD audio pantun tu.

**Aih chegi sehegi pinang penguji,**

Tinggi berdiri ngeruruk remang,

Nadai enda ngelantang dalam ati, betemu baru udah lama peremisi,

**nyambung pelajar niki ke sekula sekondari,**

ngelekaka primari nyambung ngulihka **juluk ati.**

Aih,

Udu pengaga bala kami datai sekula,

Mayuh kaban mayuh pangan,

Bisi Melayu, Bidayuh, China, Melanau, India,

Iban, Kadazandusun, Orang Ulu enggau Bisaya,

Kami semua bansa Malaysia.

Aih,

Udu pengerindu mih asai dalam dada,

Udu mih penyenang dalam ati ngasai nadai penyerekang,

Sama begulai bejuraika mayuh pekara,

Ngambi kitai sama sereta nuju pemansang.

Aih,

Uji anang guai chapuh ragak mih kitai banyak **duduk beterembi,**

Kitai berintai duduk di kerusi,

Adi aka aram mih sama kitai seretai nyingkang berari,

Ngulihka pemandai landik macha nengkebang pemansang dunya ICT.

Aih,

Udu temegah raya aku meda adat basa,

Sigi udah gaya bekunsi pengerami gaga ati betunga mua,

Pendiau rumah panjai betampung perabung,

Berimbai ruai saum sekunsi,

Ngambika kitai sama ulih berundingka kuing maya dudi hari,

Awakka menua likun berari,

Kita mih disadang ngemansangka menua,

Awakka kitai tampak rita jelai nama,

Tebilang tampak terang.

Ditengkebang: Ana Rantai, 2016.




## AKTIVITI

- Betanya saut pasal pantun.
  - Bansa pantun.
  - Maya pantun suah disadaka.
  - Tuju pantun disadaka.
- Giga dua iti chunto aliterasyen enggau dua iti asonansyen dalam pantun.
- Kerandauka elemen estetik ba leka main nya tadi.
  - tema
  - rima
  - gaya jaku

## LATIH

- Ngena chara beraban, sadaka pantun nya tadi ngena patah sebut ti engkeman.
- Terangka reti jaku enggau rambai jaku di baruh tu. 🌸
  - juluk ati
  - duduk betereubi
  - udu temegah raya aku meda adat basa
  - pendiau rumah panjai betampung perabung
  - tebilang tampak terang
- Ba penemu nuan, nama penguntung enti kitai mayuh pangan ari pupu raban bansa? Bantaika penemu nuan ngena kar di baruh tu. 🌸





## Jaku Nama

### Ngintu Hari Gawai di Rumah Panjai

Hari Gawai taun nyin kemari, kami pulai ke rumah panjai aki Penghulu Salang di Pulau Sibau, Sungai Mujong, Kapit. Pemulai kami taun nya rami agi laban menyadi apai bansa China iya nya, Ah Ping enggau bakih iya bansa India iya nya Khavita, sama datai ngabang.

Sehari sebedau ngintu Hari Gawai, kami serumah bela kiruh nengkira perengka piring. Ini Sudau dulu nganchau tikai ba ruai tuai rumah. Sepagi-pagi nya, ibu Lanja enggau Jayap nguluka raban nemiak indu nganyam ketupat enggau ngaga sungki. Ini Enggang ngirau rendai ba dapur kayu di ujung tanju. Kami sepetunggal nulung manduk tepung tumpi. Uduk ke benama Sengkalan meluku ba tanju enda kiruhka kami ke gawa dia. Indai aku nguluka indu dara ke bukai mansuh asi pulut ba kerangan Batu Anchau ari ili rumah panjai kami.

Penghulu Salang mega kiruh ngeraut bungai jarau ba tanju. Sida ke lelaki bela nguji penemu diri ngeraut bungai jarau nundaka ajar aki. Apai aku, laban ke enda nemu ngeraut bungai jarau, semina nitihka aya Anggas ngitang tali marau enggau nirika panji. Aki Sawan ke endang lanchat jari, sigi diasuh ngelalin teresang sereta ngaga kelingkang. Ba ruai tuai rumah, bala sida ke bujang besaup nirika ranyai lalu ngitang mayuh macham bansa kuih, ai tuak enggau pemakai ke buah ranyai.

Lemai 31 haribulan, kami serumah mansutka pedara ke ruai lalu bejadika pengawa miring. Udah makai lemait, raban komiti ngintu gawai lalu ngatur pengawa main asal baka ngajat enggau bepencha. Pengawa ti belagu sereta betanda mega bisi diatur. Urung semak tengah malam, kami serumah lalu begempuru ngelingi ranyai.

Penghulu Salang miring lalu besampi miao ngena manuk Labang. Jam mangkung pukul 12:00 tengah malam kami serumah lalu manjung ngirup ai pengayu. Kerebak tawas, aki Penghulu Salang ngajat ngerebahka ranyai. Kami serumah bela begempuru makai buah ranyai. Sekeda ke udah lelak berami semalam-malam bisi udah ngalika diri ba ruai, bisi ga kedua agi richah belagu enggau betanda. Nya mih gaya pengerami ngintu Hari Gawai ba rumah panjai kami. Penyiru antara kami serumah enggau pengabang ti balat ngerapatka kaul maya ke berami. Seminggu udah kemisi di rumah panjai, kami sebilik mulaika diri ngagai pendiau diri.





# AKTIVITI

1. Baca lalu pilih bagi jaku nama rama enggau jaku nama tetap ti bisi ditemu nuan dalam teks.
2. Liska jaku nama rama enggau jaku nama tetap ti ditemu nya tadi ngagai kar di baruh tu.



# LATIH

1. Bepelasarka kar nya tadi, liska jaku nama tetap enggau jaku nama rama nitihka kategori di baruh tu.

Jaku Nama Tetap Idup		Jaku Nama Tetap Ukai Idup
Mensia	Ukai Mensia	

Jaku Nama Rama Idup		Jaku Nama Rama Ukai Idup	
Mensia	Ukai Mensia	Institusyen	Ukai Institusyen

2. Tuliska lima iti jaku nama rama enggau lima iti jaku nama tetap ke ulih dipeda nuan ba dalam kelas enggau dalam kandang sekula. 🌸
3. Gaga ayat bepelasarka jaku nama rama enggau jaku nama tetap ke udah ditemu kita nya tadi. Lekatka asil kita ba sukut jaku Iban dalam kelas. 🌸



## PENGUKUH

### SERIDI

1. Isi endur puang ngena jaku nama ti dirintaika dalam kutak ngambika nyadi siti ayat ti menyana.

kedai

sekula

Sabah


pasar

Rukun Menua


kepala pengajar

Malaysia


a.

SMK Tinting Tebilang ngembuan mayuh pupu raban bansa ke datai ari serata menua .

b.

Indai Ah Seng meli barang ba  kena nyediaka pemakai nyambut pengerami Taun Baru China.

c.

Bala raban main singa benung richah mantaika pengelandik tanda ba .

d.

 endang palan nerenakka penyerakup kaul pupu raban bansa.


e.

Pesta Kaamatan diintu di  tiap bulan Mei ninting taun.

f.


Tuan Belawan iya nya  SMK Tinting Tebilang.

g.

Lima iti pampang  sigi patut diajar lalu diguna dalam pengidup sehari-hari ngambika tau nyadi teladan ke manah.

2. Isi jaku berasuk tu ngena saut ti engkeman.

- Melintang**
- a. Tanda ti dibantaika maya Pesta Kaamatan.
  - b. Baju ke dikena indu bansa India.
  - c. Baju ke dikena indu bansa China.
  - d. Siti ari perengka dikena orang ulu maya mandangka ajat asal iya nya duku .
  - e. Rukun Menua tu beguna bendar nempa rayat Malaysia ti beserakup nadai .
- Unjur**
- f. Lempung sama , berat sama ngangkat.
  - g. Pengawa bansa Iban maya nyambut Hari Gawai.
  - h. Pemer ti diterima maya ngabang Taun Baru China.
  - i. Chura ngepan bansa Bidayuh.
  - j. Ulah ti menuku baka  enggau dibasa pulaika penyerakup pupu raban bansa.



## PENGAYA

1. Beduruk ngereja pengawa endang siti ari pengawa ti dikemeranka bansa kitai kenyau ari suba. Pejuraika pemanah ngereja pengawa beduruk begulai enggau pupu raban bansa.
2. Pejuraika baka ni aktiviti kokurikulum ulih nerenakka penyerakup entarabansa di sekula.
3. Tembuka kar titi di baruh tu senentang pengerami agama ti diintu pupu raban bansa Malaysia.

Agama

Islam

baka

Kristian

baka

Hindu

baka

Buddha

Pengerami

4. Ba penemu nuan, nama penguntung ari pengawa ngerupan? Gaga segenteran ayat belalauka gambar di baruh tu.







## UNIT 3

# Dunya Ensera

Lemai siti Jingan, Jawai, Munah enggau  
Sinja duduk nunga aki sida ba ruai sambil  
ningaka aki sida nusui ensera.







Ensera siti ari elemen dalam litericha bansa Iban ti agi mengkang relevan dikena beperindang.

Berapa iti ensera udah dibacha nuan?

Menya ensera dikenataika semina sechara sebut bepelasarka pengingat. Diatu ensera ulih dibacha laban bisi disimpan dalam media chelak enggau elektronik.

Nama penteba tukang ensera ti tau ngasuh jalai cherita dalam sesebengkah ensera nya idup lalu ngerinduka ati?



## Aram Mending enggau Bejaku

Lebuh datai ba sekula pagi nya, dia Jingan enggau Jawai lalu ngenang pasal ensera ti ditusui aki seduai lemai kemari. Meda seduai berandau ba tisi kelas, dia Munah enggau Anyie lalu datai ngandak semak kia laban deka nangkir randau seduai.

Jingan: Ooo Jawai, agi ingatka ensera Jetie ti ditusui aki lemai kemari nuan?

Jawai: Agi ahh! Rindang ati aku ninga aki nusui ensera.

Jingan: Sinu amat aku ninga ensera Jetie. Kati asai ati nuan dih?

Jawai: Ya mih, kasih aku ngenang nasit tudah Jetie ti diperinsa sekeda sida serumah ke bebulu ati.

Jingan: Iya merinsa baka nya ketegal ti enda ulih mayar **salai** ti disanda iya ari sekeda sida serumah.

Munah: Jawai! Nama utai dikerandauka seduai dih?

Jawai: Eh, kami duai benung **ngenang** ensera Jetie ti ditusui aki kami lemai kemari!

Anyie: Kati munyi ensera nya dih?

Jingan: Ensera Jetie nya ngenang pasal tudah Jetie. Iya enggau sida serumah **nubai**. Tang iya nadai bulih ikan mayuh baka orang bukai. Nya alai iya lalu **nyanda** ikan ari sekeda sida serumah. Tang udah nya iya enda tebayarka utang salai ikan nya.

Anyie: Oo pia, manah amat ensera nya.

Munah: Aku pan selalu mih ninga aki aku nusui ensera enti lebh pulai ke menua.

Anyie: Enti aku bisi hari, ka aku bejalai ngagai kita. Ningaka aki seduai nusui ensera.

Jawai: Tau mih Anyie, maya lepa ujung minggu tau nuan ngagai kami.

Anyie: Manah mih nya, tang nganti aku nanya ngagai apai enggau indai aku dulu.

Munah: Eh, nyin Pengajar Ravi datai. Aram tama kelas kitai!



## AKTIVITI

1. Keluluka randau sida sebuat nya tadi.
2. Peratika tujuk jaku dalam genteran randau nya tadi.
3. Ba penemu nuan, nama kebuah kitai patut nanka pengawa beensera? 🌈

## LATIH

1. Kerandauka reti leka jaku di baruh tu:

salai

nubai

ngenang

nyanda

2. Tulis ayat ti nunjukka tujuk jaku sebut enggau tujuk jaku tulis nitihka chunto di baruh.



### Timbang Penemu

Tujuk jaku sebut:

- Ayat mudah sereta pandak.

Tujuk jaku tulis:

- Bestruktur lalu ngena ayat penuh.

Tujuk Jaku Sebut

Ooo Iगत! Nuan ka kini?



Tujuk Jaku Tulis

Deka kini ke nuan Iगत?







**Bacha sereta meretika ensera di baruh tu.**

### JETIE

Nyau pemuas Jetie ke sebana enggau sabak-sabak betatika pemerinsa diri, seninjik dih Keling bisi nyumpit ba puchuk kara enda jauh ari nya. Ninga munyi nyawa orang bisi nyabak, dia Keling lalu nurun ari puchuk kara ngandak tunga auh orang ke nyabak nya. Keling lalu bejalai nuju ngagai langkau umai ti endur iya lalu tepedaka Jetie ti benung nyabak. Iya lalu nanya ke kebuah Jetie nyabak enda badu-badu. Jetie lalu madahka diri udu merinsa laban ti nyadi ulun sida serumah. Iya diasuh sida serumah ngibun langkau umai.

Keling lalu nanya Jetie nama kebuah sida serumah ngambi iya nyadi ulun? Jetie madah ngagai Keling kebuah iya ti nyadi ulun sida serumah laban iya enda tebayarka salai ti disanda iya ari sida. Ninga munyi nya, Keling enda ngasuh iya ngibun umai agi lalu mai Jetie pulai ngagai rumah panjai sida Keling. Tang taja pia, Jetie madahka diri enggai laban iya takut dianu sida serumah. Keling majak ngumbuk Jetie lalu madahka sida serumah enda nganu iya. Nyau kepuas Keling ngumbuk Jetie, nurut ga tudah Jetie. Seduai lalu bejalai pulai ngagai rumah sida Keling. Datai ba rumah sida Keling, Kumang enggau sida serumah gaga amat meda Keling mai temuai.

Lebuh maya sida serumah datai nganjung bekal ngagai Jetie ba langkau umai, dia sida nadai nemu Jetie. Meda baka nya sida lalu meragam Jetie udah mati tauka ngerarika diri nadai temu tunga, laban ti enda nakal nyadi ulun sida.

Kira empat lima hari udah diau enggau sida Keling, baru sida nganjung iya pulai. Sebedau iya diasuh sida pulai, dia Kumang enggau Lulong lalu meri iya pengaruh. Pengaruh ti beri sida nya dikena nulung Jetie ngambika iya enda merinsa agi lalu bulih semua pengaya enggau pengeraja. Sida Keling mega meri Jetie salai dikena iya mayar semua utang salai ti disanda iya ari sida serumah. Sida Keling lalu ngasuh Sempurai nganjung Jetie pulai. Sempurai lalu nulung Jetie ngema semua salai nyentukka ngagai langkau umai ti endur Keling nemu Jetie sebedau nya.


Jetie lalu terus pulai ke rumah mai salai ke dibai ari panggau. Datai di rumah, dia sida serumah lalu begau meda Jetie. Sida lalu nanya kini penunga iya lebuah sida nganjung bekal ngagai iya ba langkau umai. Jetie madahka diri ngiga salai dikena mayar utang salai ti udah disanda iya ba sida serumah. Semua salai ti dibai iya pulai lalu diengkah iya ba ruai. Nyau bedunjung salai nya, Jetie lalu mayar semua utang salai iya ngagai sida serumah.

Nya alai Jetie kenu ku cherita, nyau nyadi raja. Semua orang ke ngambi iya ke ulun nyau merinsa ari iya. Iya ga udah disumpah sida Keling, sumpah sida Kumang, lalu kaya raja iya. Lantang diau, udah bekau ke nyadi ulun orang nya tadi. Taja pia, iya enda jai ati ngagai sida serumah.

(Dibali ari: *JETIE (Lambar 13) – Digat Anak Kotak, Jerita Tuai enggau Ensera, Majlis Adat Istiadat*)

### **AKTIVITI**

1. Betanya saut enggau pangan nuan pasal ensera di atas.



2. Tusun nitihka rurun lima iti pekara ti bisi nyadi dalam ensera di atas.
3. Padahka simpul penemu nuan ngagai kelas pasal cherita ti udah dibacha tadi. 🌸

### **LATIH**

Diatu mayuh ensera udah diengkah ba dalam Internet. Giga siti ensera ngena kereban ICT lalu tulis sinopsis ensera nya. 🌸





### Peratika penerang di baruh tu.

Taun tu, Gerempung Pelajar Jaku Iban SMK Tinting Tebilang bisi **ngatur** siti pekit nulis ensera beserimbai enggau Minggu Jaku. Tuju pekit nulis ensera tu diatur **ngambika** nemiak rebak baru nemu sereta meretika senentang ensera tuai kelia. Ari nya tadi, nemiak lalu ulih **ningat** sereta nusui ensera nya baru ngagai generasyen ti dudi ila.

Penerang pasal pekit nulis ensera ti deka diatur Gerempung Pelajar Jaku Iban SMK Tinting Tebilang nya deka diatur ba timpuh berengkah ari 15 ngagai 30 haribulan April. Semua nemiak diperansang ngambi bagi ba pekit tu. Pekit nya dibagi ngagai dua kategori. Kategori keterubah iya nya, bagi sekondari baruh ari pom satu ngagai pom tiga. Bagi kategori kedua iya nya, sekondari atas ari pom empat ngagai pom lima.

Semua **penerang** pasal pekit nulis karang nya tau ditanya ngagai Pengajar Linggir ti nyadi pengajar penyanding penemu Gerempung Pelajar Jaku Iban. Kelimpah ari nya, penerang pasal pekit **ngarang** nya tau ditanya ari pengari raban gerempung nya. Sida ti ulih endur betanya, iya nya Megong enggau Injat ari kelas pom 1 Nendak untkup kategori sekondari baruh. Ba kategori sekondari atas, penerang tau ditanya ngagai Ngelai enggau Kelinah ari kelas pom 4 Beragai.

Atur pasal pekit ngarang iya nya baka tu: Kesatu, asil karang mesti enggi diri empu. Reti nya asil karang enda tau nunda enggi orang bukai. Kedua, pemanjai karang bagi kategori sekondari baruh nya lebih kurang 180 leka jaku. Untkup sekondari kategori atas, pemanjai karang nya lebih kurang 300 leka jaku.


Perais ti disedia ngagai orang ti menang nya lumur satu RM50.00 enggau setipikit, lumur dua RM40.00 enggau setipikit sereta lumur tiga RM30.00 enggau setipikit.

Penyampau perais nya sebaka bagi kategori sekondari baruh enggau sekondari atas.



## AKTIVITI


1. Kerandauka bansa ensera ti dikerinduka nuan.
2. Kelala urat jaku ba leka jaku ti bechura biru.



3. Betanya saut pasal bida reti urat jaku enggau reti iya enti udah diberi penambah.

## LATIH

1. Ngena chara beraban, gaga siti notis bemalinka chunto di baruh tu:



2. Tuliska lima iti urat jaku ti bukai ti ditemu nuan. Uдах nya, beri penambah dikena nunjukka reti ti bebida ari urat jaku nya.
3. Nuan enggau masuk pekit ngarang ensera, karang ensera nuan nya. 🌸



## Bungai Jaku

Bacha ensera di baruh tu, lalu peratika sempama ti bisi dikena.



### Kaul Pendiaui ti Manah

Udah tembu matahka lengan lemai nya, Budin bejalai ngagai bilik sida Ngelai. Iya deka mai Ansam ti sepiak bilik sida berandau enggau Ngelai senentang duruk sida tiga ti ngaga rumah baru. Dua hari ti udah sida tiga sama udah abis tulang gawa ngaga rumah Ngelai. Enti nitihka ripih semaya suba, sepengudah gawa ngaga rumah Ngelai sida tiga mindah ngaga rumah Budin. Udah nya, baru ngaga rumah Ansam. Baka nya mih gintir duruk ngaga rumah sida tiga. Pengawa sida serumah ti berumah baru nya endang ari aum runding ti sama sida serumah. Tuai rumah sida mai sida serumah berumah baru meda rumah sida ti diatu selalu nyau deka ampuh bah enti lebh mayu ujan sangat berunggu. Sida serumah ti bisi tiga puluh lima pintu nya endang nadai jaku bantah. Kekadang tak abis ati sida serumah, enti lebh ninga ujan sangat enda ngetu-ngetu. Sida balat nangi enggaika enti nyadi bah besai tau ngampuhka rumah panjai sida ke diatu lalu tau ngasuh bejadi nabanka nyawa.

Suba lebh ti agi ngatika diri baru berengkah ngaga rumah, dia tudah Ngelai nyau abis akal ngira chara dikena nirika rumah baru iya. Kebuah pia, laban Ngelai tu enti dibanding enggau Budin seduai Ansam tak agi bau lia. Tang sekumbang iya ti udah beduruk enggau Budin seduai Ansam dia pengawa iya nyau berasai lempung. Kati ku enda, ga Budin seduai Ansam endang dulu ngetup garam ari iya. Semua pengawa ti dikereja sida tiga begulai tak berasai lempung magang. Sida tiga besaup baka angkut semut ngereja semua pengawa baka ngangkut pasir, ngangkut batu enggau nunyau semin. Baka nya mega lebh nyanggit atap ba perabung, Budin seduai Ansam endang enda nejuka Ngelai laban seduai ke landik agi bejelangkit ngereja pengawa betukang nya. Umba mega bini Ngelai benung betubuh bisi ke anak tuai. Nya alai tudah Ngelai tak semina nulung seduai besuaka perengka ti dikena begagaka rumah aja laban ti bengkak jari. Taja pia, pengerajin Ngelai endang nadai endur mantah. Iya enda nemu enggau orang main ular lalu enda bentut tulang. Nya alai seduai enda berasai nyanggup beduruk enggau Ngelai.



Nambahka nya, bilik sida tiga ti berimbau ngasuh sida tiga nyamai agi beduruk enggau pangan diri. Penemu enggau pengelandik Budin seduai Ansam ba pengawa betukang ngaga rumah sama **belah rutan**. Nadai ngalahka pangan diri. Seduai sama udah teleba bekuli ngaga rumah enggau China ba pasar maya ti agi bujang suba. Nyadi tudah Ngelai endang nadai peneleba enggau orang gawa kasar. Iya mega baru nirika rumah tangga enggau bini iya Satik.

Pengawa sida serumah ti berumah baru nyau deka setengah tembu. Enggi sida bukai serumah dia mega nyau udah bisi tujuk rumah ti menyana. Sida bukai mega sama bisi ngaga duruk enggau pangan diri ti berimbau bilik sekumbang ti berumah baru nya. Pemanah kaul sida serumah enggau pangan diri endang selalu dipuji tuai rumah sida. Sida serumah nadai kala bisi **jaku ngelambung langit** enggau pangan diri.


## AKTIVITI


1. Betanya saut pasal cherita ti udah dibacha.
2. Giga jaku sempama ti bisi dikena dalam teks ti udah dibaca.


a. matahka lengan


b. abis tulang


c. abis ati


d. 


e. 


f. 

g. 

h. 

i. 


j. 

k. 




3. Ngena chara beraban giga reti jaku sempama ti bechura biru. 🌸

 **LATIH**

1. Ba penemu nuan, nama ajar manah ti bisi ditemu dalam ensera ti udah dibacha? 🌸
2. Banding enggau bidaka gaya pengidup ti dikembuan Ngelai enggau Budin ba kar gelembung gandin di baruh tu. 🌸













3. Ba runding nuan, nama pengujung pengawa sida tiga ti beduruk nya? 🌸
4. Tipak gambar di baruh tu enggau sempama ti betul. 🌸




















5. Isi endur puang di baruh tu ngena sempama ti engkeman.

- a. Kami sebilik baru badu  beengkayuka sayur babas.
- b. Judin nyau  bepekit belanda ngarika sekula sida.
- c. Endun  ninga berita ti madahka apai iya sakit raya.
- d. Kedit nyau  ngiga chara dikena nembuka tanya matematik ti diberi Pengajar Sim.
- e. Sida aya iya enggai mai Ujang berikan, laban iya ke .
- f. Kami sekelas baka ke  lebu ti ngangkut mija ti diasuh pengajar Chiew.
- g. Bini Gimang benung  ke anak seduai iya ke pengkuan.
- h. Gimang  laban ti bepentika bini iya ti benung ribat.
- i. Lebu pengawa ngerupan ba sekula, Jawie enggau Sigie endang enda kala  laban ti endang bagas gawa.
- j. Rayung enggau Kudi  lebu ti ngereja pengawa beban perau.

6. Rintai lalu gaga ayat bepelasarka sempama ti ditemu nuan. 

No.	Sempama	Ayat
a.	Chunto 1: main ular	Jamit endang ditemu orang deka <b>main ular</b> lebu ngereja pengawa rumah, nya alai sida enda mai iya lebu ngaga komiti pengawa meresi payung rumah.
b.	Chunto 2: ngelambung langit	Juntan enggau Jingan enggai bebakih enggau Rubin laban iya selalu bejaku <b>ngelambung langit</b> .
c.		
d.		
e.		
f.		
g.		
h.		
i.		
j.		



## Jalai Jaku

### Jaku Pengecap Tesa

Pengecap tesa nya leka jaku ti nerangka tujuk jaku nama lalu mesti dikena bekaling enggau jaku nama. Iya tau dikena dulu tauka dudi ari leka jaku nama, bepanggai ba gaya ayat.

Peratika chara ngena sekeda pengecap tesa belalauka gambar di baruh tu.

Jaku tiap	Pengecap tesa	Jaku nama
dua	lebuan	
lima	limpir	
se	lungkit	
tiga	ruas	
dua	gupung	
dua	gelung	

## AKTIVITI

1. Kerandauka chara ngena penganap tesa ti udah diperatika nuan.
2. Padahka penganap tesa ti engkeman nitihka gambar di baruh tu.



## LATIH

1. Kelala lalu liska penganap tesa nitihka kategori ti patut. 🌸



### Tibang Penemu

Penganap tesa - Leka jaku ti nerangka tukuh jaku nama lalu mesti dikena bekaling enggau jaku nama. Iya tau dikena dulu tauka dudi ari leka jaku nama dikena nunjukka penyampau tauka pelayuh, lebeh kitai bejakuka utai ti ulih ditiap tauka ditesa.

a. Penganap tesa ukai utai idup  
Chunto: lumpung + kayu

1. \_\_\_\_\_

2. \_\_\_\_\_

3. \_\_\_\_\_

b. Penganap tesa utai idup  
Chunto: iku + manuk

1. \_\_\_\_\_

2. \_\_\_\_\_

3. \_\_\_\_\_

2. Gaga ayat ngena semua penganap tesa ukai utai idup enggau penganap tesa utai idup ke udah diliska nuan ba latih lumur satu. 🌸



## PENGUKUH

### SERIDI

1. Isi endur puang dalam ayat di baruh tu ngena pegenap tesa ti betul.

pun

tangkal

raban

ruas

tangkai

bentuk

kelapis

singkap

batang

a.

✍️ padi ba umai Menti manah amat dipeda laban ti nyau deka mansau lalu tau diketau.

b.

Indai Riena pedis amat ati laban empat ✍️ pinggai kacha sida pechah labuh ari mija.

c.

Ngumbang meli dua ✍️ tinchin emas baru ke bini iya.

d.

Apai Meringai nyan tiga ✍️ kayu jinggau dikena iya ke kayu api.

e.

Biju enggau bini iya bisi nanam lada sepanyampau dua ribu ✍️.

f.

Rimong enggau apai iya ngelulun dua puluh lima ✍️ asi pulut rambau pengerami gawai tu tadi.

g.

Lebih sepuluh ✍️ nemiak sekula begempuru ba pengawa lumba enggau main antara sekula ti diatur Opis Pelajar Bagi Betong nya.

h.

Apai seduai indai selalu bulih lima ✍️ getah tiap kali seduai nurun nangkai getah.

i.

Tiga ✍️ tangga sadau bilik kami bisi udah patah laban udah diempa merung.

2. Tulis ayat nuan empu ngena semua pegenap tesa di atas tadi.





Sadaka genteran ensera di baruh tu ngena rentak sebut ti betul.



Udah nya sakit mih Keling kenu, nadai utai ngemalat nya. Deka diberi sida Endu Rikok Papan Pelangka makai, enggai ga iya makai. Tak ngenying enggai meda asi enggau lauk. Deka dibai sida Sempurai bengkerebap pan enggai ga iya. Udah nya deka dibai sida Laja bekesuling enggai ga iya. Dibai sida Pungga beruding pan enggai ga iya; tak dikenggaika iya magang semua main enggau pengawa sida ke sama berambau angkat bujang.

Nyadi iya semina tak seruran gali lading-lading baka tinting maring muang, seruran tak gali lengau-lengau baka pintu kemarau langkang. Seruran tak gali betunjur apus baka batang mulung lamus udah dibunang.

Nyadi gamal iya nyau kurus sekurus laban ke lama udah enda makai; semina tinggal kulit ngelamun tulang agi dipeda. Ditanya orang pemedis nadai ga pemedis ku iya. Nyadi pun ensera tu beduduk ari Keling ke sakit laban iya merampau deka betemu enggau Satik ke landik bala nyerang, Sudan Kelindan Lambar Benang; Bunsu Jubang Betengelang Bulu Burung, Jali datai ari kaki ujan ngerunung.

Meda iya baka nya, dia dih Buat Sempurai Muntigerai Lancham Disimbang, Patu Buluh Antu Lanting Tekejang, Bunga Nuing Manuk Biring ke disabung mali lenyang, mai semua sida serumah ngaga tuak serumbang sepintu. Udah mansau kenu tuak sida tadi, dia kenu Sempurai lalu ngasuh orang ngambi ngabang, ngambi semua sida ke sama semakai gawai.

(Diambi ari: *Jubang (Lambar 1) – Lionel Frederick Mawar, Borneo Literature Bureau 1971*)



UNIT  
4

## Nyeratan Cherita

Pengarang nya mensia kreatif ke ngembuan pengulih berunding, beimaginasyen sereta bejaku dikena ngasilka karya cherita. Mensia mayuh nyadi elemen mata ke chukup beguna ke pengarang. Pekara ke nyadi dalam mensia mayuh nyadi puncha pikir pengarang ngasilka karya. Karya cherita ukai semina dibacha dikena beperindang tang ulih mantaika penemu pasal mensia mayuh.

Cherita ulih nambahka pereti pemacha senentang daya idup kelebih agi pekara ke kadang-kadang pedis diperetika sechara rasional. Chura pengidup ke bemacham leman tusah dipelaba. Berindik ari nya cherita nyadi media ke ulih mantaika mayuh pekara pasal daya enggau pengidup mensia mayuh.






Tembawai Antu enggau Padi Garai ke meruan dipeda datai ke sehari tu nyadi eviden ti nunjukka pengidup bansa Iban kelia endang bisi kait enggau bala sida Keling, Sengalang Burung sereta Raja Sempulang Gana.

Kala nuan macha cherita lama bansa Iban ti betopik *Garai Kalia* tu?

Dalam cherita tu bisi ditulis pasal penatai nama Tembawai Antu. Kelimpah ari nya, bisi mega dicheritaka asal penatai Padi Garai. Mayuh agi pekara bukai ti bisi sangkut paut enggau siku tuai Iban ke benama Garai bisi dikenang ba cherita tu.



Kala enda kita ninga, ngelansa tauka tebachaka cherita lama *Tiga Belas Bengkah Mimpi* tu?

Dalam cherita tu lenak ditulis pasal 13 bengkah mimpi ari 13 iku tuai bansa Iban kelia. Sekeda pengempu mimpi ti bisi dikenang dalam cherita tu iya nya Temenggong Koh, Linggir Libau enggau sepuluh iku agi ke bukai. Manah amat cherita tu.



## Aram Mending enggau Bejaku

Jawai baru udah tembu macha siti cherita pandak. Iya bisi bekunsika cherita nya chara ngelansa enggau Munah. Peratika randau di baruh tu.

Nama tema cherita ke baru udah abis dibacha nuan nya Jawai?

Cherita tu berat agi ngenang perangai.

Ulih nuan nerang enggau ngelansa pasal watak cherita nya?

Nadai nya salah dih Munah. Watak ke bisi dalam cherita tu nya Bajing enggau Sangkan ke ngembuan ulah jai, Amit tuai nemiak bisi ngelalau seduai iya, sekali seduai iya ditangkap Pengajar Laja ngereja penyalah. Pengempu kebun pan bisi dalam cherita tu.

O pia nih. Tak munyi ke nundi nuan. Baka ni jalai cherita dih Wai.

Sekali Bajing seduai Sangkan merambu deka enchuri buah nyiur. Amit nemu perambu seduai lalu nagang. Seduai enda ngasi ngujungka seduai ditemu pengempu kebun. Seduai ngebuka diri lari. Enda mukai-mukai tak besatup enggau Pengajar Laja.

O manah endar ga jalai cherita nya. Tau aku ngingjau bup nya Wai?

Nadai salah, bisi endar ajar manah dalam cherita nya.





## AKTIVITI

1. Cheritaka baru cherita nya.
2. Pejuraika nama tema cherita nya? 🌸

## LATIH

1. Nama penyadi Sangkan seduai Bajing enti seduai ...
  - a. ngasika jaku Amit?
  - b. enda ditemu ngereja penyalah?
2. Ba pelaba nuan, nama ukum deka ditapi Sangkan seduai Bajing. 🌸
3. Bacha teks randau di baruh tu lalu saut tanya ti disediakan.

Seduai udah ditemu ngereja penyalah ke berat, iya nya ngambi buah nyiur orang. Kelimpah ari nya, seduai mega pansut ari kandang sekula nadai pemendar. Nya kebuah seduai enda tau enda diukum.

Aku pan sama baka iya mih pengajar. Chukup nesal, jera apai jera indai aku.

Enda ulih minta kasih pengajar? Aku tu udah nesalka penyalah diri. Enda aku ngereja penyalah agi udah tu pengajar.

Manah mih nya, seduai udah nesal ke ulah enda manah ti udah dikereja. Nya kebuah ke agi anang enda berunding panjai. Maya lepa patut disi ngena pengawa manah baka belajar beraban, ngulang pelajar enggau ngaga latih. Nyadi ukum tu dikena nyedar sereta ngajar seduai.

- a. Berapa iti watak dalam randau di atas?
- b. Keluluka randau nya.
- c. Nama agi pengawa manah patut dikereja maya lepa?
- d. Giga siti jaku sempama ke tau dikena dalam dialog di atas.



**Bacha teks di baruh tu.**

## Temenggong Koh

Koh Anak Jubang ada dalam taun 1870 ba Pulau Ensulit, Batang Kanyau, Kalimantan. Iya siku ari tuai bansa Iban ke chukup jelai nama lalu kala dichirika perintah Sarawak nyadi Temenggong. Ukai semina dalam raban bansa Iban, penampak rita iya mega ditemu genap pupu raban bansa dalam selampur menua Sarawak enggau Kalimantan. Raban bansa Iban ke nguan kandang menua Batang Rajang kelia endang chukup taluk ke iya laban penau iya mutarka sesebengkah pekara tauka isu ke bisi nyadi. Ambika chunto, iya bisi numbuhka atur bekait enggau pengawa berimba enggau bempu tanah tauka temuda. Kelimpah ari nya, iya mega chukup dipebasaka perintah Raja Brooke ketegal pengelandik iya bejalaika sekeda polisi perintah dalam raban bansa Iban.

Lebuh jeman tu, penyerekang kaul antarabansa diri enggau bansa bukai endang agi bisi nyadi. Penyarut tu ukai semina nyadi dalam kandang menua perintah Sarawak ke dipegai Raja Brooke tang ngerekai ngeluah sempadan ngagai menua Kalimantan ke dipegai Perintah Belanda. Besenutuk enggau rambau tu mega pengidup iya enda lari ari ngasaika pendiau dalam **menua siga** laban penyerekang kaul baikka antarabansa diri tauka enggau bansa bukai.

Temenggong Koh tu siku anak Iban ke bisi ngembuan peragam runding ke tetap sereta tajam maya nya kelia. Ari perati iya penyiga menua ketegal penyarut antara pupu raban bansa maya nya tau bendar nyadi penekul pemansang runding enggau pengidup mensia mayuh. Nya kebuah iya lalu bekira ngiga jalai nyerakupka pupu raban bansa ke bisi nguan Ulu Rajang, Batang Baleh, Batang Balui sereta nyentuk ngagai menua ke dipegai perintah Belanda di Kalimantan. Berindik ari nya, iya endang seruran bejurai enggau perintah Raja Brooke endur iya mesuka sadang penemu pasal chara mutarka penyerekang antara pupu raban bansa.

Berindik ari pengeran enggau pemuh iya deka nyerakupka semua pupu raban bansa maya nya kelia, Temenggong Koh dipaduka nyadi orang tengah antara perintah Raja Brooke enggau Perintah Belanda ngatur pengawa bebaik antara pupu raban bansa. Berindik ari nya pengawa bebanchak babi (bebaik) antarabansa Iban enggau bansa Kayan, Kenyah sereta bansa bukai diatur ngena chara aum kena 13 November 1924. Raja Charles Brooke, bala pemesai Perintah Belanda enggau semua pupu raban bansa ke nguan Ulu Rajang, Batang Balui enggau kandang menua di Kalimantan bisi ngulu aum tu. Raban bansa Iban betuaika Koh lalu raban bansa Kayan, Kenyah betuaika Ujong Lenjou. Aum tu mujur ngatur pemaik antara pupu raban bansa.


## AKTIVITI

1. Betanya saut dalam raban pasal Temenggong Koh.
2. Rintaika semua pengawa ke bisi dikereja Temenggong Koh.

## LATIH

1. Padahka reti rambai jaku menua siga.
2. Terangka tuju ngatur pengawa bebaik antara pupu raban bansa bepelasarka teks.
3. Tusun pekara di baruh tu ngena kar rurun.

- ➡ Temenggong Koh irau laban penyigau menua.
- ➡ Pengawa bebanchak babi diatur.
- ➡ Temenggong Koh seruran ngansak perintah bejalaika atur pemaik.
- ➡ Penyerekang pupu raban bansa bisi nyadi di Batang Rajang.
- ➡ Raja Brooke maduka Temenggong Koh nyadi orang tengah ngatur penyarut pupu raban bansa.





### A. Bacha cherita di baruh tu.

“Anang tak kelalu rindang ga kitai ditu. Pukul 8:00 lalu diatu, agi pama pejalai kitai napatka **tatai** bukit”. Tebah nyawa Pengajar Linggir ngalihka perati kami. Pengajar Linggir laban ke nyadi pematak aktiviti nangga Kuta Rentap, seruran awas, nangika laun. Aruh ga pengajar munyi nya, bala mensia ukai belelak, tang tak beselalat begigaka buah babas. Injat, Megong enggau Nyohen nyau rindang **empalang** buah sibau raras ke senutuk endar ga maya nya udah bisi midar.

“Nama kita tiga ka tinggal pia?” ku Munah ngangau ke sida tiga ke benung mulaska buah sibau. Nyau ngerecham mua sida ngelaban buah sibau **midar**.

Kami bekejang ninggalka kaki bukit, mupuk bejalai nuju kepai tuchung Bukit Sadok. **Beringku** gaya mensia sama bela ngema kereban diri. Tudah Nasir laban ke mit agi **belayan** luba nya bepaut pending mai diri enggau ma iya. Ni enda, taja gamal tudah tak alus tang pama penegar makai. Bisi empat put sadin ikan nambahka buat ma iya endang ditaga ke dempa sekumbang ke di menua Bukit Sadok.

“Wat, uji aku nyaup nuan mai sekeda buat ma nuan, ngetu dulu, keruah”. Ka malu-malu gaya tudah Nasir nerima tulung siku orang tuai pangkat aya Pengajar Linggir ke bisi ngemalin pejalai kami.

Arus jalai endang meruan, tang pengerenjan Bukit Sadok balat endar nyentarka gumpal buah betis laban ke seruran bai betunjan. Taja pia pemanah rampa menua enggau leman ulah jelu terebai enggau jangkit **nipang** pengelelak tulang. Nyambil ke mupuk nyingkang begadai, timpai kami mega dibatak pemanah sekeda bungai kayu ke bisi ayan. Batang kayu agi mayuh ke begamal dua tiga pemerap. Dan kayu ke rinda **tambah** daun ke **nyelebumbun** nyakal panchar mata panas, ngurangka pengikak bala. Bala kami semina bisi ngetu-ngetu ngarau serantau jalai.

“Apu, bisi manuk ditu pia, bisi mensia ba kandang bukit tu!”

“Ukai nya manuk dih, tak sempidan segenda raya nya, sapa orang ditu?” jampat Megong nyakal jaku Nyohen. Iya nyintak seput, ngetu bediri. Panjai singkang Anyie ngelawa seduai. Bekesebar raban sempidan terebai. Semina kilas sekeda sempidan sempat dipeda Anyie. Bala bukai semina meda bekau kair sempidan.

Panjai terais bala kami, tujuh kali, ngelembungka Pengajar Linggir. Pukul 9:53 Raban Kelab Sejarah SMK Tinting Tebilang likun manggai ba tatai Bukit Sadok, sentang Kuta Libau bensumbar Rentap Tanah, Rentap Menua, Sumpit lasit tibung temaga, sumpit mit nyimpakka jerit Bintang Tiga. Palan betan ngelaban Perintah Raja. Kami berasai temegah ati.



## AKTIVITI

1. Kerandau lalu tuliska reti leka jaku di baruh tu bepelasarka guna iya dalam teks.

tatai	empalang	midar	beringku	belayan
nipang	rinda	nyelebumbun	bekesebar	terais

2. Betanya saut pasal chara dikena ngintu enggau nyaga palan ke bekait enggau Bujang Berani.

3. Pejurai lalu tuliska sekeda chara ke ulih dikena ngetanka penampak rita Bujang Berani. 🌸

## LATIH

1. Tuliska sekeda penteba ke dikembuan Bujang Berani.

2. Rintai lalu tuliska sekeda Bujang Berani ke dikelala nuan.

3. Gaga karang pasal siku Bujang Berani Iban.

B. Ah Seng enda ulih enggau Kelab Sejarah sekula sida nangga Kuta Rentap ba tuchung Bukit Sadok laban ke tabin. Seduai iya Jingan bisi bemesej nengah aplikasyen telefon pintar. Bacha mesej seduai di baruh tu.

### Ah Seng

Selamat pagi Seng, arapka **nuan belinsur baik**. Bala ditu gerai magang. Akai! lelak amat tu, baru nudukka diri. Mata panas **benung nampun**. Bala udah sampal manggai ba **tuchung** Bukit Sadok. Regah Kuta Rentap chukup **ngakun** bendar dikelingi rampa menua ke chukup manah ditinung. Batang kayu nyau bebesai magang. Burung nyau richah rami. Bisi dipeda raban kera benung betayun ngena randau kubal. Bala benung **kisuk** nyerungkai bekal, deka matahka lengan. Nya aja dulu Seng, enti bisi awak lagi aku nyerita ngagai nuan pengawa kami ke bukai. Besampika nuan lengkas baik.

### Jingan

Selamat pagi mega ngagai nuan Ngan. Kenataika tabi ngagai bala kitai ba Kuta Raja Berani dia. Nyau ga bisi nyamai ga asai isi tu, semina idung ke agi bisi ka sendat-sendat. Rindu endar aku meda mesej nuan Ngan. Naka ga pengerindu bala kita dia. Aku endang lama udah ngembuan juluk ati ka nangga Kuta Rentap nya, tang mih **penabin** tu muntanka penginein ati. Ditambahka pemanah rampa menua munyi ku nuan nya ga ngasuh aku balat agi asa enda ulih sama enggau kita kia. Au nya mih Ngan, ngarapka kita lantang likun sereta gerai sepemanjai ke dia.

## AKTIVITI

1. Kerandauka mesej Jingan enggau Ah Seng nya.
2. Padahka reti jaku tauka rambai jaku di baruh tu lalu gaga ayat nuan empu ari leka jaku tauka rambai jaku nya.

belinsur  
baik

benung  
nampun

tuchung

ngakun

kisuk

tabin

## LATIH

1. Terangka reti sempama matahka lengan lalu gaga ayat ari nya.
2. Pejuraika dalam raban pasal signifikan Bukit Sadok ari sukut seregah bansa Iban. 🌈
3. Tembuka tibak ripot di baruh tu ngena leka jaku ke udah disediakan.

ngatur

limpang

dipeda

berasai

niki

pejalai

sada

bekejang

terunda

manggai

berumban

Kena 13 haribulan Mac 2017 tu tadi, Kelab Sejarah SMK Tinting Tebilang udah ✍ aktiviti nangga Kuta Rentap ba tuchung Bukit Sadok. Raban ke kin bisi lima iku pengajar enggau 20 iku raban kelab tu.

Kami ✍ ari sekula urung pukul 7:00 pagi ngena empat buah entuka. ✍ ari sekula ngagai kaki Bukit Sadok lebih kurang sejam. Sepemanjai jalai, mayuh amat utai ✍ bala kami sebuat. Kami bisi meda rumah panjai, dandang umai, kebun lada enggau kebun sawit. Enda ✍ alai kami pan datai ba kaki Bukit Sadok. Kami belelak dulu sebedau neruska pejalai niki Bukit Sadok.

Kira pukul 8:00 pagi kami seraban belabuh ✍ Bukit Sadok. Kami enda bejalai ✍ laban ke nyinuk bayam pemanah rampa menua ke diteresa. Nambahka nya mega, ✍ nyawa tupai, kera enggau burung ngasuh ati kami balat teperindang. Pia mega sempat ga bala kami ✍ ngiga buah tepus, lemba enggau senggang ke enda sangat ngilah ari arus jalai. Enda berasai laban ke ✍ berandau enggau limpang kami sebuat likun ✍ di tatai Bukit Sadok urung pukul 9:53 pagi.



## Bungai Jaku

Audio 5:



Maya aktiviti Nangga Kuta Rentap, Megong berandau enggau siku orang tuai ke ngemalin pejalai sida. Randau seduai lebat agi pasal jaku sempama. Peratika randau seduai di baruh tu.

Aki, tau aku nanya senentang jaku sempama ngagai nuan?

Jaku silup enggau jaku kelaung, bisi ga udah ditemu aku. Ke bukai agi meranggang ba aku.

Anang guai aki, aku ngambi bup enggau pen kena nulis.

Au aki, rindu ku nerima padah nuan nya, terima kasih. Bisi lepa lagi aku minta kasih nuan nerangka reti semua sempama nya. Ka kin dulu aku, nama enda ga pengawa bala tak begelumu nyin? Engka bala pengajar bisi pekaru berat ka dipadah.

Tau Dom, nya ke manah. Jarang nemiak ka betanya baka nuan tu. Mayuh endar pengawa enggau ulah kitai mensia tau disemaka ngena sempama.

Au ah, kelimpah ari nya kitai bisi jaku sema banding.

Sedia nuan Dom, baka tu ku sekeda iya. Baka ketup lelabi mati, baka batu tungku, baka chabi padi, nibarka jala enda betating, baka amau di puchuk tuga, baka dilah enda betulang, baka ukui enggau mayau, ati hari, injau kara enggau agi mayuh ke bukai Dom.

Pia mih Dom. Kin dulu mih nuan. Endang baka.



4.2.3  
4.2.4  
1.6.2

## AKTIVITI

1. Keluluka randau ke udah diperatika kita tadi.
2. Rintaika jaku sempama ke bisi dalam randau.
3. Betanya saut pasal guna sempama dalam pengidup.

## LATIH

1. Tipakka jaku sempama di baruh tu ngagai reti iya.

Jaku Sempama	Reti
Baka ketup lelabi mati.	Enda tau bekampir, seruran deka belaya.
Baka batu tungku.	Sepeneka ati mansutka jaku.
Baka chabi padi.	Jompat berubah ati tauka penemu.
Baka amau di puchuk tuga.	Pengidup ti enda entap tauka nadai penegap.
Dilah enda betulang.	Enda mulaika kereban orang ke diinjau.
Baka ukui enggau mayau.	Gamal mit tang pintar mutarka pengawa diri.
Ati hari.	Mensia ke nelap tauka mensia ke enda kala mindah.
Injau kara.	Masin ngereja pengawa, enda ngudah-ngudahka pengawa ngapa.

2. Gaga ayat ngena jaku sempama di atas. 🌸





## Jalai Jaku

Bacha cherita di baruh tu.

Anyau enda liat ati agi napi pemerinsa diau di rumah panjai. Mayuh pengawa udah diuji, betanam, bekebun, betupi enggau bumai. Semua udah dikereja tang nadai pemujur. Ati iya lalu tekuing deka nguji ngiga asai beridup di nengeri. **Anyau pegi ngebuka diri ari rumah panjai lalu napatka Mengeri Besai Tapang Tingkar endur belabuhka pengidup baru.**

Anyau diterima gawa ba kilang perabut. **Betaun-taun iya gawa udah mendam ba kilang nya ngujungka iya nyau landik ngaga macham bansa perabut.** Menijar kilang nyau majak arapka pengawa Anyau. Meda pengangkun enggau penaluk Anyau ke semua pengawa ke diasuh, menijar meri peluang ngagai iya ngulu mayuh macham kus ke bisi bekait enggau pengawa ngasilka perabut. Kelimpah ari nya iya mega bisi ngulu kus ngatur pejalai pengawa ba kilang perabut. Semua penemu pasal ngatur pengawa ngaga perabut endang naka ulih diperati sereta diperetika Anyau magang. Anyau lalu dipaduka menijar iya nyadi menijar siti agi kilang perabut ke baru udah ditumbuhka.

Anyau bisi ati deka numbuhka kilang perabut ke diri empu. Iya suah betatika pemujur menijar iya, chukup lati, iya ga gemu iya ga betelu. Taja udah chukup kaya tang menijar iya majak numbuhka kilang perabut ke baru. Sepuluh taun udah nya, Anyau udah chukup puku nya kebuah iya ulih numbuhka siti kilang perabut enggi iya empu. Anyau kurang napi penanggul ngatur semua pengawa ba kilang iya laban ke endang bisi peneleba enggau pengelandik ti chukup. **Lima taun Anyau udah nya, iya udah mujur muka dua iti agi kilang perabut ke baru.**


Diatu iya bediri sama tinggi, duduk sama baruh baka bala korporat ke bukai dalam Mengeri Besai Tapang Tingkar, lalu bisi kilang perabut enggi diri empu.

## AKTIVITI

1. Ayat ke bechura mirah dalam tibak cherita nya tadi salah. Kerandau lalu kemetulka ayat nya.
2. Terangka reti leka jaku korporat.
3. Rintaika sempama ke bisi dalam teks.

## LATIH

1. Giga reti jaku sempama dalam teks nya lalu tulis ayat ngena jaku sempama nya. 🌸
2. Rintaika sekeda pengawa menijar ba sesebengkah bidang.
3. Terangka nama kebuah pemujur enda ulih datai sekejap mata. 🌸
4. Tembuka kar gelembung di baruh tu. 🌸





## Jalai Jaku

Teks di baruh tu bisi ngundan penyalah leka jaku enggau penambah. Bacha lalu peratika teks nya.

Hari tebererak siang, mata panas baru ngayanka panchar muak ke timur menua. Ujan lebat udah ngetu. Ai bah maras patung agi bekandang ba arus jalai. Sentang tapak rumah enda tak kelalu baruh tang ujan berunggu seminggu ngujungka bah besai mangka. Aku sempat meda rekod kamera CCTV. Rumah kami betiki ai paras pala pintu lalu enggi Urik negu kaki atap. Sapa-sapa pan dia, mimit bendar mih peluang ulih selamat.

Runding rapa sekejap, ngingung ga perening, enda jauh ari mua, **rarung** udah ditanggung, tesempulang enggau sabak sinu. Penusah enda besadang, indai Urik betinggang kayu rebah gulai pangka ngitar lebu biau balai enda bebah-bah neruju menua malam kemari. Mata panas tangan niki, seridak enggau dui sabak dara gauk udah teduh. Urik mengkang engkauk rat sepiak-sepiak dua iku menyadi iya ke bebida penempa. Seduai agi mit ditinggalka mensia ke dikesayau kedua kali, nitihka apai sida. Naka ulih Urik besabar diri.

Belubah aku mansang, ngerapat sida tiga. Urik, aku megai jari iya.

“Urik, unsut mih ai mata, ngetu mih nuan berai tusah ati. Keringka ati nuan, semengat nuan. Semua pekara ke nyadi mesti betapi enggau kering semengat ngambika nuan tau nyadi mensia ke teguh, kukuh sereta entap neruska pengidup diri. Urik ke ngelama tu ditemu aku, mensia ke chukup tan ati sereta sabar. Ari nya, enda lebu nuan jemah ila nyadi bintang biru ke terang bebendang ngerembaika panchar di langit besai.”

Iya enda malas. Semina tuchum. Leka mata iya mijar, manchar baka bintang biru. Lantang asai ati aku.

## AKTIVITI

Kerandauka sekeda penyilap ke selalu nyadi lebu nulis tauka ngarang.

## LATIH

1. Giga lalu kemetulka penyalah dalam teks.
2. Nama reti leka jaku **rarung**?
3. Beri penemu nuan senentang chara ulih nyeliahka penusah ti nuntung indai Urik. 🌸
4. Rintaika tiga iti bansa kudi ke bisi disebut dalam teks cerita tadi.
5. Kitai mesti ngadang sebedau dituntung kudi menua. Pejuraika pekara tu. 🌸



5.1.2



## PENGUKUH

### SERIDI

Giga lima iti cherita lama tuai bansa Iban.

### PENGAYA

1. Gaga sinopsis ke siti ari cherita lama ke udah dibacha nuan.
2. Tembuka kar titi di baruh tu endur nuan madahka bujang berani enggau ensumbar sida.

Bujang  
berani

baka

baka

baka

Ensumbar

3. Pejuraika dalam raban pasal pemanah kitai nemu cherita lama tuai menya?
4. Menua ke mansang bepun ari tuai ke bepenemu ba mayuh macham aspek. Pejuraika pekara tu.

### TISIH

1. Pilih sempama ke engkeman dikena nipak situasyen di baruh tu.

Ambing chukup nesal ke diri ke balat bendar beulah lebu sekula. Taja iya bisi ngembuan penajam untak tang ulah iya ke mayuh limpang udah mai pemuntan iya ba peresa SPM. Semua udah nyadi nesal dudi nadai reti.

Wat Lamba siku orang dagang ke chukup mujur. Kompeni iya udah nyadi pemekal kereban ICT ngagai mayuh opis-opis perintah enggau kompeni luar di selampur menua tu. Ukai semina nya aja pengaya iya mega majak nambah berindik ari pemujur iya ba pengawa bekebun sawit enggau lada bedandang besai.



Beduduk ari pengawa iya ke chakah deka belajar lalu nguji ngena inovasyon, Wat Lamba udah nempa pemujur ke chukup lati. Pengetan enggau penakal iya bepupuh sereta besemekih enggau orang dagang ke bukai ngujungka pengulih iya diatu sebaka enggau enggi raban korporat ke bukai.

Setaun Dom Baritu napi mayuh macham penanggul ngumpul cherita lama pasal daya idup, main asal enggau bansa. Taja pia iya enda mantul ngapa dataika juluk iya ke deka ngumpul seratus iti tiap-tiap bansa kereban nya diatu udah mujur.

Jang Juna enti deka bejaku iya enda ngira sapa-sapa, nyebut utai sigi enda belebas sereta nadai betapis. Enti enda tentu tan ati anang tentu betimbal enggau iya, enggaika pulai ke laya. Manah agi ngelipakka diri ari iya.

Taja tubuh Robero Nyelang alus enti dibandingka enggau bala pemain ke bukai tang iya jauh agi nyulut laban ke chakah, kreatif, nakal seput sereta landik ngelichek. Nya kebuah tim iya ke diatu enda sanggu nampung kontrak iya sepengelama lima taun agi.

# UNIT 5

## Tenun Pesaka Berega



*Ubung gar*  
Cotton yarn that has undergone the Ngur process (treated in a mordant bath)

Ubung gar



*Ubung ulat*

Ubung ulat



*Sebangki*

Sebangki



*Sulat*  
Bodkin made from bone

Sulat



Pemalu taya indu



*Akar engkudu*

*Engkudu root*  
Merrillia Enkudu  
In practice, the bark and root

Akar engkudu



Jengkuan/turak



Rakup




Belia



Tempaut/sengkabit



Nama kebuah kitai patut ngemeranka pengawa betenun?  
Pua kumbu nya asil tenun ti bepotensial besai enti dikomesialka. Baka ni chara?





## Aram Mending enggau Bejaku

Lemai siti maya ujung minggu, Jawai datai **ngelawa** Menti. Maya nya seduai benung ngenang sentang penemuai sida ke ngagai galeri tenun sambil mendingka radio.

Menti: Wai, enda bisi ati deka enggau aku ngelawa pemandang dagang asil tenun ba Dewan Masyarakat Tinting Tebilang ujung minggu tu? Uдах bisi jaku **gerah** ba radio pasal program tu.

Jawai: Nama kebuah enggai dih wai. Aku enda **kala** ngelawa pemandang dagang ke baka tu. Ka aku enggau nuan wai, enggai ka dikumbai orang **buruk** enggai mindah.

Menti: Nya mih, munyi ke dipadah penenun ke benama Bangie Anak Embol bisi datai maya nya. Nya endang tak Indu Gar Indu Takar.

Jawai: Oo.. anang muai peluang tua wai. Tambah mega, tu mih maya tua ulih ngemata enggau lenak asil pua kumbu **gaga** iya.

Menti: Au. Berasai gaga sereta temegah ati ninga rita pengelandik jari ibu nya. **Maya** ba galeri suba, **tua** semina meda gambar aja, tang maya tu ila tua ulih betungga mua sereta berandau enggau iya.

Jawai: Nya baru iya wai. Nai, nyu nempelah ga aku, kati bisi bejualka asil tenun maya nya?

Menti: Au, sigi bisi bejualka asil pengelandik jari enggau fesyen ari pua kumbu. Ba program bantai asil tenun tu wai.

Jawai: Apu, manah amat nya. Aku pan endang ka ngiga perais hari pengada ke apai aku. Tambah mega pangan aku bisi betanyaka kraf tenun laban indai iya bisi kedai kraf din.

Menti: Manah mih enti pia. Sereta tua kin ila wai, bisi apai enggau indai aku nyempulang tua.

Jawai: Sama besedia mih tua ke pekara ti deka ditanya lebh ke berandau enggau Indu Gar Indu Takar nya ila. Ngarapka bulih mayuh penemu nambahka penemuai tua ngagai galeri suba.

Menti: Au, aku arapka tua bulih peluang berandau enggau ibu Bangie maya tu ila.




### Tibang Penemu

Homograf - Leka jaku ti sebaka sepil tang enda sebaka sebut.  
Homonim - Leka jaku ti sebaka sepil sereta sebaka sebut tang enda sebaka reti.







### AKTIVITI

1. Keluluka randau di atas.
2. Kerandauka ngena chara beraban, senentang asil tenun ti ditemu kita. 🌸
3. Kelala bagi leka jaku homograf enggau homonim dalam randau nya.
4. Gaga ayat dikena nunjukka reti leka jaku nya. 🌸

### LATIH

1. Ngena chara beraban kerandauka asil tenun ti bisi ditemu kita.

Fesyen pekayan

Pengias

2. Baka ni atur tauka chara dikena nanka pengawa betenun? 🌸
3. Kelimpah ari pemandang dagang, baka ni chara kitai ulih ngelakuka pua kumbu? 🌸
4. Nama bida kain tenun enggau kain selama ti dijual ba kedai? 🌸



## Aram Macha

Pemulai ari ngelawa pemandang bantai asil tenun, Menti enggau Jawai ngiga penerang ke silik agi pasal Indu Gar Indu Takar Bangie Anak Embol ba Internet.

Bangie Anak Embol ari Sungai Kain Baleh, ada dalam taun 1945 udah bulih gelar Indu Gar Tenun. Gelar ti diberi ngagai orang ke diberi basa sereta diaku perintah Malaysia ketegal penteba baka ngembuan penemu enggau pengelandik ngasilka asil pengelandik jari waris pesaka bansa Malaysia. Kelimpah ari nya, ngemeran lalu ngerembaika asil pengelandik jari waris pesaka bansa, ngelatih pengawa ngasilka asil pengelandik jari ngagai nemiak rebak baru, sereta ngembuan kreativiti enggau inovasyon nyungkakka kualiti asil pengelandik jari waris pesaka bansa.



Pekara ti ngasuh iya ransing ngerembaika pengawa betenun laban pua kumbu tu pesaka bansa ti patut ditan lalu dikerembaika. Iya mega deka nyadi anda betenun ti pemadu nyulut sereta deka nyungkakka pengelandik jari orang Iban ngagai tikas ti tinggi ngambika nyadi penatai pemisi ke orang indu ba industri dagang. Pengeransing ati nyadika pengawa betenun ditan lalu dikerembaika ngagai nemiak rebak baru enggau orang ari menua bukai ngujungka iya suah ngatur bengkel enggau ngelatih orang ti deka belajar betenun. Pengelandik iya ngasilka asil pengelandik jari ti pemadu manah sereta ngembuan empas estetik ti tau ngalitka ati.

Sekeda ari buah pua ti ditenun iya baka buah Bintang Bekedara, ukir buah pua ari bungai enggau utai tumbuh baka Sempuyung Matahari. Iya mega ulih ngukir buah pua nitihka peminta orang ti deka meli pua kumbu. Nambahka nya, iya mega ulih ngasilka ukir buah pua kontemporari ti ngemuaska ati pemeli menua tu enggau ari menua bukai. Asil tenun ti digaga Bangie ngena ubung taya lalu bisi mega ubung sutera. Chura ti dikena nyura asil tenun ngena chura asal ari utai tumbuh enggau ngena chura sintetik ti senang diproses. Sekeda bansa asil tenun ti ditenun iya baka pua kumbu, selampai, pengias, kain kebat enggau sirat. Bangie udah mujur nyereta mayuh aktiviti enggau program ti bisi diatur perintah tauka gerempung luar ketegal deka mandangka pengawa betenun ngagai tikas antarabansa. Ba taun 1994–1995, iya nyadi pematih kelas betenun ti diatur Sarakup Indu Dayak Sarawak (SIDS) enggau Sarakup Dayak Sarawak (SADIA).

Kelimpah ari nya, iya mega nyadi pematih ngagai bala pelatih ba Kraftangan Malaysia. Bangie mega mujur nyereta pengawa pemandang bantai asil betenun ba dalam enggau luar nengeri.

Sekeda ari pemandang bantai asil nya baka nyereta chara betenun pua kumbu ba Ethnographis Museum, Sweden ba taun 1999. Nyereta pemandang bantai asil ba Paris, Bangkok, Manila, Singapore enggau endur ti bukai. Ba taun 1998, iya bulih lumur satu pekit nyura ngena chura asal pua kumbu ti diatur UNESCO di Bangkok.

Ba taun 2000, iya bulih gelar Indu Gar Indu Takar ari Gerempung Kraftangan Malaysia. Pemandai enggau pengelandik iya betenun balat narit ati mensia mayuh baikka peranak menua Malaysia enggau peranak menua bukai ti sama deka meli lalu ngibun asil tenun iya.



(Dibali ari: [http://www.kraftangan.gov.my/maklumat-kraf-2/tokoh-krafadiguru/?action=details&f\\_id=19](http://www.kraftangan.gov.my/maklumat-kraf-2/tokoh-krafadiguru/?action=details&f_id=19))

## AKTIVITI

1. Bacha teks di atas lalu ulihka penerang senentang penteba Indu Gar Indu Takar.
2. Ngena chara beraban, pansik lalu pindahka penerang ari teks ngagai kar sukung.

## LATIH

Saut tanya di baruh tu belalauka teks.

- a. Liska chura asal ti suah dikena nyura pua kumbu.
- b. Nama ajar manah ti patut ditunda ba Indu Gar Indu Takar tu?
- c. Nama penteba orang ke dikumbai Indu Gar Indu Takar? 🌸
- d. Baka ni pemujur Bangie tu ulih meransang nemiak rebak baru betenun? 🌸
- e. Ba penemu nuan, baka ni nuan ulih nyaup Bangie ngetanka pengawa betenun? 🌸



## Tibang Penemu

Indu Gar Indu Takar - Ngembuan penemu enggau pengelandik nengkebang asil pengelandik jari waris pesaka bansa.



## Aram Nulis

Jawai nulis siti emel nuju pangan iya Aruni di Kuala Lumpur. Apin lama ke udah Aruni bisi betanyaka asil pengelandik jari enggau fesyen ari pua kumbu. Tu emel ke dikirum Jawai nuju Aruni.

### New Message

To: aruni@friend.com.mu

Subject: Ngelansa penemuai ngagai program pemandang bantai asil pengelandik jari.

Aruni,

Tabi puji ngagai kita sebilik laban udah mujur muka kedai kraf. Betul endar utai ke ditanya nuan empai lama senentang asil pengelandik jari enggau fesyen ari pua kumbu. Ujung minggu tu tadi, aku bisi ngelawa program pemandang bantai asil tenun. Sekeda ari asil nya baka sarang pinsil, sekang buk, karung telefon enggau ti bukai.

Sekeda fesyen ungkup orang ke indu enggau orang lelaki ti dijait ari pua kumbu chukup manah dipeda lalu rega pen setipak. Sekeda ari fesyen ke orang indu baka baju gaun, selendang ubung sutera, lalu fesyen ungkup orang ke lelaki baka baju kot, tali sementing, tali kalar enggau utai bukai.

Nitihka dipadah Indu Gar Indu Takar, chura pua kumbu tu endang tak ari utai tumbuh baka renggat, engkerebai enggau akar penawar landak. Pua kumbu bisi nya chura mirah redam, mirah, biru, burak enggau kuning. Nya mih kebuah pua kumbu tu chukup dikerinduka orang mayuh kelebihan agi bala temuai ari menua bukai.

Asil pengelandik jari tu ke pengangkat penatai pemisi ngagai sida. Nambahka nya, ukir pua kumbu chukup ngalitka ati. Sekeda ukir pua kumbu baka ukir engkeramba, utai tumbuh, sereta jelu baka naga, kala, remaung enggau jelu bukai. Enggi ibu Bangie bisi ga ngaga motif kontemporari nundaka peminta orang kemaya hari. Nya alai, enti indai nuan ka bebeli asil tenun iya nadai salah betelefon ngagai iya empu. Naka tu dulu berita ulih aku tusi ngelansa ngagai nuan.

*Jawai*




## AKTIVITI

1. Baca emel lalu kerandauka pengeleboh ngenataika berita nengah emel dibandingka enggau surat pekirim rama.
2. “Asil pengelandik jari pengangkat penatai pemisi”. Pejuraika rambai jaku tu dalam raban. 🌸

## LATIH

1. Liska asil kraf ari selambar pua kumbu ke bisi dipeda Jawai.
2. Tuliska pengeleboh ngenataika berita nengah emel baka ke udah dikerandauka. 🌸
3. Nuan ngarika Aruni malas emel ngagai Jawai. Tuliska emel nuan. 🌸
4. Ba penemu nuan, nama asil pekayan ti ulih digaga ari pua tenun. Bantaika penemu nuan ngena kar kayu. 🌸
5. Dero siti fesyen ari selambar pua kumbu nitihka peragam ati nuan. 🌸
6. Tuliska nama asil tenun di baruh tu.





## Bungai Jaku



### AKTIVITI

1. Giga lalai entelah di baruh tu belalauka gambar.

Baya bisi nyawa tang enda nemu makai,  
Rabing bisi pending tang enda ninga utai.

Ulu lungga: tukup



Belia



Orang betenun

Nabau taja dipeda kekitau tang enda ga ulih mantuk,  
Paku taja puchuk begelung enda ga ulih ke lauk,  
Sawa taja iya beripa tang enda ga ulih ngamuk,  
Semina tinduk **ngelingkung** mandangka kulit ukir bekelikau.

Ulu lungga: udah luya

Kumang migai pedang ukai kena beperang,  
Tang kena **ngerandang** remang begagai,  
Jinap migai belalat ukai kena bepantap beguai,  
Tang kena madat ampang belulai.

Ulu lungga: rusa



Buah pua

Dara nganta muka empelua telengga tikup,  
Memunyi darup baya ngeradai,  
Dara nganta muka empelua telengga tikup,  
Munyi pangka bena pasang mulai.

Ulu lungga: takang entimun



Rakup

Tangkai jawa Jambai,  
Baka bungai bintang betabur,  
Tuchung bunga kenunsung,  
Chenung-chenung manah besepur.

Ulu lungga: tabin kesat



Kain kebat

Ditengkebang: Helen Manjan, 2016

2. Sadaka entelah ngena chara ti betul.

Kumang indu bantang,  
duduk lelenuk mentang lang di bilik lantang,  
ada ngeredunda Kumang Dara,  
ngaga kereja kar menua,  
mantaika semua pekara dunya,  
ke bisi di singka miga,  
jari jampat Kumang Jinap,  
udu penyampat, migai dajap pedang panjang,  
dinga pantap Kumang Sindut,  
temekup munyi darup baya butang,  
Dara Racha bekereja malam beganti siang,  
udah tembu pengawa Dara Sato,  
peda ada bechenagir mayuh macham,  
bisi gambar jelu, gambar antu, gambar Iban,  
bisi gambar utai tumbuh, gambar utai tanam,  
gambar flora fauna chukup engkeman,  
semua orang ke meda asil kereja Kumang Dara,  
sama tebelenga lalu teguran,  
temuai luar teperindang sereta gidan,  
meli selambar ke penabar mimpi rawan.

Ulu lunga: sabun kena bebasu

Ditengkebang: Helen Manjan, 2016

3. Terangka reti leka jaku tauka rambai jaku ti bechura biru.

ngelingkung

ngerandang

duduk lelenuk

bechenagir

tebelenga

teperindang

penabar mimpi  
rawan

4. Kelimpah ari ulu lungga ti udah diberi, giga ulu lungga ti bukai dikena ngelalaika saut entelah.





1. Tembuka entelah di baruh tu ngambika setipak patah enteli.



### Tibang Penemu

Enteli - Bunyi ba ujung leka jaku, rambai jaku tauka ayat ti sebaka.

Beukir baka antu, dikena muru ✎,  
Beukir begelung-gelung, baka paku tumbuh ✎,  
Beukir baya, naga enggau burung kenyalang ✎,  
Pesaka bansa chukup berega ✎,  
Nyungkak dagang penatai pemisi ✎.

di pendai

manah ditimpai

indu bansa kitai

terebai lemari

semangat jai

2. Patut tauka enda buah pua betukuhka kontemporari? Pejuraika.





## Jalai Jaku

Lebuh ngelawa program Pemandang Bantai Asil Tenun, dia Jawai enggau Menti bisi bulih peluang berandau enggau Indu Gar Indu Takar Bangie Anak Embol.

Jawai: Tabi puji ke nuan ini udah diberi gelar **Indu Gar Indu Takar**. Nyadi kami duai tu deka nanya nuan pasal pengawa betenun kelebih agi ukir buah pua kumbu enggau perengka dikena ngaga chura.

Bangie: Tabi basa ke seduai uchu, nadai nya salah dih uchu. Aku sigi rindu bekunsi penemu pengawa nenun.

Menti: Kendua ka nemu, nama bansa ukir buah pua kumbu ti bisi digaga nuan ini?

Bangie: Mayuh macham buah pua kumbu ke udah digaga aku uchu. Aku nadai kala neladan ukir tang **nengkebang** kediri ari mimpi sereta nitihka peminta orang ke ka meli. Sekeda ari **buah pua kumbu** engku iya nya Batang Bindang Besembah Kandung Nibung Berayah Patah Kelinah Pemandang Kumang Tampak Belaki. Bisi mega chura mensia baka Kara Merayung Nanga Panggau.

Menti: Oh pia, engkami bisi kain kebat ke **pesaka** diberi niang ini aku suba bisi bechura baka mirah, chelum, biru. Nama dikena nyura kain tenun dih ini?

Bangie: Kereban dikena nyura iya nya, utai tumbuh baka engkerebai, engkudu dichampur enggau kulit kayu jangau, daun renggat tauka tarum sereta bisi ngena akar penawar landak ti ngasilka chura kuning. Chura asal tu enda **tusur** uchu.



- Jawai: Oo, patut mih chura pua kumbu engkitai manah dipeda. Kumbai aku bisi ngena chura ke dibeli ari pasar.
- Menti: Terima kasih ini, kami ngarapka nuan terus mujur ngerembaika pengawa betenun. Bisi maya ila kami arapka nuan ulih ngenataika diri meri bengkel ba sekula kami.
- Bangie: Au, nadai nya salah uchu. Tu lumpit mit digaga aku beri aku ke seduai, ke tanda pengingat. Aku arapka seduai ila uchu belajar betenun lalu sama ngenanka pemanah asil pesaka bansa kitai tu.
- Jawai: Apu, manah amat lumpit tu ini. Aku meli tali kalar tu siti ke apai aku ke pemeru hari pengada iya.
- Menti: Terima kasih ini ke pementas sereta tabi puji ngagai nuan ke udah bulih gelar Indu Gar Indu Takar. Mupuk dulu kendua.
- Bangie: Sama-sama uchu, ngarapka seduai jemah ila nampung pengawa betenun ke pesaka bansa kitai.

### AKTIVITI

1. Keluluka randau nya enggau pangan nuan dalam kelas.
2. Giga lalu tuliska jaku ganti nama ti bisi ditemu dalam teks di baruh tu.

Jaku Ganti Nama Orang Kesatu	Jaku Ganti Nama Orang Kedua	Jaku Ganti Nama Orang Ketiga	Jaku Ganti Nama Orang Pengempu
Aku			
			
			

### LATIH

Saut tanya di baruh tu.

1. Nama tuju Jawai enggau Menti ngerandau Bangie?
2. Nama kebuah ukir buah pua Bangie ngembuan pemanah ti tinggi? 🌸
3. Terangka reti leka jaku di baruh tu:

Indu Gar Indu Takar

nengkebang

buah pua kumbu

pesaka

tusur







4. Nyema nuan nyadi Menti enggau Jawai, nama agi pekara bukai deka dikerandauka enggau Bangie. Sambung randau nya tadi nitihka penemu nuan. 🌸

**SERIDI**


1. Giga lalu tuliska bansa chura enggau kereban nyura di baruh tu.


R	E	N	G	A	T	Z	X	C	V	B	E
B	T	Y	U	B	N	V	U	S	G	E	N
V	C	H	E	L	U	M	T	X	B	G	G
K	E	D	C	B	H	J	K	U	Y	Z	K
R	T	Y	U	Q	W	E	D	K	F	G	E
E	N	G	K	U	D	U	B	K	D	F	R
G	I	G	G	J	L	L	U	R	M	A	E
B	X	H	V	G	N	N	I	T	I	H	B
T	J	A	Y	U	I	B	G	S	R	T	A
M	K	Z	I	N	K	E	B	A	A	Q	I
E	S	T	G	R	F	G	D	X	H	A	P
J	A	N	G	A	U	H	H	G	P	M	I

2. Isi endur puang di baruh tu ngena leka jaku ti betul.

- Asil tenun ti dikena nyadi ngepan orang indu iya nya .
- Temuai ari menua bukai rindu bebelika  nyadi pengias bilik.
- Ukir buah pua ari  ngayanka ukir ti begelung-gelung baka paku, tubu enggau wi.
- Ukir buah pua ngena motif  suah agi ngayanka ukir baka burung Kenyalang, ular, naga enggau rimau.
- Buah pua ti ngayanka ukir  dipechaya ulih muru semengat jai ari ti ngachau utai tanam enggau orang rumah panjai.
- Bangie nyura asil tenun ngena chura asal ari utai tumbuh baka .








g. Utai tumbuh baka akar penawar landak dikena ngasilka chura      .







h. Jawai meli  ke pemerri hari pengada ke apai iya.

i. Sekeda ari fesyen pekayan ari selambar pua kumbu ungkup orang ke indu iya nya      .

3. Giga leka jaku ti belaban reti enggau leka jaku di baruh tu.

Leka jaku	Belaban reti
Manah	 <u>    </u>
Mayuh	 <u>    </u>
Dikerinduka	 <u>    </u>
Chelum	 <u>    </u>
Meli	 <u>    </u>

4. Gaga ayat dikena ngenataika bida reti leka jaku homograf di baruh tu.

Kala	 <u>    </u>
	 <u>    </u>
Peti	 <u>    </u>
	 <u>    </u>
Mali	 <u>    </u>
	 <u>    </u>

**PENGAYA**

1. Tuliska fesyen pekayan ti ulih digaga ke orang lelaki ari selambar pua kumbu.
2. Tulis siti karang pandak senentang baka ni ngerembaika fesyen pekayan ari pua tenun.



# UNIT 6

## Ngepan ke Tanda Identiti Iban



Raban indu bansa Iban ngena ngepan asal.



Sementing tauka nyawir siti ari bansa ngepan ti dikena bala indu ba punggung.



Ngepan ti dikena nyambut penatai pengabang lebu ngintu pengerami.





Kain ti dikena indu maya ngena ngepan dikumbai kain tenun tauka kain kebat.



Baju burung selalu dikena orang lelaki lebuah ti bisi ngintu pengerami.

Bansa Iban endang beberita ngembuan pesaka lama ti ngayanka identiti bansa. Asil pengelandik jari baka ngepan nya siti ari pesaka bansa ti ulih mai penguntung ekonomi menua kitai. Ngepan mega siti ari elemen unik ti dikembuan bansa Iban kenya ari kelia menya.

Ni maya pengawa ngena ngepan suah dibantaika?

Baka ni kitai ulih ngetan sereta nyeridika pengangkun ati ke ngepan bansa diri?



Sekeda ari bansa kain tenun enggau kain kebat.



Baju burung ti ditunen bemotifka orang.



## Aram Mending enggau Bejaku

Menti seduai Jawai bisi ngulu pengerami bejalai bebala mayuh pra gawai ti bisi diatur ba menua sida. Peratika randau seduai di baruh tu.

Peda nuan nya, manah endar ngepan dikena sida.

Iya mih, ni raban sekula kitai dih?

Au ga, enggi sekula kitai manah mih ngepan dikena bala sida.

Rindu amat aku meda semua sida ti ngena ngepan nya.

Amat ga, ari sekula sekondari Matop Jaya sida nya. Peda nuan plat sida.

Nyin raban sekula kitai, takah tiga baris agi. Peda nuan nyin Jingan dih.

Amat nih, ngaku endar bala sida ngena ngepan.

Sekula kitai tiap-tiap taun bisi enggau orang pekit bejalai bebala mayuh baka tu. Taun nyin kemari kitai enggau lalu bulih lumur satu dalam kategori sekula sekondari.





## AKTIVITI

1. Keluluka randau nya tadi.
2. Betanya saut pasal ngepan ti dikena orang bejalai bebala mayuh dalam gambar nya tadi.

## LATIH

1. Ngena chara beraban, giga nama perengka ngepan ti dikena orang lelaki enggau orang indu.



2. Kemaya kitai selalu mandangka ngepan asal?
3. Tusui peneleba nuan meda orang ngena tauka enggau orang ngena ngepan.
4. Ba penemu nuan, nama pemanah kitai enti bekenaka ngepan lebh mayu bisi pengerami? 🌸
5. Ngena chara beraban, pejuraika chara kitai ulih ngenanka pengawa ngena ngepan. Uдах nya, bantaika ba mua kelas. 🌸



Peratika gambar lalu bacha teks di baruh tu.

### Sirat

Siti ari ngepan ti dikena sida ke lelaki bansa Iban menya iya nya sirat. Sirat ukai semina dikena diau besehari-sehari, tang mega dikena lebu mayaya nurun ngayau, mayaya enggau pengerami gawai enggau pengawaritual ti bukai. Sirat digaga nitihka pemesai selangkuh tubuh orang ti ngena iya.

Orang ke lelaki mega bisi ngena kain chelum nyadika sirat. Enti sida ngena kain chelum nyadika sirat, ba ujung kain nya dilekatka sida ngenamarik, kerubung tekuyung mit enggau gerunung. Sida ke lelaki suah ngena kain sirat ti bechura chelum lebu mayaya bisi penusah tauka pemat.

Dulu kelia bansa Iban selalu ngena asil babas dikena ngaga gari baka sirat, kain enggau pua kumbu. Sirat digaga ari kulit kayu tekalung. Kayu tekalung dititi ngulihka kulit iya. Sebedau ulih dikena nyadika gari, iya dulu ditenchang alus-alus ngena pemalu temeran dataika nyau besabut.

Kelimpah ari temeran kulit kayu tekalung, kain asil tenun mega tau digaga nyadika sirat. Kain tenun ti bechura pirang selalu agi digaga nyadika sirat. Lebu mayaya orang deka berengkah nenun kain sirat, sida ngaga chura bungai nitihka guna orang ti deka ngena iya. Orang ti nenun kain nya mega enda sengapa ngaga chura. Sirat ti dikena orang ngayau tauka begawai dulu kelia bechura mirah tauka pirang tuai.

Lebu ti berengkah deka nenun kain sirat, tukang tenun sigi deka besampi tauka miring dulu. Sekeda ari kereban ti dikena ngaga kain tenun iya nya pemalu taya ti dikena malu kapas sebedau digagaka ubung. Urat engkudu enggau kulit sebangki ulih dikena ngaga chura enti iya udah diproses. Sepengudah kain nya tembu ditenun baru iya tau dikena nyadika sirat.

Kemaya hari tu sirat selalu dikena lebu bisi ngintu pengerami begawai, nikah, ngelaluka penatai pemesai enggau pengerami ti bukai. Sida ke lelaki endang dipeda sigat bendar enti lebu udah begari ngena sirat enggau kereban ngepan ti bukai. Nya alai nemiak rebak baru patut bisi runding ngemeran sereta angkun ngena sirat lebu ngintu pengerami.



Lelaki Iban ngena ngepan.



Sirat.



### Tibang Penemu

- 4 bansa sirat:
- sirat kanggan
  - sirat belachu
  - sirat kesumba
  - sirat tekalung

## AKTIVITI

1. Betanya saut senentang pekara dalam teks dikena ngulihka penerang.
2. Pejuraika senentang guna sirat ba daya idup bansa Iban. 🌸
3. Rintaika sekeda kereban ti bisi dikena ngaga sirat.

## LATIH

1. Padahka reti sirat.
2. Bandingka sirat kelia enggau sirat diatu ngena kar gelembung. 🌸
3. Ba penemu nuan, nama kebuah bansa Iban enda agi ngena sirat maya diau besehari-sehari? 🌸
4. Kerandauka ngena chara beraban baka ni chara kitai ulih ngemansangka pengawa ngaga sirat. 🌸



**Bacha leka timang di baruh tu.**

## Leka Timang Lelaki Ngena Ngepan

Angkat Pelima Kaya Bandar Lang, lalu begari,  
Melitka sirat kabu iku rerundu,  
Baka iku kekalau kumpang.

Udah nya lalu dipasukka iya baju gagung,  
Kulit tegung remaung lubang.

Ditangkupka iya ketapu linga-lingu,  
Ujak bulu belayau lelang.

Ba lengan iya dipasukka iya simpai rangki,  
Sepiak siti, sepiak siti landai penulang.

Ba betis iya, dipasukka iya,  
Engkerimuk, baka ikan kelemujuk mati nelentang.

Lalu diselat iya enggau unus bagus,  
Pit ari runut aping pengerang.

Udah nya, ditangkin iya badi andai,  
Pengelempai bangkai bukung bejagang.

Udah ditantai iya terabai,  
Ukir jarai-jarai lantang di gelang.

Udah nya dipelawikka iya ke belakang,  
Ma buta beburit jarang.

Semua ngepan udah chukup nyenganan,  
Dikena Pelima Rekaya Lang Buban,  
Nadai ke timpang.



(Diambi ari: *Lemambang Bugan Anak Igang, Ngepan Asal Iban (Lambar 57), Jimbun Tawai, Yayasan Kebudayaan Sarawak & Majlis Adat Istiadat Sarawak*)



## AKTIVITI

1. Dingaka leka timang tadi.
2. Sadaka leka timang ti udah didinga nuan ngena intonasyen ti betul.
3. Betanya saut senentang isi leka timang.
4. Kelala bansa ngepan ti bisi dalam leka timang nya.
5. Kerandauka ngena chara beraban kebuah bansa Iban enda agi ngena ngepan besehari-sehari. Uдах nya, bantaika asil randau nya ba mua kelas.

## LATIH

1. Kelala bansa ngepan lelaki ti bisi dalam gambar di baruh.



2. Tusun ngena jaku nuan empu ripih proses ngena ngepan ba leka timang di sepiak.
3. Ba peragam ati nuan, baka ni gamal lelaki enti udah dipasukka ngepan penuh? 🌸



Peratika leka timang di baruh tu.

## Leka Timang Indu Ngena Ngepan

Angkat bini Pulang Gana Tunggul Manding,  
Ada masukka kain tating,  
Dinga nyau bekesering,  
Munyi indu naning meling lubang.

Dipasukka iya rawai rinyai,  
Enggi bini Pulang Gana Serangkang Kirai,  
Peda tak badas lebai-lebai,  
Nungkat kerigai rusuk marang.

Dibelitka sabit pirak,  
Peda badas berak-berak,  
Baka ke baru ulih matak ari selepak batu karang.

Ada dipasukka iya tumpa bala, lama ngena,  
Nanggam di tapa, jari besirang.

Didudukka iya ensuga tisir,  
Baka engkerejak tiang empang.

Ditandu iya enggau tangu,  
Ngebap tandan bau nukang.



Dilempaika iya selampai,  
Badas kekepai nurun belakang.

Ada dipasukka iya baju buri, tak bekecheli,  
Baka leka asi, tampi pengabang.

Ada dikena iya kenawing pending,  
Tampak perenching,  
Baka mata hari nungging, bekalih petang.

Semua keresa udah sedia,  
Dikena bini Pulang Gana,  
Timpang nadai ke timpang.



(Diambi ari: *Lemambang Kanyan Anak Maja, Ngepan Asal Iban (Lambar 37), Jimbun Tawai, Yayasan Kebudayaan Sarawak dan Majlis Adat Istiadat Sarawak*)

## AKTIVITI

1. Dingaka leka timang di atas.
2. Sadaka leka timang ti udah didinga nuan ngena intonasyen ti betul.
3. Kerandauka senentang isi leka timang.
4. Kelala bansa ngepan ti bisi dalam leka timang nya.

## LATIH

1. Gaga kar gelembung senentang perengka ngepan ti dikena indu.
2. Ba peragam ati nuan, baka ni pemajik kumang ti bengepan penuh? 🌸
3. Ba penemu nuan, baka ni chara kitai nanam pengerindu nemiak rebak baru ngena ngepan maya bisi ngintu pengerami? 🌸



## Bungai Jaku

Peratika entelah di baruh tu.



Lalu angkat endu teruna,  
Dara Jawai minching perapang pedang panjai,  
Mai belembang **badi andai**,  
Deka ngeluntang batang lamba mikai,  
Setaun-taun sebulan mingkai.

Anangka lamba kayu mikai deka parai lalu tumbang,  
Ngasuh puchuk iya ngenjing bekerayuk mansang besai,  
Daun ngenjing nyelebumbun lebat amai,  
Bebungai ke **gemala** mau urai,  
Ke begamal lebai-lebai,  
Lalu diambi Keling seduai Sempurai,  
Kena tembai malut tangkai igi balang.

Lalu angkat Kumang seduai Lulong,  
Minching perapang pedang bejengkung,  
Mai belembang **rutan** segelung,  
Deka ngeluntang batang tapang betenung,  
Setaun-taun sebulan kembang.



Anangka lamba **tapang** betenung deka putus beluntang,  
Ngasuh puchuk enggi iya ngenjing bekerayuk,  
Balat chundung ditepan **renyuan** madu midang,  
Bebuah naka pemanah baka tekang gempang mau raung,  
Ke begamal jindung-jindung penudung pandung,  
Mandang serungkung bala pengabang.

Menua:  
Nyadi menua iya di sadau baka kubau Raja Melayu,  
Di bilik baik baka tasik Nanga Bintulu.  
Ulu lungga: Kayu ambun lama punggu.  
Saut: Indu nenun pua kumbu.

(Dibali ari: *Entelah Iban – Tusun Kesatu (Lambar 6) Boniface Jaraw Serit, Borneo Literature Bureau - 1967*)

## AKTIVITI

1. Peratika struktur entelah di atas ari segi:

lalai

menua

ulu lungga

2. Kerandauka ngena chara beraban isi enggau saut entelah nya tadi.
3. Ba penemu nuan, nama guna entelah ba pengidup kitai Iban? 🌸

## LATIH

1. Terangka kaul leka jaku di baruh tu enggau guna iya ba kitai mensia. 🌸

badi

gemala

rutan

tapang

renyuan

2. Tuliska tiga iti entelah pandak ke udah ditemu nuan. 🌸  
Chunto:

Asi mansau periuk pechah.  
Ulu lungga: Suah merening.  
Saut: Buah kemunting.



Peratika teks di baruh tu.

### Ngetanka Guna Gagung

Kemaya hari tu, mayuh kitai enda kala meda gagung tauka baju ke digaga ari kulit jelu siga ti dikena aki ini kitai dulu kelia. Nitihka jerita tuai, gagung **suah** dikena kitai bansa Iban kelia maya nurun ngayau mulau menua. Tang kemaya hari tu orang selalu ngena iya lebuch ngulu pengerami gawai.

Menya ngepan tu ukai dikena ninting hari tauka dikena sengapa, semina orang ke deka nurun ngayau, orang ti kering, berani sereta tampak rita aja ke ngena iya. Gagung digaga ari bulu tauka kulit jelu siga baka jelu jugam ke **tusah** digaga laban jugam jelu ke **kering** sereta **mangah agi**, nya alai sida ke bisi baju tu endang kering sereta bisi pengaruh.

Kelimpah ari nya, ngepan tu disempulang enggau taring jani. Baju gagung **jarang** dipeda laban nyau mimit kitai Iban agi bisi ngembuan ngepan tu. Diatu, orang **rindu** bekenaka baju burung laban **nyamai agi** digaga kelimpah ari mayuh dijual ba sebelah pasar. Nya alai, mayuh nemiak baru bisi nya enda kala meda baju gagung laban orang **selalu agi** ngena baju burung maya ngulu pengerami baka melah pinang tauka maya ngintu Hari Gawai.

Nangika pekaru tu majak nyadi, siku kitai bansa Iban bisi ngemeranka pengawa ngaga baju gagung ti ngembuan tuju meransang nemiak rebak baru sama ampit penemu enggau pengerindu pasal baju gagung. Sammy Ngelambai, siku anak bansa Iban ba sitak menua Sibul ti ngemeranka pengawa ngaga gagung nengah jalai dagang. Iya berengkah ngaga ngepan tu **kenyau ari** taun 2004 suba. Nya kebuah, iya madahka siti ari chara ngasuh nemiak sama bela nemu pasal ngepan tu, iya nya ari ti ngaga baju gagung nyadika asil pengelandik jari lalu dijual ngagai orang mayuh.

Asil ari pengawa pengelandik jari iya ti ngaga baju gagung, **mayuh** orang meli baju nya ari iya nyengkaum bala temuai ke bisi datai ari menua luar. Sida ti meli baju gagung nya dikena nyadika tanda pengingat enggau dikena maya bisi ngintu pengerami.





Sammy madahka, baju gagung **suah agi** digaga ari kulit jelu kambin bansa Jamnapuri. Kulit kambin ti dikena iya ngaga gagung tu **pemadu besai** enti dibanding enggau bansa kulit kambin menua kitai. Kenu ku iya, kebuah ti enda ngena kulit jelu siga ngaga gagung laban jelu siga diatu udah kena lindung undang-undang penyaga jelu siga.

(Dibali ari: <http://www.theborneopost.com/2010/10/14/gagong-perengka-ke-beguna-ba-bansa-iban/>)



### Tibang Penemu

Jaku banding dibagi ngagai tiga kategori:

1. Jaku banding selama
2. Jaku banding komperatif
3. Jaku banding superlatif

### AKTIVITI

1. Kerandauka teks nya tadi.
2. Kelala bagi leka tauka rambai jaku banding ti bechura biru.
3. Liska jaku banding ti ditemu nuan nitihka kategori.

### LATIH

1. Giga leka tauka rambai jaku banding ti bukai.
2. Padahka baka ni chara meransang orang ngena gagung maya bisi pengerami? 🌸
3. Ba penemu nuan, nama bansa kereban bukai ti ulih dikena ngaga gagung dikena nganti kulit jelu siga? 🌸
4. Terangka ukur pemanah ti bisi di temu nuan dalam teks tadi. 🌸



## PENGUKUH

### SERIDI

1. Isi endur puang ngena jaku banding ti engkeman dalam ayat di baruh tu.

a. Lebu ngintu pengerami gawai, nya maya orang ti  ngena ngepan asal bansa Iban.

mayuh

mayuh agi

pengabis mayuh

b. Orang ti ngena baju gagung  gamal enti dibandingka ngena baju burung.

kering

kering agi


pemadu kering

c. Aku  meda orang nyual perengka ngepan ba makit pasar nya.

suah

suah agi

pemadu suah

d. Sirat Ngelai charik laban tekait ba paku lawang, tambahka simpai iya lenyau nya ngasuh iya  ati.

tusah

tusah agi

pengabis tusah

e. Industri ngepan asal Iban ulih  enti promosyen pasal pekara nya dikerekaika agi.

nyungkak

nyungkak agi

pemadu nyungkak

f. Sirat ke dikena Adon  antara bala penyereta Pekit Keling Gawai taun nya.

panjai

panjai agi

pengabis panjai

g. Rega ngepan marik empang  ba kedai gari asal nya ketegal gerinek iya genap sereta manding.

mar

mar agi

pemadu mar

h. Pekara pasal ngepan asal bansa patut diajar ba sekula awakka nemiak  pasal nya.

nemu

nemu agi

pemadu nemu



2. Tulis nama ngepan nitihka gambar di baruh tu.



a. \_




b. \_



c. \_



d. \_



e. \_



f. \_



g. \_



h. \_



i. \_

**PENGAYA**

Siku pangan nuan ti enda sama bansa ari sekula bukai minta penemu nuan senentang ngepan asal bansa Iban ngambika ulih dikena iya lebu nulis karang. Tulis surat pekirim rama ngagai pangan nuan nya. Kunsika enggau iya senentang penemu nuan pasal ngepan asal bansa Iban.



## Ubah Klimet



Klimet nya jaku nama ke diinjau serap ari jaku English iya nya *climate*. Reti jaku klimet nya gaya hari baka kesuh pengangat, ujan, panas, pengerangkai enggau pengembap kandang angin enggau ke bukai dalam timpuh ke panjai iya nya setaun tauka lebih.

Ubah gaya hari enda baka selama. Taja pan pemanjai siti-siti musin agi baka selama tang fenomena kudi baka bah besai enggau pengangat hari ekstrim ari selama. Chunto iya, magnitud bah nyadi lebih besai lebu musin ujan lalu magnitud pengerangkai ekstrim lebu musin kemarau. Beduduk ari nya risiko ke deka ditapi mensia mega majak nambah. Ukai semina deka meri empas ngagai reta tengkira tang mega pengelikon nyawa mensia. Semua pekara tu endang bepun ari fenomena pengangat global.





Pengangat global ngenyampatka sungkak kesuh pengangat dunya lalu ais ba kutub dunya lela. Berindik ari nya, tikas ai tasik deka niki lalu ngujungka kudi bah besai nyadi. Nya kebuah semua mensia patut betatika tanggung pengawa mentin fenomena pengangat global tu terus nyadi. Aktiviti pemansang patut diatur ngena chara ti efektif awakka enda meri empas ke negatif ngagai pengelikon klimet dunya.



Nama penyadi enti isu klimet ke tau mai penusah enda diputarka?







## Aram Mending enggau Bejaku

Audio 8:



Tekang ais ba Tasik Artik belabuh lela sereta pechah lalu dijangka abis dalam kandang beberapa dekad deka datai laban pengangat global.



Tasik nyadi ba atas tekang ais Greenland ke majak mipis bepun ari pengangat global.

Pengangat global nya situasyen ke alai kandang menua nerima penambah kesuh pengangat ke tinggi bebanding enggau kesuh pengangat normal. Nya kebuah maya malam mega kitai deka ngasaika pengangat. Pekara tu nyadi endang bepun ari ulah mensia baka berimba kampung, aktiviti industri, nunu sechara tebuka, asap kereban pengangkut, aktiviti pemansang enggau ke bukai.

Penyilap mensia ngagai rampa menua meri mayuh empas negatif. Iya ke pemadu nampak endar diatu iya nya pengelela ais ba Kutub Utara ke majak balat, peninggi paras ai tasik lalu pemesai saiz kandang darat dunya ke majak mit. Kelimpah ari nya mega, suah nyadi kudi menua baka kemarau, bah enggau angus. Raban sains enggau geografi sepenemu madahka pengangat global balat bepun ari lapis ozon ke majak mipis berindik ari penambah pemansut gas klorofluorokarbon (CFC) ngagai kandang atmosfera dunya. Isu pengangat global nyadi ketegal mayuh bengkah faktor. Kelimpah ari lapis ozon ke majak mipis, fenomena kemarau enggau sebun, pulau haba, ujan asid enggau empas rumah gadung mega meri sungkak ngagai isu pengangat global.



### Tibang Penemu

Global - Ngerakai nadai sekat.



## AKTIVITI

1. Kerandauka pekara ke baru udah dipendingka kita ari teks nya tadi.
2. Isu nunu uras ngena chara tebuka majak nyadi. Pejuraika chara dikena nyekat pekara tu ari majak nyadi. Bantaika asil jurai kita dalam kelas.

## LATIH

1. Belalauka penerang prosedur mina enggau gambar uras di baruh tu, gaga aktiviti ngena chara beraban:
  - a. Pengawa nunu uras ngena chara tebuka nyadi siti faktor pengangat global. Baka ni chara mina uras baka dalam gambar.
  - b. Bantaika asil pengawa kita dalam kelas.

Kelala bansa uras

Pilih uras

Seraraka uras

Disimpan kemas

Dikitar baru

Engkah ba endur ke patut ngambika digumpul.



2. Kelimpah ari ke ngelipakka pengawa nunu uras sechara tebuka padahka sekeda chara bukai patut dipraktikka dikena nyekat pengangat global.
3. Ba penemu nuan, naka ni penyedar mensia mayuh pasal pengawa mina uras? Terangka kebuah. 🍌



### Tibang Penemu

Dikitar baru - Teknik meproses kereban ke udah dikena baka kacha, pelastik, besi, keretas enggau ke bukai ngambika tau dikena baru.





## Bacha teks di baruh tu.

Pengawa ke ngena kereban api fosil enggau penumbuh industri ari menya udah ngeluarka mayuh bansa gas, kelebih agi karbon dioksida, iya nya siti ari gas rumah gadung ke merabat nekat pengangat pansut ari kandang atmosfera. Pengawa berumpangka kampung mega nambahka pematat penanggul tu. Kayu gadung nyerap gas karbon dioksida dalam ruang angin lebuah iya bejalaika proses fotosintesis.

Pengangat global deka ngubah gaya hari dunya. Penambah tikas pengangat dunya udah ngenyampatka pengelela ais ke mungkur kutub utara enggau kutub selatan dunya. Pekara tu deka meri penanggul ngagai mensia enggau jelu ke bisi nguan menua ba genturung semak tasik tauka sungai laban napi penusah ketegal bah besai.



Asap kerita



Kereja batang



Nunu babas chara terbuka




Asap kilang

## AKTIVITI

1. Kerandauka kaul antara teks enggau gambar.
2. Bandingka penerang teks enggau gambar.

## LATIH

1. Terangka nama penyadi enti:
  - a. Pengelela ais ke mungkur kutub utara enggau kutub selatan dunya majak nyadi. 🌸
  - b. Mensia majak ngena kereban api fosil enggau nunu uras tauka kampung sepeneka ati. 🌸
  - c. Mensia majak berumpangka kampung. 🌸
2. Gaga siti karang bepelasarka kar gelebung di baruh tu.





## Aram Macha

### Peratika penerang pasal pengangat global di baruh.

Pemansang menua majak nyungkak ari sehari ke sehari. Taja pia, kurang bendar mensia betatika aktiviti pemansang ke dipejalaika nyadi siti batang faktor ke ngenahka fenomena pengudi menua. Siti ari fenomena kudi menua ke nyadi isu nasional diatu iya nya bah tunggal. Faktor dominan penyadi bah tunggal iya nya ulah mensia ke lebih ngemeratka pemansang modenisasyen dibandingka enggau pengangkun ke kualiti rampa menua. Pengawa ngerumpang tanah kampung endur nudukka pemansang enggau ngaga rumah udah nagang aktiviti nyerap ai ujan. Ai ujan ke enda diserap tanah deka bedujuh rarat ngagai sungai tauka lupak ke ngujungka penyadi bah tunggal.

Kelimpah ari nya, chara bumai betanam ti enda sistematik sereta digaga ba kandang menua bebukit mega bepotensial ngasuh bah tunggal nyadi. Menua bebukit ke dikelitika deka ngujungka pengerarat ai jampat agi bedujuh napatka sungai, lupak tauka lebak. Ukai semina nya aja, tanah tusur mega tau nyadi laban urat kayu ke bempu pengawa nanggam lalu ngetanka tanah udah nadai agi. Nangkan ke nya, ulah mensia ke ngambi jalai muntang bebuaika uras ke sungai mega nambahka risiko penyadi bah tunggal. Uras ke majak mayuh semayuh betakat deka ngempang pengelancar pengerarat ai. Nya kebuah enti lebuah ujan sangat sungai enda ulih nerima isi ai ke belebih. Pekara tu deka ngujungka genturung menua ke semak sungai deka ampuh laban bah tunggal.





Ukai semina nya aja sistem pengerarat ai ke enda befunngsyen mega tau ngasuh bah tunggal nyadi. Ulah mensia ke enda beradat ba genturung pendiau ke muai uras ngagai parit ngujungka arus pengerarat ai betekat. Tambah mega sida endang nadai inisiatif deka ngelasi sereta meresi parit ke ngujungka risiko diampuhka bah tunggal besai agi.

## AKTIVITI

Pindahka penerang ari teks di atas ngena chara nembuka penerang ba grafik di baruh tu.



Bepun ari

1.  —
2.  —
3.  —
4.  —

## LATIH

1. Padahka empas bah tunggal ngagai mensia. 🌸
2. Pengawa meresi parit enggau sungai enda patut dilempaika ngagai perintah aja. Pejuraika pekara tu lalu bantaika asil jurai kita dalam kelas. 🌸





## Aram Nulis

Peratika penerang pasal chara nyekat pengangat global ba gambar di baruh tu.



Nanam Kayu



Betatak Ngena Petrol



Anang Nunu Chara Tebuka



Program Barang Guna Baru



## AKTIVITI

1. Tuliska ayat topik kita dikena nangkap topik chara nyekat pengangat global.
2. Pejuraika empas pengawa ke numbhuka kebun bedandang besai. 🌸



## LATIH

1. Gaga siti genteran karang ngena ayat topik ke udah digaga. 🌸
2. Nama penemu nuan pasal pengawa betebangka kayu enda beradat? 🌸



3.3.4



## Aram Nulis

**Peratika ayat dikena ngenataika pengasai ati di baruh.**

1. “Aku” enda tentu pengerai lalu mensia enda tentu ibuh.
2. “Aku” majak merinsa, tang mih sabak enggau serebana enda kala diperatika anak mensia.
3. Kayu ke tumbuh ba “aku” terus dikereja bala anak mensia.
4. Kayu ke mungkur mua “aku” seruran kakai-kakai laban dikelanit, disimpung sereta direda anak uda.
5. “Aku” bisi nerima gas kamah ke ngalitka ruang angin.
6. “Aku” semampai sengkak, bejarit alit seput nerima kebo gas berachun.
7. Enti mensia enda mayuh peduli, nadai pan “aku” tan.
8. Mensia majak ringga, enda betati nadai peduli, “aku” berasai kirat sekirat, pedis endar tu enda alah tat, enda lama da nadai “aku” muat nyadi penyanding pengidup mensia.

### **AKTIVITI**

1. Kerandauka reti enggau bansa ayat emotif.
2. Pilih ayat emotif di atas lalu padahka kebuah nuan milih nya.

### **LATIH**

1. Sapa “Aku” ba tiap ayat di atas?
2. Padahka siti bansa gas ke tau ngasuh aku alit seput?
3. Ba penemu nuan terangka kebuah anak mensia enda bedulika serebana aku? 🌸
4. Tulis siti emel jaku emotif ngagai siku pangan nuan dikena ngenataika pemerinsa laban sebun asap. 🌸



### **Tibang Penemu**

Emotif - Asai ati sekalika chukup gaga, tusah, ringat enggau pedis.





Peratika leka pelandai di baruh tu.

## Penyadi Nitihka Musin

Aih ...,  
Idar pengidup mensia mega nitihka musin,  
Musin *winter*, *spring*, *summer* enggau *autumn*.  
Musin *winter* musin chelap,  
Nerantingka runding, ngangkatka semengat,  
Menyadika strategi, nusun rapat,  
Nyediaka inta, ngaduka penabat,  
*Winter* lesap, *spring* ngerambang datai.

Aih ...,  
Musin *spring* musin bunga,  
Tampai datai, kelala perua,  
Mansa niat dikereja, tulang dipelada,  
Mansa besembahka tanah,  
bebudi enggau dunya.

Samai igi entekai, seridi igi padi,  
Tanam igi semangka, enti musin tu tulang enda diansah,  
Peluh enda disimbah, pemagas enda diruah,  
Lagi datai musin panas kelalah,  
Kada enda kitai keberuran papah, aus kelah-kelah,  
Di rumah di tanah ngasaika penusah,  
Bemacham utai sereba dikenadai.

Musin *autumn* musin ruruh,  
Musin bekisuh balat kiruh,  
Musin darah tesimbah, peluh merebujuh tesiuh,  
Ti mansa tu enda cheremat, enda puh,  
Nadai nyimpan, nadai naruh,  
Ke penabat, pesindang tubuh,  
*Winter*, enda jauh, seleju nyau ka labuh,  
Lagi beengkuh-uh, bekakai-indai,  
Kekalai ka parai, keberuran enda makai!



(Dibali ari: *Janang Ensiring*, 2010, "Penyadi Ngikut Musin",  
*Dunya Tu Panggau Pengelulu, Kuching: Lee Ming Press Sdn. Bhd, Lambar 63*)

## AKTIVITI

1. Pending enggau lenak leka pelandai nya tadi.
2. Betanya saut pasal pelandai nya.
3. Sadaka leka pelandai nya ngena intonasyen ke engkeman.

## LATIH

1. Maya musin ni mensia lebih agi begunaka pengering tulang? Terangka kebuah.
2. Nama penyadi kitai ba musin ruruh enti enda besedia?
3. Padahka tiga iti rambai jaku betukuh ajar manah dalam teks leka pelandai nya tadi.
4. Ba penemu nuan, patut tauka enda leka main pelandai tu ditanka dalam budaya idup? Terangka. 🌸
5. Tembuka leka pelandai di baruh tu ngena leka jaku ke engkeman. 🌸

Musin landas ngenataika leman macham ✎,  
Mensia tasah tegal menua duju ai pendiau ampuh bah,  
Semina bedaya mindah, beselalat, kekalat laban ✎,  
Pengawa mayuh tepagang, kisuk betulung besah-sah,  
Berasai sayau betatika padi dialunka ai raya, ngujungka ✎,  
Kereja getah enda ibuh telah, batang seruran lutu empa basah,  
Semua merinsa, pengidup tebunsa ujan nerusan balat gayah.

Musin kemarau, panas ngerekai panjai, pan mai ✎,  
Utai tanam tasal, asil dikeluar enda chukup ke empa,  
Baja digeramika ngapa, nadai reti laban enda lela,  
Mensia balat rugi, penatai pemisi nurun, idup ✎,  
Abis bedaya, pikir nadai ngena, runding nadai temu tunga,  
Panjai penusah seagi-agi musin kemarau bedau ✎.

6. Tengkebang segenteran leka pelandai betemaka rampa menua ti likun. 🌸





## A. Peratika randau di baruh tu.

Bisi enda kita ngasaika hari diatu nyau majak angkat?

Bisi, Injat. Siang malam tak sama asai nya.


Sigi amat ku Megong, pengangat dunya nyau nyadi isu. Mensia ba dunya irau ati. Suba jarang pekara tu dikenang.

Nya mih Jawai, mensia majak enda siru sereta sayau, nebang kayu gadung peneka ati ke ngujungka dunya angkat-seangat.

Penanggul tu berat. Tuai-tuai menua ba dunya mesti ngembuan pemutus penemu ke segala sereta rentang dikena mutarka penanggul tu.

## AKTIVITI

Leka jaku tauka rambai jaku ke bechura biru dalam randau nya jaku adjektif. Kategorika jaku adjektif nya ngena kar di baruh.



## LATIH

1. Beri sinonim enggau antonim leka jaku adjektif di baruh tu ngena kar pikir titi. 🧠

Sinonim	Suba	Siru	Irau	Majak
	baka	baka	baka	
Tipak				
Antonim	Segala	Rentang	Siang	Angat
	baka	baka	baka	
Tipak				

2. Tembuka ayat di baruh tu ngena jaku adjektif ti engkeman. 🧠

- Pun kayu ba tebing nya mayuh laban ditabanka tanah tusur.
- Mensia mayuh enda pansut laban hari balat besebun.
- Lapis ozon majak ketegal penambah gas CFC ba kandang angin.
- Mensia ke nguan kandang menua ke landai deka napi risiko ampuh bah.
- Enti penanggul pengangat global tu diputarka iya deka meri empas negatif ngagai semua utai idup.

3. Gaga ayat ngena jaku adjektif di baruh tu: 🧠


jauh	jambat	ransing	angkun	gaga	rindu
------	--------	---------	--------	------	-------

**B. Peratika genteran teks di baruh tu.**

Dunya majak angat. Suba pengidup chelap lindap, berasai lantang tang diatu nyau betambah tusah. Menya pendiau enggau pengidup berasai nyamai tang jeman ke diatu suah agi ke napi pemedis. Ruang kandang angin penuh laban lunyu gas berachun. Balat kamah angin dunya diatu. Nadai chara, enda alah diseliah. Enggai enda nya mih disintak kena enseput. Munyi kampung diperimba, nyau bekeserum, bekesetak, bekeserak digasakka traktor lalu ditambahka sayat injin tinso. Nyau berenaing munyi utai. Dunya majak lasu nadai agi penyigat. Bau angi enggau bau rengut bungai kayu abis lengis. Alah laban bau asap minyak binjin ke pansut ari injin kerita enggau dikesuhka mesin industri petrokimia.

 **AKTIVITI**

1. Giga jaku adjektif asai ke bisi dikena dalam genteran teks di atas. Kategorika jaku nya ngena kar di baruh.



2. Gaga siti ayat ari tiap jaku adjektif ke udah dikategorika tadi.

 **LATIH**

Giga jaku adjektif asai ke bukai lalu bagi ngagai kategori iya.

# PENGUKUH

## SERIDI

Tembuka teks ngena jaku adjektif ti udah disediaka di baruh tu.

bepengerai

kamah

nyamai

pemeresi

panjai

menya

balat

pemanah

dedat







gadung





pengangat





jampat

mayuh-semayuh

lengkas

Ulah mensia ke enda betatika  kandang angin endang lama udah nyadi ari . Pengawa betunuka uras enggau kampung  dikereja. Pia mega industri ke ngena kereban api fosil ditumbuhka chara enda besekat. Kereban pengangkut ke ngena petrol nyau  nelusur jalai raya menua. Ulah ke enda angkunka  kualiti angin tu ngujungka penyampau gas karbon dioksida  dalam atmosfera.


Gas karbon dioksida ke enda alah diserap utai tumbuh  deka merabat kesuh  ari mua dunya. Pekara tu deka mai menua napi penanggul pengangat global. Pengangat global deka meri empas ngagai pengidup mensia. Musim panas deka nyadi  ari selama. Ais ba kutub dunya deka lela ke ngujungka genturung menua ke bepulau deka  napi penusah ampuh bah.

Berindik ari nya, atur enggau sempekat mesti digaga lalu dititihka. Semua mensia dalam dunya tu mesti bekun ba siti penemu iya nya nyekat pengawa enggau ulah ke ngeluarka gas ke  ngagai atmosfera. Pengawa tu enda ulih beanti-anti, patut dikereja  enti deka ngasaika idup ke  sereta  lama agi.




## PENGAYA

1. Ngena chara beraban, gaga poster tauka gambar bekait enggau isu pengangat global enggau rumah gadung. Pandangka asil pengawa kita ngena chara ke ulih narit ati pemacha ba siti sukut kelas kita.
2. Tembuka kar berurun-rurun pasal pun enggau empas pengangat global ngagai mensia di baruh tu.



3. Beserimbai enggau “Hari Rampa Menua” ke bisi diatur ba sekula, nuan diberi peluang ngenataika siti licha betopik “Ngurangka Empas Rumah Gadung”. Sediaka teks licha nuan belalauka ayat topik di baruh.





## Sayauka Rampa Menua



Menua Sarawak ngembuan kampung jerung ke agi tebal mungkur kandang menua kitai. Pia mega, iya nyadi aset ti chukup berega. Kelimpah ari nya, menua kitai mega ngembuan kandang tasik, sungai, ai wung, bukit, gua enggau mayuh agi landskap kandang menua ke chukup manah ditimpai. Rampa menua nyadi siti elemen pugu ke nyanding stabiliti ekosistem.

Nama empas negatif ke tau nyadi enti rampa menua enda diintu manah?

Nama pengeleboh menua ke bisi ngembuan rampa menua ti meruan dijaga manah?



Menua Sarawak ngembuan kandang tasik, bukit, gua enggau mayuh agi landskap kandang ke chukup manah ditimpai.





Gua Niah nyadi palan tebilang ditapatka temuai.



Spesis orang utan ti patut dijaga belama.



Bungai Rafflesia bungai ti pepadu besai ba dunia.



Burung Kenyalang ti nyadi lambang menua Sarawak.





## Aram Mending enggau Bejaku

Lemai hari Lima, raban Kelab Rampa Menua begempuru ba bilik aum ningaka jaku tangan ari Pengajar Linggir senentang program memarin ngagai Bukit Agun.

Pom pemendar apai indai ti udah disain tau sua ngagai pengajar Lee Choo. Pagila kitai deka begelumu ba sekula pukul 7:00 pagi. Kita mega anang enda sama nyaga pengelikon nitihka udah diterangka aku tadi. Peti ubat bisi udah disendiaka Pengajar Ravi.

Kita tau mai perengka dikena mandi enggau perengka dikena makai. Maya bejalai mesti ngena kasut laban pejalai kin umbas iya penyauh neresa kampung enggau sungai.

Sapa kita ke ka bebaika perengka tau madah ditu ngambika kitai ulih bebagi, ngambika enda mayuh ma siku-siku.



### Tibang Penemu

Kampung tuai tauka kampung gun: Alai kayu tumbuh bebesai, tetinggi tumbuh sengapa, kadang empai kala diperimba.





### AKTIVITI

1. Keluluka randau di atas.
2. Kala kita memarin ba palan memarin ti semak enggau kita? Cheritaka pengawa ke digaga maya kita memarin.
3. Betanya saut pasal chara nyaga pengelikin maya memarin. 🌸

### LATIH

1. Nyema nuan enggau raban Kelab Rampa Menua tu memarin ke Bukit Agun, liska perengka ke deka dibai nuan.
2. Terangka pengasai ati nuan lebuah memarin ba palan memarin. 🌸
3. Ari ti meda gambar, baka ni nuan nemu tempat nya kampung tuai tauka kampung gun? 🌸
4. Baka ni nuan ulih mantu nyaga kampung enggau rampa menua? 🌸



Bacha teks di baruh tu.

## Memarin ke Tuchung Bukit Agun

Auh kukuk manuk ari rumah panjai sida Jingan nyau nadai didinga agi. Tengelam laban munyi burung ti richah. Bala jelu jangkit didinga inggar nyapa ari puchuk kayu. Sada ngingit, kemayang panas enggau pungan asal kampung ti bukai sama bela betimbal nitihka jaku bansa diri. Babas gadung ke tumbuh galak sereta ditambahka enggau penyelap angin ngeransingka pejalai kami. Pengajar Linggir meri tangkan jaku siru ngasuh bejimat lalu enda ngasuh nyual mata maya bejalai enggai ke teteterap tetingkap lalu teulihka pemedis.

Jingan laban ke sikar sereta **masai** ba menua nya, sempat limping ngambi sekeda buah kampung ti benung mansau. Iya nemu sekeda pangan iya enda kala ensepi buah kampung. Bisi mih ke berasai manis enggau masam. Keleju ke bejalai, sida pan datai ba pala kerangan ba Sungai Agun ke alai sida sebuat ngetu belelak sambil bayam rampa menua. Batu kerangan ngapar senebing-nebing sungai nya. Sekeda sida kisuk nangkap gambar ngena kamera ngambika bisi ke pengingat. Guchur ai ari wung muak ari ulu sida ke ngetu narit ati mayuh sida sebuat.

Sekeda sida sebuat ngambi peluang **empungas** mua sereta bebasu kaki jari. Ai iya berasai chelap nanchum. Nyadi sida ke enda tan ati meda penyiru enggau penyelap ai bisi lalu neguk ai nya dikena muai aus. Kilas sekeda ikan sungai baka enseluai, kerak periuk, entebalang enggau buing tampak dipeda. Nitihka timpai mata kasar, kandang menua nya endang agi lati. Batang kayu nyau bebesai, puchuk berupai tinggi, dan jurai sereta daun rinda **nyelebumbun**. Agi mayuh paku tubu. Agi meruan rutan danan. Babas tumbuh galak ti mandangka daun ke rimbun gadung.

Pengajar Linggir ke matak pejalai sekali agi nangkan enda ngasuh sida kelalu rindang bayam pemanah rampa menua laban tagat endur ti deka ditapat alai sida sebuat memarin agi jauh.

Sida nampung pejalai lalu belabuh nanjak Bukit Agun. Maya sida baru deka **nyanggih** bukit nya, dia sida meda Pengajar Linggir seduai Jingan ke matak jalai benung **bekenanas** deka ngelepaska siku anak empelanduk ke disintak panjuk.

Bala sida bukai lalu datai ngandak deka meda anak empelanduk. Anak empelanduk dilepas lalu kechit-kechit sereta tepawir mai jingka nabanka kaki pedis ti kena sintak amba.

Udah nya, sida lalu nampung baru pejalai sida ke nanjak bukit nya. Maya ke nanjak bukit sida ngasaika diri endang berasai **bengah** dirandang pengelelak enggau pengikak. Maya tengah hari nampun, raban Kelab Rampa Menua SMK Tinting Tebilang likun manggai di tatai Bukit Agun.


Udah sida kemas ngatur alai endur ngenduh, sida sebuat dulu matahka lengan. Kemas pengawa nya, sida lalu napatka guchur ai wung ti beringkat-ringkat nujuh nachak nitihka pengerenjan bukit nya. Pengajar Linggir dulu meri jaku lalau ngagai nemiak sebedau sida memarin ba ai wung nya. Sida sebuat rindu bebajau dia. Nyelam, nyemerai, enselur, beimbu-imbu enggau mayuh pemerindang ti bukai. Sida ngemuaska ati diri sambil ngambi gambar. Mayuh bansa gambar. Udah puas memarin, urung pukul 3:00 lemai sida lalu mulaika diri nurun ari Bukit Agun nelusur jalai sida ke mansang, mai pengerindu ati. Sida **gagit** deka bekunsi peneleba nya enggau bala pangan ke enda bepeluang memarin enggau sida.

## AKTIVITI


1. Kategorika utai idup ke bisi dipeda raban Kelab Rampa Menua dalam teks di atas ngena kar kayu.
2. Ba penemu nuan, giga ayat ari teks di atas nunjukka raban Kelab Rampa Menua angkun sereta sayauka jelu enggau rampa menua. 🍌
3. Ba penemu nuan, patut ke enda raban Kelab Rampa Menua ngelepaska empelanduk? 🍌
4. Terangka reti leka jaku ti bechelak biru nitihka guna dalam teks.

**LATIH**

1. Kelala bagi bansa jelu enggau utai tumbuh ti bisi dibantaika dalam teks. Pindahka penerang nuan ngena kar sukung.
2. Banding bida asai angin ba kampung enggau asai angin ba negeri. Bantaika asil banding nuan ngena kar gelembung gandin.



3. Nyema nuan siku ari raban Kelab Rampa Menua ti enggau memarin, baka ni nuan nyaga pemaik enggau pemeresi palan memarin nya?
4. Baka ni nuan ulih nemu raban Kelab Rampa Menua tu sayauka pemaik kampung?
5. Nama penyadi enti nyema kampung abis diperumpang? Bantaika saut nuan ngena kar runding.







Kelab Rampa Menua udah mujur ngatur aktiviti memarin ba Bukit Agun. Munah, sekretari kelab dipinta nyendiaka ripot pasal aktiviti memarin nya. Bacha ripot di baruh tu.

### Ripot Aktiviti Memarin ba Bukit Agun

Kelab Rampa Menua sekula SMK Tinting Tebilang udah ngatur aktiviti memarin ba Bukit Agun. Aktiviti tu disempulang tiga iku pengajar ti enggau 15 iku nemiak. Tuju aktiviti tu meri awak ngagai bala nemiak ngelala sekeda jelu, burung, bungai kayu sereta utai tumbuh ti bukai. Aktiviti tu mega diatur dikena bala nemiak ngisi maya lepa.

Sebedau bekejang, Pengajar Linggir meri jaku tangan ngelalau bejimat lalu nyaga pengelikin diri dalam kampung. Kami bekejang ari sekula pukul 7:30 pagi lalu datai di kaki Bukit Agun urung pukul 8:00 pagi. Ba sepemanjai jalai, kami meda sekeda jelu baka tupai, kera enggau burung nyau richah rari bekesebar meda bala kami. Kena pansa kami ke bejalai, kami meda mayuh bansa akar baka temedu, rutan, danan enggau semambu. Pengajar Linggir mega nerangka kami pasal bansa kayu kampung baka engkabang, pituh, tegelam enggau nyatu ke bisi dalam kampung.

Lebuh ngetu belelak ba kerangan sungai ai Agun, penyiru enggau penyelap ai sungai ngerinduka ati. Kami mega bisi makai buah kampung ke digumpul Jingan. Kami berumban neruska pejalai nuju palan memarin ba Bukit Agun. Mata panas nampun pala, kami pen datai ba palan memarin.

Aktiviti memarin tu balat nguji pengenani diri bejalai dalam kampung. Taja pia, kami mega gaga laban udah ngerikut sereta ngambar mayuh utai tumbuh enggau jelu ke bisi dipansa lebuh pulai mansang ngagai Bukit Agun. Besai pengarang kami Kelab Rampa Menua ulih ngatur aktiviti baka tu dudi hari ila ngagai palan ke bukai.

Disediaka ulih,

1 September 2017

*Munah Abi*

(MUNAH ANAK ABI)

Sekretari Kelab Rampa Menua,  
SMK Tinting Tebilang.




## AKTIVITI

1. Perati lalu kerandauka ripot nya tadi.
2. Liska buah kampung ti tau diempa ke ditemu nuan.
3. Pejuraika nama penyadi enti nyema orang ke dulu menyenda ninggalka waris kampung berega ngagai kitai rebak diatu. 🌸

## LATIH

1. Ngena kar gelembung, tuliska bansa kayu ke bisi disebut dalam ripot.



2. Baka ni nuan ngambi bagi ngetanka rampa menua ke dikembuan kitai? Bantaika asil kita ba mua kelas. 🌸
3. Kita bisi ngatur pengawa nanam bungai enggau meresi kandang sekula. Tuliska ripot nuan belalauka penerang di baruh tu. 🌸

- Ninga penerang ari pengajar
- Ngisi tanah dalam pasu
- Nanam anak bungai
- Ngerupan meresi kebun bungai



## Peratika leka sampi di baruh.

O ha! O ha! O ha!  
Kami tu mih ngangau, kami tu mih nesau,  
Kami tu mih burung ke nguan kebung  
langit ngelegua,  
Kami tu mih jelu jangkit ke bejelangkit di  
dan kayu nyala,  
**Kami tu mih jelu anak ke bekejengak  
atas tanah, nyabak seput tusah disintak,**  
tanah udah ditarak anak mensia.

Kami ngangauka anak mensia anak uda,  
Anak asi ke megai adat megai sempekat,  
Anak raja ke ngatur pechara dunya,  
Tuai-tuai bansa ngatur chara ngatur basa,  
Penyaga jelu siga nguan kampung jerung,  
Penyaga kayu berega ngetanka tanah  
kampung lulung,  
Minta dikemata minta diperunding,  
Ari digeruga ngeli besi udu kempang,  
Kami lesi nadai ganti ilang midang  
ngetanka bukit ambis pambur disungkur  
mata besi injin Jerman,  
Kasihka anak jelu ambis renchit diindik  
ditujah lipan.

Kami minta tanam minta sempiang,  
Minta diperanak ditelesak nadai betagang,  
**Minta dibungkur ngena tunggu  
nitihka takat adat undang-undang.**

Ngichaka daun kami bumbun  
ditinggang ujan labuh berembat.  
Ngichaka peturun jelu enda lesi  
enda betekadap,  
Ngichaka anak kami agi terebai  
di langit mingkai,  
Awakka enda ilang, enda midang,  
Ngichaka kami terebai ngelingi dunya,  
Ngichaka kami **nyumbuk baka tubu  
sulur rebung, baka paku  
betampung gelung.**  
Ngichaka urat kami begenggam rat  
megai tanah enda rarat,  
**Ngichaka pengeraja asal kampung  
lulung enda lus rarat penapat inat.**  
O ha! Oh ha! O haaaaaa!

Ditengkebang: Ana Rantai, 2016




## AKTIVITI

1. Kerandauka:
  - a. maya sampi suah disadaka
  - b. bansa leka sampi
2. Sadaka leka sampi nya tadi ngena intonasyen ti betul.
3. Ngena chara beraban kerandauka tuju sampi nya.
4. Terangka reti rambai jaku tauka ayat ti bechura biru.

## LATIH

Saut tanya di baruh tu bepelasarka leka main nya tadi.

1. Sapa ke ngangau dalam tibak leka sampi tu?
2. Sapa ke dikangau dalam leka sampi tu?
3. Nama sebana sida ke ngangau dalam sampi nya?
4. Enti sema nuan orang ti dikangauka dalam sampi nya, baka ni chara nuan mutarka penanggul sida ke ngangau nya? Bantaika saut nuan ngena kar runding. 🌸



5. Nama reti sempama sema banding baka tubu sulur rebung, baka paku betampung gelung? 🌸





## Jalai Jaku

Kira seminggu udah bekalih, raban Kelab Rampa Menua SMK Tinting Tebilang agi ngingatka pengawa sida memarin ngagai Bukit Agun lebu ti betemu maya baum.

- Munah: Uдах temu bup skrap bansa utai tumbuh enggau jelu ba Bukit Agun ke diasuh Pengajar Linggir?
- Menti: Engku udah temu, nyau ulih milih gambar ke dikena laban memamah magang gambar utai tumbuh ke diambil aku.
- Injat: Nyau empelah, aku agi asai tedingaka munyi jelu ba kampung ke nyau betimbal baka munyi suling. Baka tiun lagu ke balat ngerinduka ati. Enda pia asai kita wai?
- Megong: Amat ku nuan nya Injat. Aku tak asaika agi ka kin baru, ditu berasai angkat angin tang ba Bukit Agun nyamai amat ngasaika penyelap angin. Tak lantang sintak seput.
- Fui Lin: Aku agi ngenang bansa buah kampung ke ditemu kitai din. Nya mih keterubah aku nyepi asai sekeda ari buah kampung kelebih agi asai buah ridan ke masam.
- Jingan: Bisi maya aku enggau apai ke sungai Agun ila, ila aku mai ke nuan Fui Lin.
- Injat: Nyau ngenang anak empelanduk ke sintak panjuk, asai aku kada enda baru kena sintak, kasih tudah nyau kual-kual ka ngelepaska diri.
- Jingan: Nya mih Injat, aku nyau begedi asai tang nya ga endang siti ari chara kami serumah dia begigaka lauk. Sinu ga laban anak empelanduk nya agi mit, tang munyi ke dinga aku ari apai orang ngenan panjuk dia laban beripaka jelu bukai baka jani ke suah ditemu ngachau umai ke semak dia.







## AKTIVITI

1. Kelala jaku pengawa bepelasarka randau ti udah dibacha nuan.
2. Ngena chara beraban, pejuraika kebuah kitai mesti nyaga flora enggau fauna. Uдах nya, bantaika asil randau ba mua kelas. 🌸

## LATIH

1. Liska jaku pengawa berindik ba reti dalam kar sukung di baruh tu.

Jaku Pengawa

rawang	{	
aksyen	{	
pengasai	{	
mental	{	



### Tibang Penemu

Jaku pengawa rawang - Pengerak ati nengkebang, pemereti ati, pemintar runding, inspirasyen. 📎

2. Tulis dua iti ayat ari tiap-tiap chunto bepelasarka jaku pengawa berindik ba reti dalam kar sukung.



## SERIDI









1. Kelala lalu giga bansa jelu enggau utai tumbuh ke bisi ditemu sida raban Kelab Rampa Menua ba Bukit Agun.

E	M	P	E	L	A	N	D	U	K	Q	T
T	Y	U	H	B	N	G	F	D	R	D	E
B	R	E	T	K	C	V	V	B	N	Z	G
F	U	W	T	Y	E	G	H	J	Y	X	E
G	Y	R	W	E	R	R	K	L	A	C	L
H	Z	Z	U	A	A	U	A	G	T	V	A
T	D	F	G	N	D	F	G	B	U	B	M
Y	Q	A	Z	X	G	Z	X	N	C	N	V
N	A	N	A	D	Z	X	T	U	P	A	I
P	O	I	I	L	K	B	N	M	F	G	X
E	N	G	K	A	B	A	N	G	V	H	Y
Q	W	E	R	T	Y	U	I	O	P	L	Z

TUPAI	EMPELANDUK	DANAN	TEGELAM
BURUNG	KERA	ENKABANG	NYATU













2. Isi endur puang dalam lumpung karang ngena jaku pengawa ti engkeman.
  - a. Pengajar Linggir enggau Jingan dulu jalai ke bala sida raban Kelab Rampa Menua.
  - b. Bisi empat lima iku raban kera dipeda ngena randau kubal.
  - c. Sada ngingit, kemayang panas enggau pengan asal kampung bukai sama nitihka jaku diri.
  - d. Mata bala nemiak enselit selepak antara rintai pun kayu enggau serak daun babas engkining Jingan.
  - e. Bansa ikan tampak laban ai Sungai Agun berupai chiru.
  - f. Sida dibai pengajar Linggir ngetu ba kerangan Sungai Agun.
  - g. Bala raban Kelab Rampa Menua bela sama mandi sambil ba ai wung.

3. Kelala nama buah kampung dalam gambar tu.

4. Liska utai tumbuh ti bisi ditemu kita ba kandang sekula ngena kar di baruh.

Utai tumbuh di sekula

		
<hr/>	<hr/>	<hr/>
		
<hr/>	<hr/>	<hr/>
		
<hr/>	<hr/>	<hr/>
		
<hr/>	<hr/>	<hr/>



## PENGAYA

1. Tengkebang lima genteran dindang ti betemaka “Pemanah Rampa Menua”.

Chunto:  
Bukit Agun tinggi gegiau,  
Manah dipeda manding ditimpai,  
Ati ti rawan ulih bebalu sayau,  
Diperindang pemaik rampa menua kitai.

2. Gaga siti bup skrap pasal utai tumbuh ti bisi ba kandang sekula kita.

## Bup Skrap Sayauka Rampa Menua

Nama:

Pom:

Topik: Bansa Utai Tumbuh enggau Bansa Jelu ba Kandang Sekula



## Lumba enggau Main Disanding Sains enggau Teknologi



Sains enggau teknologi amat beguna dikena nyungkek pengawa lumba enggau main.





Bisi kita kala macha pasal sesebengkah lumba enggau main?

Kala kita enggau orang masuk pekit lumba enggau main?

Nemu kita pemansang lumba enggau main endang bisi kait enggau pemansang sains enggau teknologi?





## Aram Mending enggau Bejaku

Ujung minggu nyin tadi, Jawai enggau indai iya nurun ke pasar deka meli raket baru dikena Jawai enggau orang bemain badminton ba sekula. Datai ba siti kedai ti nyual perengka lumba enggau main dia seduai tama lalu beratika perengka lumba enggau main ti bisi dijual ba kedai nya. Meda ba kedai nya mayuh bansa raket badminton bisi dijual, dia indai Jawai lalu ngasuh iya milih raket.

Indai, ditu tua meli raket. Mayuh amat ditu.

Au mih indai. Sepiak tu memamah magang tang mar.

Au indai. Tu umbas mih. Iya ga lempung. Rega pan penumbas iya. Semina RM120.00 aja.

Pia mih indai. Ngichaka murah agi. Seringgit dua pan pama mih.

Tu dih. Terima kasih, indai.

Au mih endun. Tang perati manah-manah ke dulu au. Pilih iya ti engkeman ba nuan.

Pia, giga rega ti penumbas iya ga au.

Nya chukup mih endun. Lagi aku nguji nawar rega.

Nya mih. Bai kitu. Aku nawar lalu mayar ba tauke.

Sama-sama endun.





## AKTIVITI

1. Keluluka randau Jawai seduai indai iya.
2. Pejuraika senentang pekara ti patut dikira Jawai sebedau iya meli raket. 🌸
3. Tembuka kar runding di baruh tu ngena kereban ti patut dibeli Jawai dikena iya bemain badminton.



## LATIH

1. Kini penunga Jawai enggau indai iya ujung minggu nyin tadi?
2. Ba runding nuan, baka ni chara Jawai tau nyulut ba main badminton? 🌸
3. Kelimpah ari main badminton mayuh lumba enggau main bucai ti udah mansang. Giga gambar ti bekait enggau pemansang lumba enggau main bucai ngena kereban ICT. Uдах nya, bantaika asil ngena chara multimedia. 🌸





## Aram Macha

Sekula kita bisi ngangauka pengelicha ari Institut Sukan Negara meri licha pasal pemujur lumba enggau main.

Selamat pagi, meri tabi basa ngagai kepala pengajar, bala pengajar enggau raban nemiak ti bisi datai begempuru ditu.

Aku berasai gaga ati laban diberi peluang bekunsi penemu enggau bala kita senentang pemujur lumba enggau main.

Pemujur dalam lumba enggau main ukai semina bepanggai ba pengering tulang aja. Penemu ba sains enggau teknologi ulih mantu pelumba enggau pemain ngena pengering ti optimum ngambika mujur dalam lumba enggau main.

Bala nemiak semua, teknik belatih ngena chara saintifik enggau sistematik ulih mantu nyungkakka prestasi. Anda lumba enggau main ulih ngena konsep sains enggau teknologi mansik chara-chara ngemansangka lalu ngena asil nya ngambika mujur. Chunto iya teknologi komputer ulih dikena nentuka baka ni chara belanda ti betul.

Kelimpah ari nya, penemu biomekanik ti mansik sistem biologi, chara tubuh engkebut ngereja siti-siti aktiviti. Ari nya, iya ulih mantu pelumba enggau pemain bejalaika aktiviti enggau lebih efisyen lalu enda berasai pedis tubuh. Ari ti ngena prinsip-prinsip biomekanik nya, pelumba enggau pemain ulih nyaga pengerai tubuh ngambika **tegar** belumba enggau bemain.



Bala nemiak semua, baka nya mega pemanah perengka lumba enggau main ti moden ulih mantu nambahka penyulut. Nengah sains enggau teknologi mega perengka lumba enggau main ulih ditengkebang nitihka umur enggau penempa orang ti ngena iya. Teknologi komputer dikena ngasilka perengka lumba enggau main nitihka **ukum** fizik

enggau matematik. Nambahka nya, teknologi ICT, video, televisyen ulih dikena meratika teknik-teknik lumba ngambika ulih dipelajar.

Nengah chara makai pemakai ti betul mega ulih mantu nambahka prestasi pelumba enggau pemain. Prestasi fizikal bekait rapat enggau chara makai. Diet pemakai ti setimbang ulih ngasilka **pengering** lalu ngasuh lubah lelak. Sains pasal pemakai mayuh diguna dikena nentuka zat pemakai baka protein, karbohidrat enggau vitamin ngambika ulih meri asil ti optimum ngagai orang ti enggau bepekit.

Bala mayuh ti dipebasa, sains pasal chara berubat ulih mantu ngasilka pemutus ti manah dalam pekit lumba enggau main. Pemansang dalam **bidang** berubat mantu nentuka pemedis ti ditapi pelumba enggau pemain lebh mayu sida ti **bemain**. Ari nya pemedis nya tadi ulih diubah lalu ulih gerai enggau jampat.

Ke penudi, dikena aku ngujungka licha, aku meransang semua kita ti bisi masuk pekit lumba enggau main ulih ngemasangka prestasi diri empu. Enggau nya mega aku meri terima kasih ngagai semua ke udah ningnaka aku meri licha.





## AKTIVITI

1. Baca inggar teks di atas ngena intonasyen enggau ginchir sebut ti betul.
2. Kerandauka format licha ti udah dibacha nuan.
3. Betanya saut senentang isi licha.
4. Kerandauka leka jaku ke bechura biru ti mai dua iti reti.

## LATIH


1. Gaga dua iti ayat ngena setiap leka jaku di baruh ti nunjukka reti ti bebida.


a. ukum - 


b. ukum - 


a. pengering - 


b. pengering - 


a. bemain - 

b. bemain - 

a. bidang - 


b. bidang - 

a. tegar - 

b. tegar - 



2. Peratika piramid pemakai di baruh tu.



Lemak, minyak, gula  
enggau garam.

Makai mimit.

Ikan, manuk, dagin  
enggau kacang soya.

Makai penumbas iya.

Buah enggau sayur.

Makai mayuh.

Asi, mi, ruti, cereal  
enggau semua bansa ubi.

Makai mesti chukup.

- Pejuraika diet pemakai ti setimbang ti ulih ngasilka pengering. 🌸
  - Belalauka piramid pemakai di atas nama kebuah pemakai ke ba punjung nya mimit agi ari pemakai ke buhai. 🌸
- Nama lumba tauka main ti dikerinduka nuan? Padahka kebuah nuan rinduka lumba tauka main nya. 🌸
  - “Lumba enggau main ulih ngerapitka kaul”. Pejuraika rampa rambai jaku nya. 🌸



Peratika gambar lalu bacha teks di baruh tu.

## Main



Aktiviti bermain bol tau ngasuh tubuh kitai balat bepuluh. Peluh ti pansut ari tubuh lebuh maya kitai bermain bol nulung muai toksik. Ari nya ulih nulung ngurangka berat tubuh lalu ngasuh kitai bepengerai agi. Baka nya mega stamina tubuh deka betambah. Iya mega ulih meransang kitai nerenakka ulah bekerejasama lebuh ti bermain beraban.

## Pemanah



Aktiviti belanda ulih meransang penguat sistem kardiovaskular tubuh kitai. Semua fizikal kitai deka bekerejasama ngasilka pengelaju lebuh kitai belanda. Kaki deka nyingkang enggau jampat lalu ayun jari mega deka suah agi. Iya mega ulih nambahka hormon serotonin dalam untak. Tubuh kitai deka berasai regas lalu untak lanchar berunding.











Aktiviti ngena basikal patut selalu dikereja kitai. Maya kitai ngayuh basikal, tubuh kitai deka bepengerai agi. Kebuah pia laban kuar kaki kitai ke ngayuhka basikal nyungkak gumpal isi ba belakang. Ari nya tadi ulih nyeliahka kitai ari ti kena sakit belakang. Tubuh ti bepengerai tau nyungkakka gaya pengidup ti meruan.



Aktiviti nyemerai ulih meransang penguat gumpal isi lengan enggau berang. Maya ti nyemerai semua bagi tubuh deka engkebut magang. Ari nya tau ngasuh isi tubuh kitai tegap enggau kuat agi. Nyemerai mega ulih ngelatih tungkul atau kitai ngepam darah enggau manah sereta kuat agi. Tungkul atau ti kuat ulih ngepam oksigen mayuh agi ke dalam tubuh.

### **AKTIVITI**

1. Kerandauka isi ti bisi ditemu nuan ba teks senentang pemanah main ngagai pengerai tubuh kitai.
2. Gaga lis bansa lumba enggau main nitih endur ti betul.

Lumba	Main
Chunto: Lumba basikal	Chunto: Main bol
	
	
	
	

3. Kerandauka enggau lenak agi siti bansa lumba enggau main ti udah diliska nuan.

### **LATIH**

1. Nuan kala menang enggau orang bepekit main badminton? Tulis peneleba enggau asai ati nuan lebu enggau bepekit.
2. Kelimpah ari ti deka menang, nama tuju nuan masuk pekit lumba enggau main? 🌸



Peratika leka dindang di baruh tu enggau betul.



Taun tu aku masuk pom satu,  
Baka selama aku endang rindu,  
Masuk pekit lumba enggau main sekula,  
Tuju ati **meruan** baka selama.

Taja baru masuk pom satu,  
Aku sigi bagas belatih selalu,  
Deka enggau ngarika sekula,  
Ngambika bisi nama **tampak** rita.

Pengelelak alah laban pengerindu,  
Maya belatih enggai badu-badu,  
Tubuh chelum enda ngasuh leju,  
Panas **bisa** endang enda diteju.



Lebuh bepekit ati mesti lurus,  
Kitai tau bulih manah pemutus,  
Enti nyema kitai alah belumba,  
Anang kitai **nyima** enggau nyida.

Belatih bebendar agi taun baru ila,  
Anang ngarapka **pemujur** datai pia aja,  
Terima mih enggau ati tebuka,  
Baru kitai ulih menang belumba.

Ari nya titihka jaku tangkan aku,  
Ngambika kitai sama mansang maju,  
Enggaika ila ngujungka kitai **jera**,  
Enda ulih agi enggau belumba.

### AKTIVITI

1. Sadaka dindang di atas ngena patah nyawa ti betul.
2. Giga reti leka jaku di baruh tu:

meruan

tampak

bisa

pemujur

nyima

jera

3. Kerandauka tema enggau empas leka dindang nya tadi.

### LATIH

1. Rintaika penguntung enti kitai chakah dalam lumba enggau main. Bantaika asil dalam kar segala rata.
2. Ba penemu nuan, nama chara dikena kitai ngulihka pemujur dalam lumba enggau main. 🌸
3. Baka ni chara nuan merindang ati pangan nuan lebuh iya alah bepekit? 🌸



Bacha genteran teks di baruh tu.

## Formula 1

FORMULA 1 (F1) nya siti pekit lumba ngena kerita ti **udu** nyulut ba dunya kemaya hari tu. Lalu Malaysia mega temegah ati bisi ngembuan litar lumba kediri empu iya nya Litar Antarabansa Sepang. **Kekadang** tiket meda lumba nya abis dijual **sepengelengkas** seminggu aja. Pengerami Grand Prix F1 Petronas Malaysia 2013 **balat** diasaika lalu orang mayuh mega enggai tinggal meda pengerami lumba ari maya berengkah dataika tembu. Tang taja pia nemu kita sejarah F1, ari ni penatai leka jaku ‘formula’?

Leka jaku ‘formula’ ba F1 nya nerangka atur ti patut dititihka pelumba enggau kerita ti dikena sida maya belumba. F1 nya kerita siti penuduk ti digaga semina dikena belumba. **Dia** kerita nya enda ulih dikena ba atas jalai raya beshari-sehari. Iya mega mesti nitihka format ari segi kuasa, berat enggau saiz. Pelumba ke menang ditentuka bepelasarka sistem poin ti digumpul dalam tiap-tiap lumba sepemanjai taun (musin).

Idea ngaga lumba F1 berengkah **kenyau** ari dekad 1930-an. Maya nya, mayuh bansa lumba kerita diatur ba Europe **din**. Enda **lama** udah nya, iya diketuka laban Perang Dunya Kedua. Kena taun 1946, idea ngatur lumba nya dipansutka baru. Tang semina ba taun 1950 aja, pekit lumba F1 keterubah dipejalaika ba Silverstone, United Kingdom. Ba pekit lumba nya, Giuseppe Antonio ‘Nino’ Farina ari Itali ti ngena kerita Alfa Romeo 159 nyadi pemenang F1 dunya keterubah.

**Sepengudah** nya berengkah ari taun 1946 datai ke diatu, kitai meda mayuh macham ubah ti berupai ari segi litar, chara deriba, enggau tujuk kerita ti dikena belumba. Taja pia, utai ti agi meruan diatu iya nya pekit lumba kerita F1 semampai beprestij. Tiap kali lumba tu bisi diatur, beribu-ribu orang datai meda enggau bejuta-juta orang meda ari televisyen. Ari nya iya balat meri penguntung ngagai organisasyen ti ngatur pekit lumba F1 nya. Kepenudi iya lalu ulih nulung nyungkakka industri dagang temuai menua Malaysia, ti ngujungka dikelala semua menua luar.

(Dibali ari: *Deruman Litar F1: Raja Intan Dianna Raja Azaham*,  
[http://ww1.utusan.com.my/utusan/Rencana\\_Sukan / Diakses\\_kena\\_9\\_Januari\\_2016](http://ww1.utusan.com.my/utusan/Rencana_Sukan / Diakses_kena_9_Januari_2016))



## AKTIVITI

1. Kerandauka isi teks ti udah dibaca.
2. Pejuraika senentang lumba F1 ti diatur di menua kitai.
3. Peratika jaku penerang pengawa ti dichelak biru dalam teks.






### Tibang Penemu

Jaku penerang - Leka jaku ti nyeritaka jaku pengawa, jaku adjektif lalu iya mega tau nyadi jaku penerang.




## LATIH

1. Giga jaku penerang dikena ngisi pitak ti betul.



#### Penerang tempat enggau adap

1.  \_\_\_\_\_
2.  \_\_\_\_\_
3.  \_\_\_\_\_




#### Penerang maya

1.  \_\_\_\_\_
2.  \_\_\_\_\_
3.  \_\_\_\_\_

#### Penerang tuju tauka jangka ati

1.  \_\_\_\_\_
2.  \_\_\_\_\_
3.  \_\_\_\_\_

#### Penerang pekakas

1.  \_\_\_\_\_
2.  \_\_\_\_\_
3.  \_\_\_\_\_

2. Padahka nama tim kerita F1 ti bisi ditemu nuan.
3. Ba penemu nuan, nama kebuah lumba kerita F1 balat mansang kemaya hari tu.

# PENGUKUH

## SERIDI

Peratika poster di baruh tu lalu pindahka penerang ke dalam pitak ti disediaka nangkan nya.

### Kasut Joging



Rega: RM45.00

Endur meli: Kedai Lumba Riena

Diskaun: 15%

Guna: Manah dikena joving  
lemai hari.

### Kasut Badminton











Rega: RM75.00

Endur meli: Kedai Kasut Axell

Diskaun: 25%

Guna: Manah dikena bermain  
badminton.

	Kasut Joging	Kasut Badminton
Rega		
Endur Meli		
Diskaun		
Guna		

Bepelasarka penerang ba poster di atas, padahka bagi kasut ti dipilih nuan? Tuliska kebuah nuan milih kasut nya.



## PENGAYA

Sekula kita udah mujur ngatur pekit lumba olahraga. Belalauka gambar di baruh tu, tulis siti ripot senentang pemujur pekit nya.



Atur pengawa pekit lumba olahraga.

7:30 pagi

- pekit lumba olahraga berengkah/semua atlet besedia ba padang sekula
- 5000 meter
- 800 meter
- 100 meter
- 3000 meter
- 400 meter

12:30 tengah hari

- merarau

2:30 lemai

- 1500 meter
- 200 meter
- 4 x 100 meter
- 4 x 400 meter

5:00 lemai

- nyuaka perais ngagai semua atlet ti menang
- pengawa nutup pengerami lumba olahraga dipejadi Kepala Pengajar Ngelai






## Puncha Energi

Nemu nuan pemesai guna energi elektrik?  
Nama penyadi enti energi elektrik enda  
dibina enggau menyana?

Energi elektrik beguna dikena nyanding  
pengidup besehari-sehari. Taja pia energi  
elektrik tau ngasuh tusah tauka bebadi.  
Nama penusah ke bepun ari energi elektrik?  
Nama patut dikenatika dikena nyeliahka  
penusah tu nyadi?



Stesyen transformer enggau zon suis ngagihka arus elektrik  
ngagai premis, industri, genturung pendiau enggau ke bukai.

Kereban api fosil baka petroleum, gas asal enggau arang batu nya sekeda ari  
puncha energi ke enda ulih dipebaru. Stok kereban api tu nyau majak kusut. Bisi  
enda kita terundingka nama puncha energi alternatif dikena nukar kereban api tu?





Teknologi turbin ribut ke dikena ngasilka energi elektrik.



Pengawa ngelekatka panel solar dikena ngasilka energi elektrik majak ngerembai di serata dunya.



Di Malaysia tekat hidro nyadi puncha energi elektrik ke pepadu besai dikena nyanding pengawa besehari-sehari.



## Aram Mending enggau Bejaku

**Peratika randau di baruh tu.**

**Pengajar Linggir:** Sebedau tu kitai kala ngelansa pasal pucha energi elektrik ke bisi dikena di menua Sarawak. Aku minta nuan Jawai nyebut iya.

**Jawai:** Au, pengajar. Mensia mayuh di Sarawak tebal agi ngena energi elektrik ke diasilka ari tekat hidroelektrik lalu ditangkanka petroleum enggau arang batu.

**Pengajar Linggir:** Au, betul nya Jawai. Nyadi diatu aku mai kuing perati kita ngagai penerang ba LCD. Minta kita empat Injat, Megong, Jingan enggau Jawai beripih nyebut chara stesyen hidroelektrik ngasilka elektrik.

**Jawai:** Pusin turbin deka ngasingka generator ke ngujungka energi elektrik diasilka.

**Injat:** Ai ari tekat masuk nengah penama.


**Megong:** Ai niti arung tanah ke renjan.

**Jingan:** Ai ke deras niti arung deka neruju turbin lalu musinka iya.

**Pengajar Linggir:** Chukup manah penerang kita nya, nadai endur nyelepak. Nya mih gaya pucha elektrik ke dikena kitai. Tang ingat anang tak terunda-runda ga kitai lebuah ke ngena energi elektrik. Anang ngerua energi elektrik lalu kena maya ke patut aja. Pengawa mina energi elektrik ngena chara efisyen deka mai penguntung ngagai kitai.


### AKTIVITI

1. Keluluka randau di atas.
2. Kerandauka pekara dalam randau di atas.
3. Tembuka kar di baruh tu pasal proses ngeluarka energi elektrik ngena tekat hidroelektrik.



4. Pejuraika ni bagi struktur dalam stesyen tekat hidroelektrik ke ngeluarka energi elektrik? 🌸






 **LATIH**

1. Padahka dini tekat hidroelektrik di Sarawak?
2. Nama pengeleboh ke dikembuan menua Sarawak ke ngujungka iya ulih ngeluarka energi elektrik ngena tekat hidroelektrik? 🌸
3. Padahka penguntung menua kitai bisi tekat hidroelektrik. Kenataika ngena kar gelembung. 🌸
4. Ba penemu nuan, nama kebuah kitai patut ngelimat elektrik. 🌸



A. Bacha penerang pasal pemesai sungkak industri petroleum enggau gas asal di baruh tu.



## AKTIVITI

Kerandauka pemesai sungkak industri petroleum enggau gas asal ke menua kitai.

## LATIH

1. Industri petroleum meri peluang pengawa ke mayuh ngagai mensia mayuh. Pejuraika pekara tu. 🌸
2. Tembuka penerang dalam grafik di baruh tu.









Mengeri Besai Miri udah balat mansang berindik ari iya ke chukup produktif ngeluarka petroleum.

Industri petroleum udah ngemansangka Miri ari sukut:

Four empty, light-colored rectangular boxes with rounded corners, each containing a small pencil icon, intended for writing answers.

3. Tembuka entelian dindang ngena leka jaku ke engkeman. 🌸

Anak tupai bejlangkit lari,  
Anak kijang benung ,  
Simpan minyak ke penabat ,  
Bisi ditapat uchu enggau .

Apai Agau tesat dalam kerapa,  
Apai Anyau neresababas ,  
Nurun ke sekula bekunsi ,  
Awakka minyak enda .


## B. Baca teks di baruh tu.

### Guna Energi

Penyampau mensia ke nguan dunya majak nambah. Beduduk ari nya, peminta nguna energi mega majak bertambah. Penambah guna energi tu bepun ari pengerembai ekonomi enggau pemansang sesebengkah menua. Puncha energi majak kusut-sekusut lalu begunaka daya konservasyen ari semua penguna. Daya konservasyen nya nyengkaum chara nguna enggau mina puncha energi ngena chara efisien.

Kitai mesti nyeliahka diri ari pengawa ke ngerua energi. Siti agi chara konservasyen iya nya ngerembaika pengawa ngena puncha energi ke ulih dipebaru. Di Malaysia, energi solar enggau energi hidroelektrik ngembuan potensial ke besai enti dikerembaika.

Kos ngena energi dalam mayuh bengkah sektor majak niki, baka ke diayanka ba grafik di baruh tu. Nya kebuah kitai mesti sama-sama bekelimat ngena energi sambil enda ngeruga kualiti pengidup besehari-sehari.



*Grafik mandangka sekeda bidang ke begunaka energi.*

### AKTIVITI

1. Kerandauka pasal chara mina puncha energi.
2. Padahka chara mutarka penanggung enti puncha energi nyau suntuk.
3. Terangka dua daya konservasyen dikena mina energi.


### LATIH

Pejuraika dalam raban chara dikena kitai ngelimat energi di rumah. 🌸





Peratika kar di baruh tu.



## AKTIVITI

1. Kerandauka undan kar di atas.
2. Bepelasarka kar runding nya rintaika ngena ayat penuh chara ke ulih mantu kitai ngena energi ngena chara efisien.

## LATIH

Peratika gambar di baruh tu. Terangka chara ngelimat elektrik dalam pengidup besehari-sehari. 🌸






## Aram Nulis

Bacha teks di baruh tu.

Energi elektrik endang beguna ba pengidup kitai besehari-sehari. Taja pia, iya tau ngasuh bebadi enti enda dikena enggau betul.



Anang ngachukka tunjuk tauka utai ke enda patut ngagai punga kuasa.



Anang lebih sambung kereban elektrik tauka elektronik.



Anang ngentun kod plag enti deka enchabut iya ari punga kuasa. Elektrik ulih mindah ari kod ngagai jari.



Seliahka diri ari endur ke ngembuan kabel bevoltan tinggi.

## AKTIVITI

Pejurai lalu rintaika pekara ke tau ngasuh bebadi ketegal elektrik. 🌸

## LATIH

1. Peratika gambar di baruh tu.



- Nama penyalah ke dipandangka ba gambar nya?
- Nama penusah ke tau nyadi ari pengawa nya?

2. Isi endur puang di baruh ngena leka jaku ti udah disediakan.

miki

megai


nampung

bejalaika

ngembuan

basah

- Anang wayar ke putus tauka kereban bukai ke ulih bejalaika elektrik.
  - Anang megai kereban elektrik ngena jari .
  - Anang ngenemu kediri tauka ngubah struktur kereban elektrik.
  - Anang elektrik sepeneka ati enti nadai sanding ari orang ke nemu pasal elektrik.
  - Anang aktiviti ba endur ke lapang maya hari bekilat.
  - Kilat mega voltan ke besai lalu tau ngasuh bebadi enti mangka.
3. Tembuka kar berurun-rurun pun enggau empas penusah ketegal elektrik di baruh tu.



4. Sekula kita deka bejalaika kimpin pengelikin. Beserimbai enggau nya, sekula bisi ngatur pekit ngarang “Chara Nyeliahka Penusah Ketegal Elektrik”. Tuliska karang nuan nya.



## Bungai Jaku

Audio 12:



Beserimbai enggau Program Sekula Likun, SMK Tinting Tebilang bisi ngatur licha pasal atur ngena elektrik di sekula. Sebedau pengawa dipanjaika agi, Pengajar Linggir bisi begeliga ngagai bala nemiak ti bisi datai. Peratika geliga Pengajar Linggir di baruh tu.

Tabi basa ngagai temuai mayuh bebala,  
Ti udah terenah duduk besemuka,  
Nya alai kita ditu dipeda aku,  
Mayuh baka, mayuh gaya penempa pan bebagi dua,  
Penatai pan baka nya mega, endang ari pupu menua,  
Bisi nya datai ari ili nyerumba reni bungai pasang,  
Bisi nya datai ari ulu nurutka penyurut ai langkang.

Aku ke bediri tegi-tegi gaya ke luba-luba,  
Enda ulih enda laban udah dipaduka Tuan Pengetua,  
Aku deka ngelempaika jaku tangkan seleka dua,  
Pasal pengelikon sereta mina elektrik dalam sekula.

Enti lebuah kita neresia sekula jari anang gatal,  
Anang barang utai tunjuk barang utai achuk,  
Nangi tetechalka arus elektrik ke mansang nikal,  
Ngasuh tubuh kita begetar teberunsai lambar buk.

Enti kita meda tali begembar chura chelum,  
Anang kita ngansak ngandak mansang semak,  
Nya kabel bebuat kuasa besai nya endu enggau dom,  
Nangika kita kejar-kejar mata enda agi enchelak.

Pia mega enti kita bisi tepedaka kutak,  
Bechat burak lekat nyangking ba dinding semak jenila,  
Anang dijapai tauka dipegai kelebih agi dikebak,  
Enggai ke rusak, kitai tangkap karan ngasuh lenyau nyawa.

Bisi ga kita tetimpaika siti agi bilik dikelingi pagar raga,  
Nya endang enda tau dijenguk, enda ngira kita nya sapa,  
Undan karan dia chukup besai kabel besanggit mayuh baka,  
Alai nentuka selinting agih kuasa ngerekai kandang sekula.





Anang kita belebu aku ke bejaku nerangka gaya,  
Anang masuk pending kanan pansut pending kiba,  
Awakka pengelikon seruran diintu sereta dijaga,  
Kandang sekula tau lantang endur betarak dataika ila.

Ditengkebang: Frankie Uning, 2016

## AKTIVITI

1. Kerandauka jaku tangan ke bisi dalam geliga.
2. Sadaka leka geliga di atas ngena intonasyen ke engkeman.
3. Padahka sekeda kes penyalah ke bekait enggau elektrik ke seruran nyadi di sekula lalu pejuraika chara mentin pengawa nya.
4. Pejuraika pekara ke dikenataika ngena ayat ke bechura biru. 🌸

## LATIH

1. Nama tuju Pengajar Linggir begeliga?
2. Rintaika empat iti kereban ke bisi bekait enggau elektrik dalam geliga nya.
3. Rintaika enam iti jaku tangan ke bisi dikena dalam geliga nya.
4. Tembuka dua iti genteran geliga di baruh tu ngena leka jaku ke engkeman. 🌸

Enti lebu kitai di rumah kediri ✎,  
Anang kitai bepasangka kipas ngidupka suis peneka ati,  
Energi ke dikena ukai nya pechuma tang bebayar baka ke ✎,  
Pama endar enti sekeda duit nya disimpan ke penabat dudi hari.

Pia mega lebu bekenaka kereban elektrik genap hari,  
Anang kitai tak nitihka pengerindu nunda ✎,  
Tatak jam ni maya kitai patut beperindang masang CD,  
Awakka guna energi enda balat lebih ngujungka balat ✎.

5. Nuan udah bulih penerang pasal chara nguna kereban elektrik ti likun ari siku pangan nuan. Emel pengaga ati enggau jaku terima kasih nuan ngagai iya.





## Jalai Jaku

Bacha teks di baruh tu.

Beserimbai enggau pengerembai penemu sains enggau teknologi, energi solar udah belabuh dikena ngasilka energi elektrik taja pan bedau tentu dikerekaika. Ambika banding, panel solar ke ngundan beberapa iti sel solar dikena ba satelit dikena ngubah energi suria ngagai energi elektrik.

Panel solar tu bebida ari kereban pengangat solar. Kereban pengangat solar ke dilekatka ba perabung rumah selalu dikena ngangatka ai ke guna ba rumah. Kereban pengangat solar ngembuan gelung logam ke dichura chelum ngeledi ngambika lebih efisien nyerap pengangat ari mata panas dikena ngangatka ai.



*Panel solar ba perabung*



*Pengangat solar*

Siti pemanah energi solar iya nya enda ngamahka angin. Taja pia, pengawa ke ngena puncha energi tu bedau tentu ngerekai laban kos ke dikena nyikap enggau masang kereban pengangat solar enggau panel solar kelalu mar.

## AKTIVITI

Kerandauka nama pengelebih enggau pengurang ngena energi solar.

## LATIH

1. Giga jaku penyambung ke bisi dikena dalam teks nya.
2. Kelala bagi jaku penyambung tunggal enggau jaku penyambung berentayan ari jaku ke udah ditemu kita.
3. Gaga siti ayat ari tiap-tiap jaku penyambung ke udah ditemu kita dalam teks.



## Jalai Jaku

Bacha lalu giga jaku praklausa dalam ayat di baruh tu.

1. Nama bilik ke mayuh endar kabel bemacham chura nyin dih?
2. Kita anang sebarang utai tegu dalam bilik tu, tak peda aja. Arus elektrik memagang ditu.
3. Apu, balat endar ga gaya mensia ke bebadi laban tangkap elektrik tu! Nyau baka ke ditunu gamal kulit iya tu.
4. Sigi amat, elektrik tu endang chukup beguna dikena nyanding pengidup kitai besehari-sehari.
5. Nyadi tuju kitai ngatur program pengelikon di sekula ukai semina deka ngabiska taga pengawa, tang sigi endur nambahka penemu nemiak pasal nyaga pengelikon kelebihan agi bekait enggau elektrik.

## AKTIVITI

Tepu jaku praklausa nya dalam pitak di baruh tu.

Jaku Praklausa	Ayat
Jaku tekenyit	
Jaku tanya	
Jaku pun ayat	
Jaku perintah	
Jaku pengamat	

## LATIH

Gaga siti ayat kita empu ngena tiap-tiap iti jaku praklausa. 🌸

- |                  |                  |                  |
|------------------|------------------|------------------|
| a. Jaku tekenyit | b. Jaku tanya    | c. Jaku pun ayat |
| d. Jaku perintah | e. Jaku pengamat |                  |



5.2.19

# PENGUKUH

## SERIDI

1. Isi endur puang di baruh ngena jaku ke disendiaka di baruh tu.





ngelimat

bekelimat








komunikasyon

bumai betanam

suis

- Kitai patut  puncha asal menua dikena nyeliahka pengusut energi.
- Ulah ke  lebuah ngena energi ulih ngetanka puncha energi.
- Energi beguna dikena bejalaika aktiviti industri, pengangkut, pemansang enggau .
- Nutup  udah ke ngena mega ulih ngelimat guna energi.

2. Tanda (✓) ba aktiviti ke ulih ngelimat energi lalu (×) ba aktiviti ke ngerua energi.

- Masang lampu taja pan hari siang sereta terang. 
- Ngena beg guna baru endur nyimpan barang ke dibeli maya ngalu. 
- Barang guna baru surat kabar, butul kacha enggau keretas. 
- Ngena chapak polisterin maya bejamu makai. 
- Bekunsi kerita enggau pangan ti sama gawa. 
- Muka pintu peti ais lama-lama. 
- Nutup penjan enggau pintu lebuah masang airkon. 



## PENGAYA

Sechara beraban, giga penerang, grafik enggau gambar foto ari majalah, surat kabar, enggau internet pasal pengawa ngena energi solar. Tusun penerang kita ngena chara bup skrap.

## TISIH

Pitak di baruh nerangka puncha energi P, Q enggau R.

Puncha energi	Penerang
P	Energi ari petroleum enggau gas asal
Q	Energi ari mata panas
R	Energi ari hidroelektrik

- Nama puncha energi P, Q enggau R?
- Ni bagi puncha energi ke ulih dipebaru?
- Ni bagi puncha energi ke tau ngamahka angin?
- Gaga banding antara puncha energi P enggau puncha energi R ngena kar pikir gelembung gandin.



## UNIT 11

# Pintar Mina Belanja

Bisi mih duit ke pesindang aku belajar ila laban udah bisi akaun Skim Simpanan Pendidikan Nasional (SSPN). Uдах tu, bendar agi aku belajar nyambung pelajar ngagai tikas ke tinggi.




Nembiak kemaya hari tu seruran dilalau nabung duit lalu landik mina belanja. Ulah ti rindu nabung duit ari mit tau mai penguntung ngagai pengidup diri empu dudi hari ila.

Baka ni chara nembiak sekula ngatur belanja ti patut?

Nama penguntung muka akaun SSPN?

Nama penguntung ari kitai ti landik mina belanja?







## Aram Mending enggau Bejaku

Hari siti Jingan dibai apai iya muka akaun SSPN ba siti bank di pasar. Seduai berandau seraya ke nganti gintir.

Jingan: Apai, baka ni chara orang muka akaun SSPN kini?

Apai Jingan: Oh, baka tu iya Jang. Keterubah iya ngisi pom, udah nya sediaka dokumen ti diguna. Taja akaun tu enggi nuan, tang agi nyangking nama aku.

Jingan: Oh pia. Nama kebuah agi nyangking dih apai?

Apai Jingan: Sigi pia mih iya Jang, laban umur nuan bedau manggai 18 taun. Enggi aka nuan suba baka tu mih, semadi udah manggai umur 18 taun baru nukar ngagai nama iya. Ni kad pengelala nuan tadi Jang?

Jingan: Tu iya dih. Berapa penyampau ulih dikena muka akaun kini?

Apai Jingan: Enda kurang ari RM20.00. Nyadi enggi nuan lagi tak semua kukun duit ke disimpan ngelama tu kena tua muka akaun ke nuan.

Jingan: Terima kasih apai laban udah muka ke aku akaun SSPN tu. Bisi ga asil aku bekelimat belanja ngelama tu.

Apai Jingan: Au mih. Nya alai, nuan anang enda ransing belajar. Tu ke pesindang dikena nuan nampung pelajar sekula nuan ila.

Jingan: Au mih apai, munyi jaku sema mimit-mimit lama-lama nyadi bukit.

Apai Jingan: Nya mih jang, kami duai indai ngarapka nuan ulih nitihka singkang kaki aka nuan.

Jingan: Au apai, bisi mih tu ke penabat dudi hari ila.



1.8.4  
1.8.5  
1.8.6





## AKTIVITI


1. Keluluka randau nya tadi.
2. Padahka penguntung ngelimat belanja dalam kar di baruh tu.



3. Kerandauka pasal penguntung nyimpan duit ba akaun SSPN ngena kar segala rata.

## LATIH

1. Nama tuju muka akaun SSPN?
2. Baka ni nuan ulih nambahka duit ke udah disimpan?
3. Baka ni asai ati enti apai indai nuan nyimpan duit ke pesindang nuan belajar jemah ila?
4. Ngena peragam ati nuan, pejuraika chara Jingan bekelimat ngena belanja. 🌸





## Bacha surat di baruh tu.

Kyoto Universiti,  
Sakyo-ku, Kyoto,  
606-8501, Jepun.

22 September 2017.

Tabi Jingan,

Nama berita kita dia? Diatu aku benung kiruh, nuan ga nemu tu taun kepenudi aku nembuka pelajar ditu. Diatu nyau ujung musin ruruh, nya mih baru ka berengkah berasai chelap laban nyau ka datai musim chelap. Kemari apai bisi emel ngagai aku madahka udah muka akaun SSPN ke nuan. Gaga aku ninga apai nusi **juluk ati** nuan deka nyambung pelajar ke universiti ila. Enggi aku suba, maya umur nuan nya mih apai belabuh muka akaun SSPN.

Jang,

Lebuh deka nyambung sekula ngagai tikas ke tinggi, maya nya besai guna duit dalam akaun tu jang. Jingan, udah tu nuan anang enda **pintar mina belanja** ni bagi ke dikena enggau ke disimpan. Anang udu meli barang ke enda menuku baka maya nuan primari suba. Badu **amu mata**. Nambah ke nya Jingan, lebu meli barang anang nitihka **sepeneka ati**. Nuan mesti mandingka rega barang nya ba kedai ke bukai. Ni nemu bisi kedai nyual rega ke murah agi lalu enda tebasau duit nuan. Nadai salah **nyerepit duit** mimit-mimit, kenu ku orang tuai **mimit-mimit, lama-lama nyadi bukit**.

Kelimpah ari nya jang, nuan tau mai bekal ari rumah. Duit belanja tetiap hari nya ulih digalau dalam tabung. Rega barang diatu majak mar, pia mega aku ditu berasai tusah mimit laban rega duit enda tetap, nyau berasai **rapas penyuluk**. Kena nambahka sekulasip aku bisi kereja nyambil maya ujung minggu. Kasih ga aku ngenang apai enggau indai nyau **bekikis bulu betis, bebuai bulu gundai** nganjung aku sekula di menua Jipun tu. Nyau ngenang berita bukai, ujung bulan Disember tu aku bisi peremisi musin chelap. Aku deka pulai tang empai temu berapa haribulan laban agi manding rega tiket bilun. Enti udah bulih tiket ke mudah agi aku madah ke apai. Maya peremisi aku bisi ati deka bedaja kuih ba rumah panjai, pama mih nambahka belanja tua. Ila nuan nulung aku bedaja ba ruai. Naka tu dulu berita ari aku. Salam lenggau ke semua kitai sebilik.

Nya aja, terima kasih.

Ari aku,  
Lisa Inan

## AKTIVITI

1. Kerandauka perangai Lisa Inan bepelasarka surat ari iya.
2. Pejuraika reti mina belanja.
3. Sebutka tiga jaku tangkan Lisa Inan ke tau nyadika lalau. 🌸

## LATIH

1. Terangka reti rambai jaku di baruh tu:

a. juluk ati



b. pintar mina belanja



c. sepeneka ati



d. nyerepit duit



2. Terangka reti sempama di baruh tu:

mimit-mimit,  
lama-lama nyadi  
bukit

bekikis bulu  
betis, bebuai bulu  
gundai

amu mata

rapas penyuluk

3. Beri penemu nuan senentang ukur pemanah ari jaku lalau Lisa Inan. 🌸
4. Terangka nama kebuah mensia mayuh dilalau nyimpan duit dalam bank. 🌸



## Aram Nulis

### Bacha lalu peratika teks di baruh tu.

Rantai Anak Sedin siku deriba ba klinik semak rumah panjai. Sida sebilik idup jalan pemisi, berindik ari sida ke landik mina belanja dikena nambahka penatai pemisi.

Lebuh maya lepa, Rantai enggau bini iya ngereja pengawa bekebun. Seduai iya bisi nanam mayuh bengkah bansa sayur. Sekeda sayur ke bisi ditanam seduai melaki bini baka buah terung, kangkung enggau chabi. Seduai mega bisi ngebun getah enggau lada.

Kelimpah ari nya, bini iya mega suah bedajaka sayur ba pasar tamu. Semua sayur nya digumpul sehari sebedau dibai ke tamu. Nambahka nya mega, maya ujung minggu seduai melaki bini suah bedaja sayur ari rumah ke rumah ba genturung kandang pendiau sida.

Kelimpah ari nya, sida sebilik mega betupika manuk, serati, jani enggau ikan. Laluh diempa, jelu tupi nya dijual nambahka penatai pemisi. Laluh ke dipelanja, sekeda ari rega asil ari barang ti dijual endang disimpan.

Ketegal ke masin tulang ngereja mayuh kereja sangking, enggau pemereti mina belanja, sida Rantai sebilik lantang ngidupka diri. Sida nyau baka orang mayuh, bisi reta tengkira baka kerita, rumah lalu bisi duit saham enggau insurans.







Saham ASB  
RM50,000.00

Insurans Pelajar  
RM30,000.00

Insurans Perubat  
RM50,000.00

Insurans Nyawa  
RM100,000.00

## AKTIVITI

1. Kerandauka pengawa sangking ke dikena nambahka penatai pemisi.
2. Ngena chara beraban, beri penemu senentang chara nambahka penatai pemisi. 🌸
3. Pejuraika penguntung kitai ngaga kereja sangking lalu tuliska dalam kar gelembung. 🌸

## LATIH

1. Isi endur puang di baruh tu ngena leka jaku ti diberi.

✍️ apai Ana kiruh laban pengawa iya enggau pengawa kebun sereta betupi, iya enda kala lali ari tanggung pengawa meransang bala anak iya belajar. Ulah apai Ana mega sama ✍️ enggau apai nembiak bukai. Kelimpah ari nya mega iya ✍️ bini iya ✍️ nulung bala sida serumah enti bisi pengawa berat ✍️ besai.

baka  
tauka  
Taja pan  
enggau  
lempung tulang

2. Baka ni chara sida Rantai sebilik mina belanja ti ngujungka sida bulih pemisi baka ke dalam teks?
3. Ba penemu nuan, kelimpah ari kereja sangking ke udah dikena dalam teks, nama kereja sangking ke bukai ti ulih nambahka penatai pemisi? 🌸



## Dindang Bidik Benasit Kitai Lantang

Bebaju burung betangkung kejakuh,  
**Manding** dipeda manah dirara,  
Mimit diserepit mayuh ditaruh,  
Duit ringgit **pesaka** berega.

**Memarin** berami merindang semua,  
Bungah betundi bebala-bala,  
Pesan apai indai mesti didinga,  
Bekelimat duit anang **rua** belanja.

Besirat tekalung bebaju buri,  
Rawai **merundai** bebunga-bunga,  
**Angkun** belajar ngansingka diri,  
Ngangkatka nama menua enggau bansa.

Bukit Sibau endang **jelai rita**,  
Palan ditapat bejuta mensia,  
Ati enda rawan runding menyana,  
Bisi akaun SSPN ke **pesindang** sekula.



Sera enggau pengingin enda ulih kira,  
**Keresa** dunya ke pengias mata,  
 Anang alah bebeli rua belanja,  
 Ngelipakka **lapar pungkang** nuntung menua.

Pintar belajar mina belanja,  
**Terenak** ari biak nyentuk ke tuai,  
 Duit **betimbun** ati gaga,  
 Ke pengelantang rayat bansa kitai.












Ditengkebang: Ana Rantai, 2016

### AKTIVITI

1. Betanya saut senentang dindang.
2. Sadaka leka main dindang.
3. Kerandauka ukur pemanah jaku klasik enggau empas iya ti bisi dalam dindang. 🌸

### LATIH

1. Terangka reti leka jaku enggau rambai jaku ti dichura biru dalam dindang. Giga reti dalam diksiinari.

2. Gaga ayat ngena leka jaku tauka rambai jaku nya tadi.
3. Tengkebang dindang betemaka “Bekelimat ngena belanja”. 🌸



Bacha randau di baruh tu.



- Anyie: Apu, mayuh amat kuih dibeli nuan! Nyau udah abis kuih, nuan tak enda ngampitka kami nih.
- Nyohen: Nya mih, Anyie. Tadi asaika lapar endar perut tu dih.
- Jingan: Eh, nuan nya ukai semina sehari tu aja ke meli mayuh. Nuan endang ka rua-rua belama ngelama tu.
- Nyohen: Bah, baka ni enggau kuih tu dih? Seduai udah meli kuih tauka empai?
- Jingan: Aku ukai enda meli kuih, laban ke bisi mai bekal ari rumah tadi.
- Anyie: Aku empai meli kuih tadi dih. Kati enti nyema aku nunsung rega sekeda kuih enggi nuan nya? Ulih nuan magi dua iti nya ngagai aku?
- Nyohen: Au nih, manah agi baka nya. Sayau ga kuih tu enti enda abis diempa aku lagi.
- Jingan: Pia mih Nyohen, enda nuan teempaka kuih memayuh nya. Duit tunsung ari Anyie nya lagi simpan nuan. Uдах tu anang sepeneka ati nuan bebeli kuih, meli ke umbas diempa aja.



- Anyie: Amat pan jara, mesti bekelimat belanja wai. Nyah, tu iya Nyohen, aku nunsung ngagai nuan RM2.00.
- Nyohen: Bah, tu iya Anyie. Terima kasih laban seduai udah meri jaku lalau ngagai aku. Uдах tu aku ka nunda nuan Jingan mina belanja.
- Jingan: Au, sama-sama mih kitai bebai pangan diri bekelimat ngena duit. Pia mega makai anang amu mata. Bah, aram sama makai kitai.




### Tibang Penemu

Jaku Prafrasa - Leka jaku tugas ti dikena ngepunka rambai jaku.  
 Jaku Pascajaku - Leka jaku tugas ti dikena ngujungka rambai jaku.

### AKTIVITI

1. Perati lalu kerandauka jaku prafrasa enggau jaku pascajaku dalam randau nya.
2. Kelala bagi jaku prafrasa enggau jaku pascajaku dalam randau nya. Uдах nya, pindahka penerang ngagai kar di baruh tu.





1. Kelala bagi jaku prafrasa enggau jaku pascajaku ba ayat di baruh tu.

Ayat	
Bala nemiak udah diajar chara nyimpan duit kenyau ari mit.	
Anyie deka nunsung rega kuih ngagai Nyohen.	
Amat munyi ku jaku nuan nih.	
Nama agi utai dianti dih?	
Jingan suah mai bekal ari rumah.	
Nyohen meli empat iti bansa kuih ba kantin sekula.	
Kitai dilalau anang rua enggau belanja.	
Mimit da agi, tabung Jingan deka penuh laban duit.	

2. Gaga lima iti ayat ngena jaku prafrasa.







Jaku Prafrasa	Ayat
jaku bantu	
jaku penguat	
jaku sangkal	
jaku penempat	
jaku tesa	

3. Gaga lima iti ayat ngena jaku pascajaku.






Jaku Pascajaku	Ayat
Jaku Penekan	
da	
mih	
dih	
jara	
nih	

## SERIDI






1. Isi endur puang di baruh tu ngena jaku prafraza enggau jaku pascajaku ti betul.

- Orang ti bekelimat belanja  bulih penguntung dudi hari.
- Pegawai bank  narit ati orang besimpanka duit dalam bank sida.
- Aka Jingan ke belajar  Jipun endang ngembuan ulah ti chukup manah.
- Nyepi perut diri ke balat begeriuk ngujungka Nyohen  amu mata meda pemakai ke bisi di jual ba kantin sekula.
- Ketebal  bala nemiak diatu rua ngena belanja laban alah ari pengingin ati.
- Nemiak sekula  dilalau ngemai bekal ari rumah ngambika enda rua belanja.

2. Tuliska nama mata wang menua ke diliska ba baruh tu.

Filipina	
Vietnam	
Laos	
Singapore	
Kemboja	

3. Tuliska rega mata duit di baruh tu ngena leka jaku ti betul.

RM1,988.99	
RM12,768.50	
RM35,001.90	
RM101,889.00	
RM200,000.00	

## PENGAYA

1. Liska lima iti jaku prafrasa enggau lima iti jaku pascajaku ke bisi dalam tibak teks di baruh tu.

Maya pemisi sekula, Jingan enggau Lisa Inan endang suah bedaja kuih ba rumah panjai. Aka Jingan amat landik ngaga kuih laban kala kereja nyambil ba kedai kuih di Jipun. Nya kebuah, tetiap kali pulai ari menua Jipun, iya sigi ngaga kuih ti laku dijual. Kuih ke dijual seduai iya, udah disimpan dalam plastik, lima igi rega seringgit. Sida serumah sama rindu meli kuih gaga Lisa Inan. Pemeresi palan bedajaka kuih diintu seduai enggau manah mega. Mija endur ngidar kuih ke dijual udah ditambahka apai iya besai agi. Kadang-kadang indai mega bisi nulung seduai bedaja ba ruai nya. Seduai mega bisi runding nyual kuih ngagai rumah panjai ari ulu rumah sida. Taja pia, bisi ga maya kuih enda abis dijual tang tinggal semina mimit da agi.





2. Tukar ayat ti mandangka rega duit ngagai angka ti betul.

Seratus lima belas ringgit enam puluh sen.

RM     

Seribu tiga ratus empat puluh empat ringgit tujuh puluh sen.

RM     

Dua puluh lima ribu enam ratus tiga puluh ringgit.

RM     

Tujuh puluh ribu lima puluh ringgit.

RM     

Seratus dua puluh ribu enam ratus tiga puluh ringgit.

RM     

3. Maya hari pengaduan bisi nerima RM350.00 duit pemer, baka ni chara nuan ngatur duit nya. Terangka chara nuan mina belanja ngena kar gelembung.





# UNIT 12

## Penguna Pintar





Tiap bulan tentu kita sebilik bisi nurun ke pasar ngalu barang dapur enggau barang bukai ti dikena kita besehari-sehari. Lebu ti bepilihka barang ti deka dibeli, tentu kita bisi beratika gamal barang ti deka dibeli kita. Kebuah pia laban deka nentuka barang nya manah sereta bekualiti lalu senutuk enggau rega iya.




Nama patut digaga kitai sebedau nentuka barang ti deka dibeli?





## Aram Mending enggau Bejaku





Perati lalu kerandauka grafik di baruh tu.





## AKTIVITI

1. Kerandauka ngena chara beraban kebuah bebelanja nitihka chara dalam pitak.
2. Pejuraika chara ngena belanja lebeh kitai bebelika barang.

Chara bebelanja	Kebuah
a. Milih rega ti patut	
b. Ngaga lis barang	
c. Nentuka timpuh guna	
d. Meli barang ti tulin	

## LATIH

1. Nama penyadi enti nuan enda kur milih barang ti deka dibeli? 🍌
2. Ba penemu nuan, nama pekara ti patut dikenatika sebedau nuan bebelika barang? 🍌
3. Pejuraika reti rambai jaku di baruh tu. 🍌

Bekualiti enda semesti mar, mar enda semesti bekualiti.

4. Tusun ayat dibaruh tu nitihka riph pengawa ti betul dikena ngayanka orang ti pintar bebeli.

### Riph bebeli barang.





- a. Nentuka timpuh pemanah barang. \_\_\_\_\_
- b. Serenih kualiti isi barang. \_\_\_\_\_
- c. Meli barang ti engkeman nitihka guna. \_\_\_\_\_
- d. Pilih bansa barang. \_\_\_\_\_
- e. Bandingka rega barang. \_\_\_\_\_



Bacha ramban di baruh tu enggau lenak.

Bejimat ngena api, ai enggau pemakai.



Ai  kajang ku enda laie ,  
Ai  kajang ku enda laie ,  
Uji dinga kita semua indu enggau lelaki,  
Tu jaku **tangkan** patut dikenati,  
Pesan patut dikingat berari.

Anang enda **bejimat** maya ngena api,  
Iya amat berguna dikena semua,  
Dalam pengidup besehari-sehari,  
Kena manduk macham bansa pemakai,  
Meri penerang lebu petang malam hari.

Tang enti kitai kurang jaga,  
Iya tau nganguska dunya,  
**Reta tengkira** abis semua nadai penyadi,  
Nyawa tau **laya lela**, **lesi bebadi**,  
Pulai ke menua mandai mati.

Tu siti pesan ngagai bala menyadi,  
Kitai patut bejimat maya ngena ai,  
Awakka iya chukup diirup,  
Kena **bebela** enggau mandi,  
Laban iya dibeli,  
Awakka kitai enda rugi mayar tunai.

Tu siti da pesan aku wai,  
 Kitai patut bejimat enggau pemakai,  
 Anang buar, anang betedai,  
 Enti pemakai kitai meruan,  
 Ati lantang enda keberuran,  
 Enti lapar pungkang tentu tusah amai,  
 Perut lapar tulang asai deka parai.

Ditengkebang: Helen Manjan, 2016

 **AKTIVITI**

1. Kerandauka leka ramban ti udah disadaka tadi.
2. Sadaka leka ramban nya tadi.
3. Peratika ayat dalam ramban ti ngayanka enteli ti betimbal-timbal.

 **LATIH**

1. Terangka leka tauka rambai jaku di baruh tu:



2. Gaga ayat ari leka jaku tauka rambai jaku di atas. 🌸
3. Padahka nama kebuah kitai mesti bejimat ngena api, ai enggau pemakai? 🌸
4. Nama ukur pemanah ti bisi ditemu nuan dalam ramban nya tadi? 🌸



Peratika teks di baruh tu.

### Lalau Nyadi Penguna Pintar

Kemaya hari tu rega barang berupai niki. Kitai ti nyadi penguna patut pintar lebh ngena belanja ngambika belanja kitai ulih dikena enggau manah. Enti kitai enda ngena belanja enggau manah, dia kitai deka dituntung penanggul suntuk belanja. Mayuh chara kitai ulih nyadi penguna pintar.

Keterubah kitai mesti nyendiaka lis barang ti deka dibeli sebedau nurun meli barang ke pasar. Nya alai kitai mesti nitihka lis ti udah digaga lebh meli barang. Ngena lis nya mega kitai enda meli barang sepeneka ati. Ari nya tadi kitai ulih nyeliahka diri ari ke meli barang ti enda tentu diguna.

Kelimpah ari nya, kitai patut ngaga anggar penyampau duit ti deka dikena. Kitai enda patut mai duit ti kelalu mayuh. Kad kredit semina tau dikena ba maya ti patut aja. Mai duit ti enda kelalu mayuh lebh ti mindah ke pasar ulih nyeliahka kitai ari ti rua ngena belanja.

Lebh kitai bebelika barang, kitai patut ngaga banding rega sebedau meli barang nya. Kadang-kadang rega barang ba kedai enda sebaka, bisi nya mar lalu bisi nya murah. Taja pia kitai meratika mega kualiti barang ti deka dibeli. Anang semina meli barang ti nadai kualiti ketegal rega ti murah. Kitai mesti nemu manding ari segi rega ti murah tang mega ari segi kualiti.

Nyadi penguna pintar ulih nyeliahka kitai ari dipenyati orang ti bedagang. Kitai patut nemu semua hak penguna ti diberi ngagai semua penguna. Semua kitai patut nemu reti leka jaku penguna. Penguna nya mai reti orang ti ngena barang tauka servis enggau sumber semula jadi. Bisi lapan hak pengguna ti patut ditemu kitai:

1. **Hak bisi pekara pun penyanding pengidup** – Hak bulih pekara pun penyanding pengidup enggau servis ti chukup baka pemakai, gari, endur diau, pengerai, pelajar enggau pemeresi.

2. **Hak bisi pengelikon** – Hak dijamin nerima barang ti manah enggau nerima servis ti enda ngeruga pengelikon pengerai enggau pengidup penguna.



3. **Hak bulih informasyon** – Hak dijamin ari pemandang dagang tauka label ti ngasuh saru, enda lurus tauka nipu. Hak bulih fakta enggau informasyon ti betul ngambika ulih milih barang enggau betul.

4. **Hak milih kediri empu** – Hak milih barang enggau servis kediri empu enggau rega ti patut lalu bisi jamin kualiti ti manah.

5. **Hak nerima ganti rugi** – Hak ulih nerima ganti rugi enti nerima berita ti nipu, barang enda manah kualiti enggau servis ti enda menyana.

6. **Hak meri penemu** – Pengguna bisi hak meri penemu diri empu tauka ngena pengari ngambika buah runding sida didinga lalu diambi kira dalam ngaga atur perintah. Pengguna mega patut bisi hak mantaika sebana.

7. **Hak belajarka penemu pengguna** – Hak belajarka penemu enggau pengelandik dalam pekara pengguna ngambika ulih nyadi pengguna ti pintar.

8. **Hak diau ba rampa menua ti bepengerai** – Hak ulih diau enggau bekereja ba endur ti menyana, enda ngasuh bebadi lalu ulih idup gerai nyamai sereta likun.




## AKTIVITI


1. Kerendauka hak pengguna ti udah dibacha nuan.
2. Peratika ayat penerang dalam dalam teks nya tadi.
3. Pejuraika batang idea, jaku topik enggau ayat penerang ti ditemu nuan.

## LATIH

1. Gaga kar di baruh tu ti nunjukka lapan iti hak pengguna.



2. Nama kebuah kitai mesti mandingka rega barang sebedau meli iya?



3. Ba penemu nuan, baka ni chara ulih nyeliahka diri ari ditipu.
4. Nuan diasuh meri licha senentang topik Penguna Pintar lebuah maya ngintu Hari Penguna ba sekula kita. Tulis licha nuan nya belalauka penerang di baruh tu.

Pemuka jaku

Isi licha

- Penteba penguna pintar
  - a. Hak penguna
  - b. Ngulihka informasyon
  - c. Ngulihka jamin
- Kimpin ti diatur matih penguna pintar
  - a. Hari penguna
  - b. Kuiz penguna
- Nyadi penguna pintar nguntungka diri
  - a. Ngatur belanja
  - b. Jimat belanja

Penutup

- Anang rangka mata lebuah bebeli



Peratika pantun di baruh tu.

## Pantun Pengguna Pintar

Aih ...,  
Nurun ke pasar ngayuh basikal,  
Ngetu tisi jalai nyengkau bunga,  
Milih barang mesti ngena akal,  
Kitai bisi lapan hak pengguna.

Pedis kaki diketup embayar,  
Diubat ngena minyak batu,  
Penemu pengguna mesti dipelajar,  
Ari semua keresa ICT baru.

Aki Uban merau nurun nyala,  
Jala tekait ba rangkang empapa,  
Nerima hak pugu perengka guna,  
Mesti ditemu semua pengguna.

Manchit rumput ba kebun lada,  
Bekau rachun dituchi ngena sabun,  
Penemu nyadi pengguna amat berega,  
Mesti nemu hak nerima pengelikin.

Bujang Tindin dipuji orang sikar,  
Selalu enggau orang nurun berperang,  
Kitai mesti nyadi pengguna pintar,  
Ngambika enda ditipu orang dagang.



Nurun ke kebun bejalai kaki,  
Kebun tawas selalu dijaga,  
Pengawa selalu mai ai kediri,  
Nyimat belanja pengerai dijaga.

Masuk kedai deka meli baulu,  
Asai iya manis baka gula,  
Ngaga lis barang sebedau ngalu,  
Chara pintar kitai ngatur belanja.

Makai belauk manuk sekerat,  
Asi dikuah ngena sup kari,  
Kitai patut sama bejimat,  
Ngambi ulih nyekat inflasyen nyadi.

Bemain bol ba tengah padang,  
Bol disipak tepelanting kin kia,  
Beratika manah pemandang dagang,  
Enggaika ati tepawir asa.

Ditengkebang: Ricky Adon Chuat, 2016

## AKTIVITI

1. Sadaka entelian leka main di atas ngena intonasyen pantun ti betul.
2. Kelala jaku lalau ti bisi dalam pantun nya.
3. Kerandauka enggau lenak reti ayat ti ti bechura biru dalam pantun.
4. Nama kebuah semua pengguna diberi jaku lalau?

## LATIH

1. Rintaika jaku lalau ti bisi dalam pantun di atas.
2. Tuliska semua hak pengguna ti bisi dalam pantun ngena kar kayu.
3. Kelimpah ari ti dipadah dalam pantun, nama pemesai guna kitai nyadi pengguna pintar?
4. Ba penemu nuan, baka ni ulah bekelimat ulih mai penguntung ngagai kitai? 🌸



Bacha teks di baruh tu.

Menti enggau Munah benung berandau lebu ngetu merarau tengah hari maya ngintu Hari Pengguna sekula sida sehari nya. Seduai duduk dalam kelas sida sekumbang ti nganti program nya disambung baru ngalih hari nya. Menti madahka diri rindu bendar meda pekit kuiz ti udah diatur pagi nya tadi. Iya lalu nanya pengasai ati Munah senentang aktiviti ti udah diatur. Kenu ku Munah, iya berasai tekenyit meda pengelandik Jelian, Banta enggau Norlily nyaut semua tanya ti dalam pekit kuiz tadi.

Banta bisi madahka, tim sida bisi seminggu udah ngiga penerang pasal isu hak-hak pengguna ba librari sekula. Kelimpah ari nya, sida tiga mega bisi ngiga penerang ngagai librari luar. Nya alai, sida tiga baka ke nemu bendar pekara pasal topik ti ditanya dalam pekit kuiz nya tadi. Agi mega, sida tiga endang bisi masuk enggau Kelab Pengguna SMK Tinting Tebilang. Pia ku Menti nerang ngagai Munah.



Tang taja pia, Menti madahka diri baru nemu senentang lapan iti hak pengguna ti diterangka Mr. Andrew Anding, Chairman Gerempung Pengguna Sarawak lebu ti ngenataika licha tadi. Ngelama tu iya semina nemu pengguna nya bisi hak, tang enda nemu penyampau hak ti bisi disediaka perintah dikena nyaga pengelikon pengguna.

Munah madahka semua orang mesti berunding enggau manah lalu bejimat lebu ti deka bebelika barang ti diguna sida. Kebuah pia, enggaika orang ke nyadi pengguna nya mudah ditipu orang dagang. Sambil ti merening jam, Munah lalu madahka orang deka berengkah baru bejalaika aktiviti ba balai sekula sida.


## AKTIVITI

1. Pejuraika isi teks ti udah dibaca.
2. Peratika ayat mudah enggau ayat belapis ti bisi dalam teks.
3. Giga jaku penyambung ti bisi dikena dalam teks nya.







## LATIH

1. Gaga ayat nitihka kategori ti betul.












2. Gaga ayat ngena jaku penyambung nuan nya tadi.
3. Pejuraika pemanah nemiak masuk kelab penguna. 🌸
4. Ba penemu nuan, nama aktiviti ti manah dipejalaika Kelab Penguna ba sekula kita? 🌸







1. Gaga ayat mudah ti ngundan: subjek + pengawa.

2. Gaga ayat mudah ti ngundan: subjek + pengawa + objek.

3. Isi endur puang di baruh tu ngena leka jaku penyambung ti betul.

- Kitai mesti bekelimat  enda tau rua ngena belanja.
- Kitai bisi hak belajarka penemu  pengelandik dalam pekara penguna ngambika ulih nyadi penguna pintar.
- Lantan landik ngelimat belanja,  Nurin selalu rua enggau belanja.
- Indai Ana benung meli barang ba kedai  berandau ngena telefon.
- “Ni bagi ti patut dibeli aku, baju mirah  baju chelum tu?” ku Bakak nanya Ragai.
- Aku nurun ke pasar  terus ke makit sayur.

tauka

sereta

tang

sambil



lalu



enggau





## PENGAYA

Tembuka dinding di baruh tu ngena jaku nuan empu.

Chapuh begau sebarang maya,  
Nembiak  ngambi bunga,  
Kati nemu kita semua,  
Kitai bisi  hak pengguna.

Bejalai laju nurun ke pasar,  
Deka meli kopi  gula,  
Penemu pengguna mesti dipelajar,  
Giga mih ba  menua.

Nurun ke kedai meli ikan kekar,  
Dipanduk dua  kerat,  
Nyadi pengguna mesti pintar,  
Maya milih barang mesti .

Nurun ke sekula tiap hari,  
\_\_\_\_\_  
Ngaga lis sebedau meli,  
\_\_\_\_\_.

Kepai daun baka ke keran,  
\_\_\_\_\_  
Penemu pengguna mesti dikembuan,  
\_\_\_\_\_.



# Penyungkek Dagang Temuai







Dagang temuai nyadi  
siti industri ti udah  
mantu nyungkakka  
ekonomi menua.  
Mayuh atur pengawa  
udah, benung enggau  
deka dipejalaika  
agensi-agensi ti bekait  
enggau dagang temuai.

Nama faktor ti balat  
narit temuai datai  
ngagai menua kitai?



## Aram Mending enggau Bejaku

Nasir enggau apai iya disempulang aya Nasir ngulu pengerami Regata Sarawak ti diatur ba Emperan Kuching.



Nasir: Apu, amat mayuh orang datai ditu aya. Rami amat sehari tu nih. Kati pengerami tu diatur ninting taun?

Aya: Au, suah diatur kenyaau ari jeman Rajah Charles Brooke ari taun 1872 kelia, lalu diatu pengerami tu udah nyadi siti ari pengerami dikena nyungkak dagang temuai Sarawak. Kami selalu meda, sekumbang kami diau ba Kuching tu, laban ke tak semak kaki tangga.

Apai: Suah ga aku tu ke Kuching, tang enda kala bepeluang enggau meda pengerami regata tu.

Nasir: Baka ni lumba baka tu tau nyungkak dagang temuai ke menua sarawak dih aya?

Aya: Jang, pengerami tu siti ari produk dagang temuai ke besai. Peda nuan pemayuh mensia ke bisi datai, baikka ari menua kitai tauka ari menua bukai. Sida tu mai penguntung ekonomi ngagai menua Sarawak.

Apai: Amat mayuh endar ga bala temuai peda aku, nyau bejeluh. Jimat nuan Jang, anang ngelekaka diri ari kami duai aya nuan.

Nasir: Au, apai.



- Nasir: Baka ni penatai temuai tu ulih meri punguntung ke ekonomi kitai dih aya?
- Aya: Peda nuan bala temuai luar ke datai, sida sigi diau ba hotel lalu tu ulih nyadi peluang kereja ngagai nemiak kitai. Kelimpah ari nya, sida bebelika sekeda barang enggau bansa pemakai lalu tu ulih ngangkatka dagang rayat kitai. Tu ngelakuka agi barang ke dijual bala bansa kitai. Tambah mega sida tu mai punguntung ngagai dagang kereban pengangkut.
- Apai: Oh, pia iya. Patut mih perintah kitai bendar amat ngelakuka pengerami nih.
- Nasir: Aya, nama bansa perau enggau kategori lumba ke dipekutka lagi dih?
- Aya: Au, nyadi bansa perau lumba baka perau baluk, perau bidar, perau kenyalang enggau perau tambang. Nyadi kategori tu bisi terbuka ngagai orang indu enggau lelaki, opis-opis perintah, bisi ga kategori temuai luar lalu muak ke malam bisi ga perau berias.
- Apai: Oh pia, nama utai ke nyadi sepiak nyin dih? Tak betugung mensia tunga kin peda aku.
- Aya: Nya program sangking festival asil pengelandik jari, festival bansa pemakai enggau mandangka tanda asal bansa kitai. Lagi kitai sama ngelawa kin.
- Nasir: Amat rami Emperan Kuching sehari tu nih. Untung amat kami duai apai dibai nuan kitu aya. Aku arapka ba taun ti ka datai bisi aku peluang ngelawa pengerami tu ila.

## AKTIVITI

1. Keluluka randau di atas.
2. Kerandauka pasal Regata Sarawak.
3. Pejuraika tuju perintah ngatur program tu. 🌸

## LATIH

1. Betanya saut sentang pengerami Regata Sarawak.

Nama	Sapa	Kemaya	Dini
------	------	--------	------

2. Ba penemu nuan, nama kebuah pengerami Regata Sarawak diatur ba Mengeri Besai Kuching? Bantaika penemu nuan ngena kar segala rata. 🌸
3. Ngena chara beraban, pejuraika nama empas pengerami Regata Sarawak ba dagang temuai. Bantaika asil pejurai ngena kar gelembung. 🌸
4. Nama kebuah Raja Charles Brooke numbukka Regata Sarawak. 🌸



## Aram Macha

Brosur tu diambi Nasir ba mija penerang lebu ngulu program Regata Sarawak. Bacha brosur tu.



### Sejarah:

Nitihka rikod Sarawak Gazette, Regata Sarawak keterubah diatur ba taun 1872 ba Sungai Sarawak. Pengerami tu endang diatur ari jeman Brooke ukai semina ngayanka lumba ai tang nyadika penyerakup sereta bansa mandangka adat enggau daya pengidup rayat Sarawak. Diatu Regata Sarawak udah masuk kalender Tahun Melawat Malaysia.



### Tuju:

Regata Sarawak pengerami ti mujur nempa penyerakup enggau ngerapitka kaul pupu raban bansa. Regata Sarawak siti chara dikena matak temuai datai ke Sarawak lalu ngerembaika industri dagang temuai ngagai temuai ari serata dunia. Nyerumba pengerami tu, alai ngayanka asil pengelandik jari mayuh bengkah pupu bansa. Kelimpah ari nya, bisi mega bansa pemakai pupu bansa Malaysia dipandangka. Pia mega, Regata Sarawak mandangka tanda enggau main asal raban bansa.

Sekeda ari aktiviti ti diatur:

Perau Baluk 7 iku pengayuh, Perau Bidar 15 iku pengayuh champur antara indu enggau lelaki, Perau Bidar 20 iku pengayuh ari opis perintah, Perau Kenyalang 15 iku pengayuh temuai ari menua luar, Perau Kenyalang 20 iku pengayuh antarabansa (Tebuka).





Festival pemakai



Pemandang tanda bansa







Festival asil pengelandik jari

### AKTIVITI

1. Betanya saut senentang pekara dalam brosur dikena ngulihka penerang.
2. Bacha lalu giga tuju pengerami Regata Sarawak diatur.
3. Pejuraika penguntung ari program sangking pengerami Regata Sarawak. Bantaika penguntung ngena kar segala rata. 🌸

### LATIH

1. Nama asil pengelandik jari ke dijual maya pengerami tu?
2. Tembuka kar titi di baruh tu senentang pemakai nitihka raban bansa.

Bansa	Iban	Melayu	Melanau	Cina	Bidayuh
	baka	baka	baka	baka	
Pemakai	Pansuh				

3. Ba penemu nuan, nama kebuah pengerami regata diatur ba sekeda pelilih menua Sarawak? 🌸
4. Kelimpah ari pengerami regata, nama aktiviti bukai ti ulih narit temuai datai ke Sarawak? 🌸



### Pengerami Regata Sarawak

Pengerami Regata Sarawak sekali agi mujur diatur ba Emperan Kuching. Beribu-ribu iku mensia datai ngulu pengerami tu nyengkaum temuai ari menua bukai. Diatu pengerami tu endang udah dipasuk ngagai kalender dagang temuai lalu nyadika pematak temuai ti kedua besai ke menua Sarawak.

Pengerami regata taun tu dipejadi Kepala Menteri Sarawak. Lebu bejadika pengerami nya, dia Kepala Menteri madahka pengaga ati diri meda pemujur pengerami nya diatur lalu senipak enggau juluk dikena ngerembaika industri dagang temuai ngagai temuai ari serata dunya. Kepala Menteri mega madahka juluk ati deka ngangkatka Regata Sarawak nyadi pengerami renggat antarabansa.

Kepala Menteri ngelepaska bala pelumba ke berubah. Letup senapang besegum nandaka lumba kayuh belabuh. Bala pelumba ngayuhka perau penapat inat baka ke betumbak umpan. Gugu panjung mensia pan nyau betimbal-timbal meri peransang ngagai tim ke belumba. Ai nyau balat belenggang laban kechap kayuh sida ke bepekit. Bala komiti ti nyaga pengelikun enggau pengerai lumba meruan besedia napi sebarang penusah ti tau nyadi.



Mayuh kategori lumba perau diatur sepemanjai regata nya. Bala mensia mayuh bela gagit ati nganti pemutus dipadahka. Maya akim madahka pemutus pekit, dinga nyau begemung panjung tim ke bulih champion sambil sida mantaika sengayuh. Kepala Menteri nyuaka perais ngagai tim ti menang. Tim ke menang bulih perais siti tropi enggau mata duit.

Taja sida bukai enda menang tang sida iya sama-sama meradakka nyawa enggau bala mayuh tanda nyukung sida ke menang.



Maya Regata Sarawak, mayuh program sangking diatur sepemanjai pengerami tu. Dalam timpuh nya, Emperan Kuching endang semampai penuh dedat laban mensia ke bejeluh kin kitu.

Maya Regata Sarawak mayuh program sangking baka karnival asil pengelandik jari enggau karnival mandangka pemakai tradisional ari pupu raban bansa. Kelimpah ari nya, bisi diatur program mandangka tanda asal bansa serta mayuh program pemerindang ke bukai. Pengerami Regata Sarawak tu udah mujur mandangka pengeraja enggau pesaka menua lalu mujur matak sereta nyungkak temuai.



(Dibali ari: <http://www.theborneopost.com/2015/09/27/zahid-rasmi-regata-sarawak-festival-tebingan-kuching-2015/>)

## AKTIVITI

1. Kemetulka ayat di baruh tu.

- |    |   |
|----|---|
| a. | mensia maioh gagit ati nganti akim macha pemutus pekit                          |
| b. | nasir enggau apai iya gaga ati laban bepeluang ngelawa pengerami regata sarawak |
| c. | regata sarawak mujur nempa serakup enggau ngerapitka kaul pupu raban bansa      |

2. Kunsika peneleba nuan ngemataka pekit lumba enggau main antara sekula. 🌸
3. Ba runding nuan, nama kebuah pekit perau kayuh balat ngerinduka ati mensia mayuh. 🌸



1. Saut tanya di baruh tu.

- a. Nama pengerami ke bisi diatur ba Emperan Kuching?
- b. Nama bansa program sangking ke bisi diatur beserimbai enggau pengerami regata tu? Bantaika penerang program sangking ngena kar kayu.
- c. Kelimpah ari pengerami baka ke dalam teks, padahka pengerami ti diatur di Sarawak.
- d. Baka ni chara nentuka pengelikon masuk pekit tu?

2. Tusun leka jaku di baruh tu awakka nyadi ayat. Udah nya, tusun ayat nyadi siti genteran.

a.	di Sarawak	Regata Sarawak	Pengerami	siti ari	penyungkak	dagang temuai
b.	majak nambah	pengerami tu	temuai	ngulu	ke datai	ninting taun
c.	menua kitai	tambah mega	nyadi ke aset penarit		penatai temuai	
	rampa menua ti manah	menua kitai ngembuan	adat enggau main asal			
d.	selalu ditapatka temuai	patut manah	enggau		nya alai kitai	
	bala temuai	awakka	menua kitai			



Bacha tibak leka sampi di baruh tu.



O ha! O ha! O ha!

Nama utai ke semetak inggar bemunyi,  
munyi ke masak chagak bedil besi,

Didinga ari tisi langit nyang?

Nama utai ke **semetak inggar** didinga,

Munyi ke masak chagak bedil temaga,

Didinga ari Ai Rupa begelinggang?

Nama utai ke semetak inggar kekaung,

Munyi ke masak chagak bedil kelutung,

Didinga ari penigung **gigi gelumbang**?

Oh ... nadai ditanya,

Nya mih kangau,

Nya mih tesau, nya mih sada, nya mih sapa,

Semua rayat Malaysia, mayuh pupu raban bansa,

Melayu, China, Iban, India,

Kadazandusun, Kayan sereta semua bumiputera,

Enggau **ati ti baruh** selampur gaga,

Kami ngangau, kami nesau,

Semua mensia serata dunya,

Datai nemuai, datai betandai,

Datai ngabang, datai betandang ke Malaysia.

Ngambika kita meda sereta gaga,

Belematika pengeraja asal menua, budaya bansa rayat Malaysia,

Ulih bayam asil pengelandik jari dara,

Anyam, sulam, pua kumbu enggau leka marik pelaga,





Teperindang enggau main asal menua,  
 Ajat, tanda enggau sada leka main pupu bansa,  
 Kita mega deka teperindang, meda flora enggau fauna.  
 O ha! sampal datai mih kita temuai, ari semua pelusuk teluk dunya,  
 Kita ke ari Jipun datai sepemenuh bilun,  
 Kita ke ari Ai Rupa datai sepemenuh entuka,  
 Kita ke ari Brunei datai sepemenuh penyangkai,  
 Kita ke ari Korea datai sepemenuh kapal bahtera.  
 Ngambika penemuai kita semua, ukai semina nganjungka kami pengeraja,  
 Pia mega ngambika penemuai kita semua, nyadika leka buah kenang.  
 O ha!

Ditengkebang: Helen Manjan, 2016

### AKTIVITI

- Betanya saut pasal sampi:
  - bansa sampi
  - maya leka main sampi suah dibantaika
  - tuju sampi dalam pengidup bansa Iban
- Sadaka leka sampi nya tadi ngena patah nyawa ti betul.

### LATIH

- Terangka reti leka sampi di atas nitihka siti-siti entelian.
- Terangka reti rambai jaku ti bechura biru.

semetak inggar

gigi gelumbang

ati ti baruh

- Rintaika aset penarit temuai ke bisi dikenataika dalam leka sampi nya ngagai kar runding.
- Padahka tuju sampi dalam daya idup bansa Iban. 🌸





## Jalai Jaku

Nasir nyeritaka pengerami Regata Sarawak ngagai bala pangan iya.

- Nasir: Hari enam empai lama aku enggau apai dibai aya aku ngulu pengerami Regata Sarawak. Balat pengerami orang peda aku.
- Ah Seng: Pia, dini endur lumba nya diatur?
- Nasir: Ba Sungai Sarawak senentang Emperan Kuching.
- Jingan: Apu, rugi endar aku enda enggau nuan hari nya nih!
- Nasir: Rindu meda bala tim ke belumba ngayuh perau. Ai nyau begelenggang direnchah luan perau.
- Fui Lin: Au, amat ku nuan nya Nasir. Aku bisi mih meda maya nya. Aku berasai temegah meda tim sida ke indu bekayuh, nyu enchunung perau dikayuh sida empa pengelaju.
- Jingan: Enti enda salah ingat, ukai apai nuan ketua tim ke udah bulih gelar Raja Sungai taun nyin kemari Fui Lin? Enda pia.
- Fui Lin: Ya. Taun tu perau ke digaga apai aku nya bulih champion baru.
- Ah Seng: Apu, amat kuat tim apai nuan Fui Lin.
- Nasir: Nya mih, chukup rami orang, iya ga bala temuai luar naka pemayuh sama datai ngemataka pekit lumba perau kayuh.
- Ah Seng: Pia, nama agi pengerami ke bisi diatur maya nya Nasir?
- Nasir: Mayuh, bisi lumba kayuh, festival pemakai enggau asil pengelandik jari sereta tanda asal bansa kitai.
- Fui Lin: Endai, bisi ngelawa palan ke nyual asil pengelandik jari nuan, Nasir?
- Nasir: Bisi. Apai aku meli beg marik siti ke indai. Ketapu kulit kayu siti dibeli aku.
- Jingan: Eh, nyau ka ambis awak kitai ngetu, aram tama kelas. Pengajar Ravi udah tu. Lagi kitai nanya Pengajar Ravi, nyema ka masuk pekit lumba perau kayuh baka ni kitai ngirai pengeregas tubuh enggau baka ni latihan ke betul.
- Nasir: Au, manah amat nya. Aram mih.



 **AKTIVITI**

1. Kelala lalu rintaika ayat aktif enggau ayat pasif ti bisi dalam teks nya.  
Chunto ayat aktif: Apai Fui Lin ngayuhka perau.  
Chunto ayat pasif: Perau dikayuhka apai Fui Lin.
2. Kelala bagi ayat tanya enggau saut pandak ti bisi dalam teks nya.

 **LATIH**

1. Tukarka ayat aktif tu ngagai ayat pasif ti engkeman.

- a. Tim apai Fui Lin ngayuh perau ke bulih champion.
- b. Tim lumba Nanga Semunti ngasak amat ngayuhka perau.
- c. Jayap nyual asil pengelandik jari leka marik ke digaga iya ba karnival pengelandik jari.
- d. Ah Keat nyumai lauk ba karnival pemandang bansa pemakai.

2. Gaga ayat tanya belalauka saut di baruh tu.

Kami duai apai disempulang aya lebu ngulu pengerami Regata Sarawak.

Apai aku meli siti beg marik ke indai.

Au. Tim apai aku bulih champion pekit lumba perau kayuh.



# PENGUKUH

## SERIDI

1. Isi lapang ngena jaku ti diberi dikena nembuka ayat di baruh tu.

dipejadi

diseruri








ditebah

disuaka

dibeli

diberesi

dikerinduka

- Perais nya deka  Kepala Menteri ngagai tim ti champion.
- Pengerami nya  Kepala Menteri lalu disempulang bala pemesai nengeri.
- Perau kayuh ke pechah nya udah  sida enggau kayu ti baru.
- Beg marik ba palan pemandang asil pengelandik jari mayuh udah  bala temuai luar nyadika tanda pengingat.
- Munyi sape ke  Jeti chukup ngerinduka ati mensia mayuh ke ngelinggi panggau.
- Kandang Emperan Kuching meruan  ngambika manah dipeda.
- Tanda asal pupu bansa Sarawak balat  mensia mayuh kelebihan agi temuai ari luar.

2. Saut tanya di baruh tu.

a. Nama pengerami ke dilawa Nasir enggau apai iya?

d. Nama gelar ke diperebut ba pengerami Regata Sarawak tu?


b. Kemaya pengerami Regata Sarawak keterubah diatur di menua tu?

e. Ba penemu nuan, nama kebuah pengerami Regata Sarawak tu balat ngerinduka ati temuai ari luar menua Sarawak?


c. Sapa orang ke ngemunka pengerami Regata Sarawak?

## PENGAYA


1. Liska kategori pekit ke bisi diatur maya pengerami Regata Sarawak ngena kar di baruh tu.



2. Liska empat tuju pengerami Regata Sarawak.



3. Gaga ayat ngena rambai jaku di baruh tu.





4. Tusun lalu tulis ayat di baruh tu nyadi siti ayat ti betul.

a. tebalan ditapatka menua kitai tu ari menua tasik bala temuai

b. nambah-senambah penyampau temuai menua likun alai nemuai laban

c. mayuh raban bansa menua kitai diuan enggau pangan diri begulai sejalai

5. Tembuka leka sampi di baruh tu ngena leka jaku ke diberi dalam kutak.


O ha!

Nama dikangau, nama dipesau kita dih?

Tu mih tesau, tu mih sada, tu mih ,

Kami rayat menua ,

Laban randa kami bisi pengawa ,

Ngangauka semua temuai serata ,

Ngemata pemanah palan pemerindang dada,

Menua kami ke kaya adat budi ,

Ningaka tebah tabuh palu tawak gendang segala,

Mendingka tiun sape nyerumba ayun lundai ,

Niti umbak begelinggang benak ,

Ngelilaka tanda pupu bansa rayat ,

Bayam asil pengelandik jari leka ,

Mai ke kami pemansang, mai ke kami ,

Nyungkek ekonomi enda ngira di negeri tauka rumah panjai.

O ha!

Malaysia

dikereja

dunya

mangka

sapa

lengan dara

Sarawak

manik pelaga

pengeraja

basa



## Luar Jengkau Menua Serantau



Nama penguntung mayuh kaul enggau menua bukai?

Menua Malaysia sigi ditemu mayuh kaul enggau menua bukai. Ninting taun menua Malaysia bisi meri tulung sereta nyah menua ke bisi dituntung penusah.







Kepala semua menua ASEAN sama  
bisi datai ngulu aum besai nunjukka  
sempekat enggau pemereti ati kaul  
antara semua menua ASEAN.



Atlet menua Malaysia endang  
beberita selalu enggau masuk  
pekit lumba enggau main ba  
tikas antarabansa.



Pengawa gerempung MERCY  
ti nulung penusah ti nuntung  
rayat ba menua luar endang  
tampak beberita.



## Aram Mending enggau Bejaku

**Peratika randau di baruh tu.**

Pengajar Ravi ngenang berita senentang Lumba *South East Asia* (SEA) ke-28 ti diatur di menua Singapore ba taun 2015 suba ngagai sida Injat sekelas.

Pengajar Ravi: Kati nemu kita sekelas pemutus Lumba SEA ke-28 ti diatur suba?

Jawai: Enda, dini endur orang ngatur lumba nya suba dih pengajar?

Pengajar Ravi: Lumba nya suba diatur ba menua Singapore.

Jingan: Ooo pia, sapa ti menang dih pengajar?

Pengajar Ravi: Menua ti menang nya, kontijen Thailand bulih lumur satu. Kontijen Singapore empu bulih lumur dua. Lalu kontijen Vietnam bulih lumur tiga.

Fui Lin: Baka ni pemutus ulih menua kitai dih pengajar?

Pengajar Ravi: Menua kitai bulih lumur empat aja.

Menti: Berapa iti midul ulih sida pengajar?

Pengajar Ravi: Kontijen menua kitai bulih 62 iti midul emas, 58 iti midul pirak enggau 66 iti midul engkeraju.

Munah: Nama kebuah menua kitai enda bulih lumur satu nih?

Pengajar Ravi: Kebuah iya laban atlet ari menua bukai nyulut agi ari atlet menua kitai.

Munah: Ooo pia nih pengajar, terima kasih ke penerang nuan nya.

Pengajar Ravi: Sama-sama. Aram kitai berengkah belajar. Buka bup teks kita lambar 211.

Semua nemiak: Au, pengajar.



1.8.1  
1.8.2  
1.8.3






## AKTIVITI

1. Keluluka dialog ngena intonasyen ti engkeman.
2. Pejuraika isi topik randau ti udah dibacha nuan.
3. Kerandauka chara nanya ti bisi ditemu nuan dalam randau di sepiak.

## LATIH

1. Isi endur puang ba kar di baruh tu ngena jaku tanya ti bisi ditemu nuan.



2. Gaga ayat tanya belalauka jaku tanya ti udah dirintaika nuan.
3. Ba runding nuan, nama kebuah nemiak enda nemu sekeda pekara ke nyadi ba dunya tu, baka lumba enggau main? 🌸
4. Baka ni chara kitai ulih nemu berita ti nyadi ba menua kitai enggau ba menua luar enggau jampat? 🌸



Bacha teks di baruh tu.

### Medical Relief Society Malaysia (MERCY MALAYSIA)

Penusah ti balat nyadi nuntung mayuh menua ba dunya baka mimpi rawan. Tanah berenyang, tsunami, bah besai, volkano, kampung angus, kurang ai ti beresi, tanah runtuh enggau mayuh penusah ke bukai ti nyadi enda ngetu-ngetu ba sekeda menua. Ketegal semua tu, mayuh mensia tasah pengidup. Bisi ke sakit, lapar pungkang, nadai endur diau enggau lenyau reta tengkira. Semua sida ti ditinggang penusah tu balat ngarapka bantu enggau tulung ari orang bukai.

Dikena ngelempungka penusah ti nuntung sida tu, gerempung MERCY Malaysia bisi nyendiaka bantu enda ngira maya penusah nyadi. Ngagai jam ke diatu, mayuh menua udah bisi ditulung MERCY Malaysia, baka Kosovo, Acheh, Sri Lanka, Afghanistan, Bangladesh, Vietnam, Cambodia, Iraq, Turkey enggau Yemen. Presiden MERCY Malaysia, Tan Sri Dr. Jemilah Mahmood madahka, MERCY Malaysia nya siti gerempung ti ukai ngiga penguntung tang deka nulung ngubat orang ti bebadi maya ke ditinggang penusah.



Bantu ti selalu nyadika fokus MERCY Malaysia tu, iya nya sektor pengerai, pemeresi ai enggau ngurangka penusah bebadi. Raban orang ti gawa enda begaji ti enggau gerempung tu, iya nya sida ti datai ari mayuh macham profesyen baka lutur, indu misi, lutur pakar, pengajar, luyar, arkitek, pengelicha enggau injinir.



Pengelandik sida tu beguna amat lebu ti bejalaika misyen bantu MERCY Malaysia enggau lanchar. Semua raban orang ti gawa enda begaji enggau MERCY sigi enda ngarapka balas tauka gaji. Sida mega sanggup ngeluarka duit kediri empu ketegal ti deka nulung orang bukai ti ditinggang penusah.

MERCY Malaysia ditumbuhka ba taun 2001 lalu udah mujur nganjung bantu ngagai menua ti ditinggang penusah. MERCY Malaysia direjista di baruh Akta Gerempung, iya ngundan lebih ari 500 iku raban lalu disukung mayuh raban ti gawa enda begaji. Orang mayuh endang semampai diperansang masuk dalam gerempung tu ngambika mayuh agi tulung ulih diberi ngagai orang ti begunaka iya.



Dibali ari: <http://www.sinarharian.com.my/rencana/mercy-malaysia-bantu-mangsa-bencana-1.247854>



## AKTIVITI

1. Kerandauka misyen MERCY Malaysia ti nulung penusah ba menua bukai.
2. Ngena kereban ICT giga penerang bukai senentang gerempung MERCY Malaysia.

## LATIH

1. Liska misyen MERCY Malaysia ti ditemu nuan.
2. Nama sekeda penusah ti selalu nyadi ba dunya kemaya hari tu?
3. Ba penemu nuan, nama ukur pemanah ti bisi dalam teks tadi? 🌸
4. Enti nuan siku ari orang ti enggau gerempung MERCY Malaysia, padahka baka ni chara nuan ulih nulung orang ti bisi ditinggang penusah? 🌸



Bacha teks di baruh tu.

## Misyen UNIFIL – *United Nations*



PETALING JAYA – Soldadu Pengelikon Malaysia berengkah nganjung raban penyaga pengelikon ke baru ngagai Lubnan kena Hari Dua. Raban sida tu deka nyambung misyen *United Nations Interim Force in Lubnan* (UNIFIL).

Bisi 215 iku raban keterubah ari Batalion Malaysia 850-3 (MALBATT 850-3) ti betuaika Komander MALBATT 805-3 Kolonel Rizal Arif Tan Sri Ismail. Raban sida tu nganti raban MALBATT 850-2 ti udah mujur bejalaika pengawa nyaga pengelikon sepengelama setaun ba menua Lubnan.

Panglima Bantuan Udara, Lt. Jen. Datuk Sabri Adam madahka raban nya nyengkaum 48 iku pegawai enggau 167 iku raban pangkat ti bukai. Sida tu nganti raban ke dulu ari sida ti udah nembuka pengawa sepengelama 12 bulan berengkah ari 22 September 2014. Raban MALBATT 850-3 datai di Lubnan kira-kira pukul 5:00 lemai jam Lubnan kena 8 September 2015. Pia mega raban MALBATT 850-2 datai ba Kuala Lumpur pukul 4:00 lemai jam Malaysia ba hari ke sama.

Iya madahka nya beserimbai enggau pengawa ti bejadi ngelekatka beret *United Nations* ba baju, nyerahka menira Malaysia enggau ngemataka raban MALBATT 850-3 ke mupuk ngagai Lubnan ari Pengkalan Soldadu Langit Malaysia, di Subang. Ku iya mega raban baru nya dibagi ngagai empat iti raban ke mit agi, ti mupuk ke Lubnan kena 11, 15 enggau 18 September 2015.





Stevy Anak Along siku ari soldadu bansa Iban ti datai ari menua Sri Aman ke enggau raban MALBATT 850-2 ti bejalaika misyen nyaga pengelikon UNIFIL ba Lubnan.

MALBATT 850-3 diatur mangku pengawa nyaga pengelikon ba Sektor Barat UNIFIL (UNP2-1) iya nya KEM Ma'arakah. Sida tu bejalaika pengawa ari baruh Markas Sektor Barat UNIFIL. Perintah Malaysia udah ngemendarka raban soldadu Malaysia gawa enggau misyen UNIFIL berengkah ari taun 2007 suba. Raban soldadu Malaysia tu nulung raban soldadu ari menua bukai ti sama bejalaika tanggung pengawa nyaga pengelikon dalam *United Nations*. Sida tu neritka adat pengelikon ari baruh Resolusyen 1701 *United Nations*.

(Dibali ari: <http://www.mstar.com.my/berita/berita-semasa/2015/09/08/pasukan-pengaman-malbatt-ke-lubnan/>)



## AKTIVITI

1. Betanya saut senentang isi teks di atas.
2. Pejuraika misyen UNIFIL ti nyaga pengelikon di serata dunya. 🌸


## LATIH

1. Ngena chara beraban, giga misyen nyaga pengelikon ke bukai ti bisi dipejalaika raban soldadu pengelikon ari Malaysia.
2. Padahka ukur pemanah pengawa kitai ke selalu nulung orang ti ditinggang penusah. 🌸
3. Patutka enda menua Malaysia nganjung raban soldadu pengelikon gawa enggau UNIFIL? Nama kebuah? 🌸
4. Enti nuan dipilih gawa enggau misyen UNIFIL tu, baka ni asai ati nuan? 🌸



Bacha teks di baruh tu.

Penyampau Midul Lumba SEA ke-28



Lumba SEA ke-28 udah mujur diatur di Singapore ba taun 2015 suba. Pemutus ari pekit lumba nya, menua Thailand udah bulih lumur satu lalu teulihka 95 iti midul emas, 83 iti midul pirak enggau 69 iti midul engkeraju. Menua ti bulih lumur dua iya nya Singapore empu ti teulihka 84 midul emas, 73 iti midul pirak enggau 102 iti midul engkeraju. Menua ti bulih lumur tiga iya Vietnam. Sida teulihka 73 iti midul emas, 53 iti midul pirak enggau 60 iti midul engkeraju. Menua Malaysia semina bulih lumur empat. Sida semina teulihka 62 iti midul emas, 58 iti midul pirak enggau 66 iti midul engkeraju.

Penyampau menua ti ngambi bagi dalam pekit Lumba SEA nya bisi 11 iti. Semua menua ti dalam gerempung *Association of Southeast Asian* (ASEAN) bisi enggau magang lalu ditambah menua Timor Leste. Menua Timor Leste bedau masuk gerempung ASEAN.

Menua bukai ti bisi enggau masuk pekit Lumba SEA ke-28 iya nya Indonesia, Philippines, Myanmar, Cambodia, Laos enggau Brunei. Lumba SEA tu diatur niting dua taun sekali.

## AKTIVITI

1. Betanya saut senentang pemutus Lumba SEA ke-28 ba graf di sepiak.
2. Kira lalu seleti endur puang di baruh ngena saut ti betul.

Lumur	Menua	Emas	Pirak	Engkeraju	Penyampau
1	Thailand				
2	Singapore				
3	Vietnam				
4	Malaysia				
5	Indonesia	47	61		182
6	Philippines	29	36	66	
7	Myanmar	12		31	69
8	Cambodia		5	9	15
9	Laos		4	25	29
10	Brunei	0	1	6	
11	Timor Leste	0	1		2

## LATIH

1. Tusun baru ayat di baruh tu nyadi siti paragraf ti menyana sereta ngembuan tanda bacha ti betul.

menua ti berimbai enggau thailand iya nya menua myanmar bulih lumur tujuh

menua laos bulih lumur semilan lalu ditangkan menua brunei ke sepuluh

menua cambodia ti semina bulih 15 iti midul bulih lumur lapan

kepenudi iya menua timor leste bulih lumur sebelas

menua philippines bulih lumur enam

keterubah menua ti bulih lumur lima ba pekit lumba sea iya nya indonesia

2. Ba runding nuan, baka ni chara menua kitai ulih nyulut ngagai tikas ti pepadu tinggi ba lumba enggau main? 🌈



Bacha jaku tapis di baruh.

## Sada Anak Malaysia

Nya alai diatu jawang aku deka ngenang pemansang menua Malaysia,  
Dulu gumi aku nusi kitai kala udah nyadi palan lumba menua Asia Tenggara,  
Alai medung main ping pong, bepekit nyemerai, belanda 100 meter,  
Bebukut ngena *glove* getah pera, tumbuk ke deguk kena mua,  
Ke berebut nyadi juara, beberita nama chukup pegari.

Tak ukai semina naka nya aja,  
Agi ga gumi menua kitai kala udah dichiri,  
Nyadi raban PBB gerempung dunya,  
Mantaika runding maya miting mai penemu ke enda bechiping,  
Ngambi enda kena rinding jaku changka,  
Ngambika dunya sama pukul rata sama sebaka,  
Mensia idup menyana begigaka jereki.

Enti penyiru, menua kitai tu endang enda alah tiu jaku seleka,  
Mayuh bantu udah digaga din ditu dikena mantaika penyinu ngidupka nyawa,  
Tan Sri Dr. Jemilah Mahmood nya orang ke lansik nyemurik leka mata,  
Numbuhka MERCY dikena mantu mensia ke tasah chukup tusah abis kira,  
Pangka tsunami, biau balai, tanah tusur nyadi kualala,  
Nyelamatka mensia, ngidupka nyawa, bansa sama diseridi.



Agi ga gumat aku mai kita ngingatka pengawa soldadu MALBATT,  
 Nya alai lupu sida tu sida diasuh jaga menua,  
 Ke benung aru berujanka peluru leka senyata,  
 Menua Lubnan udah endur bekupan, kelimpah ari menua Somalia enggau Bosnia,  
 Laban ati orang tu berani mutus changka,  
 Mang ari kepayang rampang tuba,  
 Munuh ari ipuh ngerarahka nyumbuh jelu anya,  
 Nya kebuah lupu sida dipadu Raja Melayu,  
 Nyadi soldadu jaga pengelikon dunya,  
 Laban tinda teleba berambunka nyawa enda ngira jengkara laya rugi.

Ditengkebang: John Empenit, 2016



### Tibang Penemu








Jaku tapis - Jaku karung / jaku kelaung / jaku bebungai.

## AKTIVITI

1. Kerandauka batang pekara dalam jaku tapis tadi.
2. Sadaka jaku tapis ti udah dibacha nuan ngena ginchir sebut ti betul.
3. Kelala jaku klasik dalam teks di udah dibacha.

Jaku klasik

Chunto: deguk	 _____
 _____	 _____
 _____	 _____
.....	.....

## LATIH

1. Gaga ayat ngena jaku klasik nya tadi.
2. Padahka menua ke udah endur bala soldadu Malaysia gawa nyaga pengelikon.
3. Terangka reti tibak jaku tapis ti bechura biru.



Peratika teks di baruh tu.

## Gerempung ASEAN

Leka jaku ASEAN tu datai ari rambai jaku *Association of Southeast Asian Nations*. Gerempung tu udah ditumbuhka kena 8 Ogos 1967. Keterubah ditumbuhka, ASEAN semina nyengkaum lima iti menua aja, iya nya Malaysia, Indonesia, Philippines, Singapore enggau Thailand. Diatu, ASEAN nyengkaum 10 iti menua ti **bekelingi** sereta **berimbai**. Menua ti masuk dudi iya nya Brunei, Vietnam, Laos, Myanmar enggau Cambodia. Semua menua ASEAN bisi ngembuan lebih 500 juta iku mensia ti datai ari mayuh macham bansa, daya idup enggau pengarap. Pemesai rampa menua ASEAN kira lebih kurang 4.5 million kilometer besegi.



Idea asal numbuhka gerempung ASEAN dipansutka lebuh maya aum besai kepala menua Malaysia, Thailand, Indonesia, Philippines enggau Singapore di Bangkok ba taun 1967. Deklarasyen Bangkok lalu disain bala sida menteri luar ti ngarika kelima-lima menua nya tadi. Tuju menua Malaysia masuk dalam gerempung tu, iya nya deka ngutaska **penyerekan** penemu ba senentang politik enggau menua Philippines sereta menua Singapore. Nambahka nya mega, Malaysia bisi ati deka **bejantilka** kaul ti rapat agi enggau menua Indonesia ti betuaika Presiden Suharto maya nya.


Kelimpah ari ti udah dipadahka, siti agi tuju ASEAN ditumbuhka iya nya ngambika pemansang ekonomi, sosial enggau daya idup ulih dikerembaika jampat agi nengah kerejasama nya. Ari nya iya ulih nambahka pemanah pengelikon serantau ti bepanggai ba prinsip-prinsip ke dipegai gerempung *United Nations*. Ari gerempung nya mega, semua menua ulih **nerenakka** semangat kerejasama enggau nulung pangan diri dikena ngangkatka tikas bidang pelajar, profesional, teknikal enggau ngatur pengawa. Kerejasama bukai ke bisi iya nya baka ba bidang industri betanam betupi, ngemansangka pengawa dagang antara menua, ngangkatka tikas pemanah kereban pengangkut enggau komunikasyen sereta ngemansangka agi tikas pengidup mensia mayuh ti bisi diau nguan semua menua ti masuk dalam gerempung ASEAN.

## AKTIVITI

1. Kerandauka senentang gerempung ASEAN.
2. Peratika bidang kerejasama ti dipejalaika antara menua ASEAN.
3. Giga reti leka jaku ti bechura biru.

## LATIH


1. Liska bidang kerejasama antara menua ASEAN ti ditemu nuan. 🌸

2. Padahka ukur pemanah ti ditemu nuan dalam teks.
3. Ba penemu nuan, nama kebuah menua bukai enda enggau masuk gerempung ASEAN? 🌸

**SERIDI**

Tipak menua ASEAN di baruh tu enggau indu menua ti betul.




The image features the ASEAN logo in the center, which consists of a red circle containing ten yellow stripes that curve inward to form a stylized 'A' shape. Below the logo, the word 'asean' is written in blue lowercase letters. Surrounding the logo are 20 light blue rounded rectangular bubbles, each containing the name of a member country and its capital city. Two black lines with dots at the end point from the 'Malaysia' bubble on the left to the 'Kuala Lumpur' bubble on the right, indicating a connection between the country and its capital.

Country	Capital City
Malaysia	Kuala Lumpur
Laos	Vientiane
Brunei	Bandar Seri Begawan
Thailand	Bangkok
Indonesia	Jakarta
Philippines	Manila
Cambodia	Phnom Penh
Singapore	Singapore
Myanmar	Nay Pyi Taw
Vietnam	Hanoi



## PENGAYA

Tulis siti karang belalauka senentang pemanah kerejasama menua ASEAN belalauka kar gelembung di baruh tu.



## SEMPAMA

1	abis akal	Nadai chara agi ngereja tauka mutarka sesebengkah pekara
2	abis ati	Tekenyit tauka kesal laban nerima tauka tetemuka berita ke enda manah
3	abis tulang	Nadai pengering agi
4	agi bau lia	Agi mit
5	amu mata	Semua deka diempa magang tang enda ga alah abis
6	angkut semut	Mindahka utai ngena chara mimit-mimit ngambika enda alah tulang
7	asi udah nyadi bubur	Pekara ke udah nyadi enda ulih dipulaika baru
8	ati hari	Mensia ke enda tetap penemu
9	baka amau di puchuk tuga	Pendiau ke enda entap
10	baka batu tungku	Mensia ke nelap tauka mensia ke enda kala mindah ari menua diri
11	baka chabi padi	Saiz tubuh mit tang tan ngereja pengawa
12	baka ke betumbak umpan	Bekayuh ngena chara penapat inat
13	baka ketup lelabi mati	Enda ngelengkaka pengawa ngapa dataika tembu
14	baka tubu sulur rebung, baka paku betampung gelung	Seruran nampung pengawa orang ke dulu
15	baka ukui enggau mayau	Enda tau betemu tauka begulai enggau pangan diri, tak selalu belaya
16	bediri sama tinggi, duduk sama baruh	Tikas pendiau tauka pengidup sebaka enggau orang bukai senang
17	bekikis bulu betis, bebuai bulu gundai	Bebendar ngereja pengawa ngiga duit dikena ngulihka sesebengkah pekara
18	belah rutan	Seri tauka medu
19	bengkak jari	Penti ke bini ngandung
20	bentut tulang	Enggai ngereja pengawa
21	bepaut pending	Nunjukka gaya pemendar ngema utai
22	betubuh bisi	Ngandung
23	dilah enda betulang	Mansutka jaku sebarang
24	dulu ngetup garam	Dulu ada nya kebuah ngembuan peneleba ke mayuh agi
25	iya ga gemu, iya ga betelu	Udah ga bisi majak nambah ga pengaya
26	jaku ngelambung langit	Sumbung tauka deka endar bejaku besai
27	jera apai jera indai	Nesal lalu betetap enggai agi ngereja pengawa
28	lempung sama nanggung, berat sama ngangkat	Ngereja pengawa besaup baikka mudah tauka tusah
29	main ular	Ngakal tauka enda bebendar ngereja pengawa
30	matahka lengan	Makai
31	mimit-mimit, lama-lama nyadi bukit	Belabuh ari penyampau ke mimit ditaruh ngujungka nyadi mayuh
32	munyi burung ke makai buah kara	Siti situasyen ke inggar tauka munyi ke rami
33	nibarka jala enda betating	Bejaku enda berunding dulu
34	rapas penyuluk	Asi agi bisi tang lauk nadai agi tauka nadai agi belanja
35	sama penepan, sama menalan	Sama endur

## GLOSARI

aksyen	gaya kebut selangkuh tubuh lebu ngereja pengawa
angkun	runding enggau ulah ti sayau ke sesebengkah utai tauka pekara
antonim	jaku ti belaban reti
autumn	musin ruruh, laban maya tu semua kayu deka ngeruruhka daun
awas	tajam peda, seruran ngadang sereta bejaga ke sesebengkah pekara
baja kompos	baja asil ari proses benchit kereban organik
beban	pengawa ngaga lalu ngasilka kereban baka perau ari batang kayu
bechiping	ulah tauka pemutus penemu ke enda rentang ke sesebengkah pekara
bedaja	bejual barang
bedunjung	gaya tugung utai ke tinggi
beduruk	ngereja sesebengkah pengawa ngena chara bebalas
begelumu	pengawa mensia tauka jelu napatka siti kandang endur ngena chara beraban
bejantilka	pengawa nampung, ngelekat tauka nampikka sesebengkah utai tauka pekara ngambika nyadi siti tubuh tauka unit
bejlangkit	pengawa jelu tauka mensia ti jampat sereta pas endar niki
bejeluh	situasyen ti nunjukka pelayuh mensia tauka jelu ba sesebengkah endur
bekambuh	chakah ngaga sereta nempa besi nyadi kereban guna baka duku
bekebelik	panchar ti dipansutka ari raban objek baka bintang, lampu enggau kelita lalu tampak dipeda
bekenasan	bebendar ngereja sesebengkah pengawa ngambika teulihka asil ti dikedeka
bekesebar	gaya jelu tauka mensia ti lari sebarang tunga laban takut tauka tekenyit
bekuli	kereja tauka gawa
bekupan	pengawa sesebengkah organisasyen ti bepengkalan ba sesebengkah endur
belayan	gaya saiz tubuh
belinsur baik	gaya pengerai ti majak manah
bengah	nunjukka asai ti disepi laban ti kelalu lelak
berambunka nyawa	sanggup lenyau seput tauka mati lebu bejalaika pengawa
berenyang	siti fenomena tanah begelegar/begetar
beringku	gaya mai utai ti mayuh
berunggu	ngereja pengawa tauka pekara ti nyadi ngena chara nadai netu ari sehari ke sehari
besabut	siti tukuh kereban ti diasilka sechara tenchang ngambika iya mipis sereta nyamai dibintar
besegum	munyi letup meriam tauka bom
beserimbai	siti pekara sangking ti diatur sama maya enggau batang pekara tauka pengawa ke dipejadi
betarak	pengawa ngulihka penemu
bevoltan	ngembuan daya elektrik
bitumen	asil kepenudi ba proses napis petroleum ngena chara berenggat dikena melakin jalai raya
chakah	aktif ba sesebengkah tauka mayuh bagi pengawa
chelum ngeledi	chura chelum ke pemadu iya pekat
dedat	gaya sesebengkah kandang endur ti balat sekut
dichirika	diasuh enggau penuh pengarap mangku sesebengkah pengawa

dikukun	pengawa ti ngumpul sereta ngelumuka sesebengkah objek baka duit
diparit	kena bai ngereja sesebengkah ulah tauka pengawa
dipurihka	sesebengkah perangai, ulah tauka penau ke dikembuan sebaka enggau enggi apai tauka indai
direda	pengawa ngasuh objek ti besai tauka panjai baka batang enggau dan kayu nyadi mit tauka pandak
diruntu	ngereja pengawa jampat lalu tembu sekali
disempulang	mensia tauka sesebengkah objek tauka pekara ti bisi disereta mensia, objek tauka pekara bukai
disintal	sama enggau reti jaku ditanchang
ditatak	nyekat penyampau sesebengkah objek tauka pekara
ditenchang	pengawa malu sesebengkah objek ngambika mipis tauka redak
ditengkebang	ngasilka penemu, kereban tauka pekara ari penemu diri empu, ukai nunda tauka nyalin asil tauka penemu bukai
ditinung	pengawa merening sesebengkah pekara enggau nyinuk
efisyen	landik, pintar sereta chekap bejalaika pengawa
emotif	asai ati sekalika chukup gaga, chukup tusah, chukup ringat enggau chukup pedis
empalang	nikau objek ngena objek ti belampung tauka pandak
empelua	endur nyenguk tauka besurungka pemerri, tang saiz iya mit agi ari jenila tauka penjan lalu pia mega iya nadai penutup
engkayu	utai ke lauk
engkeraju	perais midul tauka terupi ti diberi ngagai pemenang lumur tiga
engkerebai	sebansa utai tumbuh dikena nyura ubung tenun
enseluang	sebansa ikan ai tabar
fenomena	pekara nyadi ke ulih diterangka ngena chara saintifik
festival	pengerami besai sesebengkah raban bansa tauka menua
fotosintesis	proses ke semina ulih dipejalaika utai tumbuh gadung dikena ngasilka glukosa enggau oksigen
gagit	asai ati ti kelalu gaga enggau ransing
generasyen	renggat dalam siti-siti turun
generator	mesin tauka injin dikena ngeluarka energi elektrik
gintir	idar maya ngereja sesebengkah pengawa tauka sesebengkah pekara nyadi
glukosa	gula ringkas ti bisi dalam jelu tauka utai tumbuh
gugu	panjung munyi penginggar panjung ti dipansutka penyampau mensia ke chukup mayuh ba sesebengkah endur
hidroelektrik	energi elektrik ke digenerat kuasa hidro
industri petrokimia	industri ti ngasilka kereban diguna dalam pengidup ari petroleum
inta	atur besedia dikena napi sesebengkah pekara ti mai penusah
jugau	ulah ti enda betatika peluang ke bisi ngujungka rugi tauka lenyau peluang ba sesebengkah peneka ti patut ulih dijapai
kanji	zat pemakai ti bechura burak mayuh diundan dalam beras, ubi enggau ti bukai
keberuran	mensia ti lama enda makai laban suntuk tauka tasah
kebo	angin tauka asap dikesuhka balat ari eksos enggau ti bukai
kelapis	jaku penganap tesa objek ti pipis tauka mipis baka papan enggau ke bukai



kirat	situasyen ti kritikal, balat, pedis sereta udu
kisuk	penuh meri perati ngagai sesebengkah pekara
korporat	pekara ti bekait enggau sesebengkah firma, serikat tauka organisasyen dagang
kubal	sebansa utai tumbuh
laboratori	endur bejalaika uji pansik pasal sesebengkah pekara kelebihan agi ba bidang sains
lenak	beratika sesebengkah pekara chukup silik
lepa	nadai pengawa dikereja
lunyu	gaya kereban tauka pekara baru asil rakup champur tauka gulai dua tauka lebih kereban bukai tauka pekara bukai
lus	nunjukka sesebengkah bansa tauka seraban utai idup ti nadai agi ba sesebengkah endur
manding	gamal tauka gaya ti chukup manah dipeda
merabat	pengawa ti nyekat pejalai tauka pemindah kereban baka gas
meranggang	penemu tauka kereban ke enda nyentuk betuntung, besatup, betegu tauka rapat
midar	buah ba tikas ke nyau deka mansau
mijar	panchar ke terang tauka tampak pegari ari sesebengkah objek
miki	ngaduka sesebengkah kereban tauka pekara ke bedau menyana
mina	pengawa ngatur, mutar lalu bejalaika sesebengkah pekara
motivasyen	pekara ke ulih narit ati enggau minda siku-siku mensia tauka sesebengkah organisasyen awakka nyadi peransang ngereja pengawa
nangika	pengasai ati ke irau, bebagi enggau takut ke sesesengkah pekara jai
nangkir	saiz tauka penyampau sesebengkah objek tauka pekara ke nambah
ngandak	mansang napat tauka nuju sesebengkah objek tauka pekara
ngayau	pengawa nyerang ti dipejalaika mensia kelialia
ngebuka diri	lari penapat inat laban tekenyit tauka takut
ngebur	pengawa nebuk objek ngena bur
ngelalau	meri jaku ajar tauka jaku tangkan ngambika enda ngereja ulah ti enda manah
ngema	mai sesebengkah objek ngena belakang
ngemalin	pengawa nguluka pejalai tauka penemuai ngagai sesebengkah endur
ngemeranka	lama udah ngereja sesebengkah pengawa
ngepam	ngisi angin ke dalam objek
ngerupan	Besaup ngereja pengawa bebala mayuh ke guna sama ba siti-siti komuniti tauka organisasyen
ngumbuk	mai nitih tauka ngereja sesebengkah pengawa sechara jaku tunduk
ngutaska	pengawa mansik puncha sibil penemu antara sesebengkah raban tauka menua lalu meri sadang penemu dikena mutarka pekara nya
nipang	nawar pemedis tauka pemisa asai
nuntung	pekara ti nyadi tauka datai tauka pejalai ti udah datai ba endur ti ditapatka
nyanda	pengawa minta utai orang bukai
nyangah	pengawa ti nyelenggika pala lebu nengah alai ke renjan
nyelebumbun	gaya kerekai daun kayu ti besai sereta lebat niti dan
nyeliahka	ngelarika diri ari sesebengkah pekara
nyeratan	pengawa ke nelusur kenang enggau pengingat ngagai pekara ti udah
nyerepit belanja	chara belanja ti bekelimat ngenyadika bisi ditaruh
nyulut	pengulih, pengelandik, pemandai, pemintar tauka peneleba lebih ari orang bukai

nyung	mai tauka madahka orang ti udah disemaya ngereja sesebengkah pengawa
nyungkak	Penyampau tauka asil ti udah nambah
pakar	mensia ti landik ba sesebengkah bidang penemu
panjuk	sesebengkah kereban ti ditan dikena nyintak jelu
penabat	kereban ti ditaruh dikena beridup lebu bisi dituntung penusah tauka ngatur pekara ke beguna dalam pengidup
penapat inat	chukup bebendar ngereja pengawa
pengelicha	gelar ngagai pengajar ba institusyen pelajar tinggi
penuh dedat	endur ke enda ulih dipasuk, diselit tauka diselepak agi
penyere kang	situasyen menua ke enda likun laban penyarut antara raban
perugan	Pengenap tesa utai tumbuh baka buluh enggau ti bukai
produktif	ulih ngeluarka asil ke mayuh
puku	duit tauka kereban bukai ti nyadika pun dikena bejalaika sesebengkah pengawa dagang
puncha	pun penatai sesebengkah objek tauka pekara
pungkang	nadai agi ngembuan, ngereja tauka nemu sesebengkah pekara
rampang	gamal sesebengkah leka tauka utai ti betukuh segala udah redak tauka pechah
rapa	gaya runding ti enda entap laban kelalu mayuh pekara datai ba runding
renggat	tusun penyadi pekara nitihka maya
rentang	gaya objek tauka pemutus penemu ti lurus sereta rata
rinda	pun kayu ke ngembuan dan ke mayuh pampang sereta jurai
ripih	tusun sesebengkah pekara tauka objek nitihka pemayuh, saiz enggau guna
salai	objek ti udah lama ditepuk ngena asap
selebutu	penerang ti bedau tentu temu pengamat
selepak	ba antara
seninjik	manah nasit
sebana	ngenataika asai ati ti pedis, tusah enggau sinu
sinonim	jaku ke sama reti
spring	musim bungai, laban maya tu semua utai tumbuh ti tau bebungai mansutka bungai
stok	kereban ti disimpan awakka seruran bisi dikena
summer	musim panas, maya tu menua deka nerima panchar mata panas nadai ngetu
tabin	enda gerai
taga jam	atur pengawa nitihka jam
tasah	bisi penusah laban pekara jai baka angus, ampuh bah tanah berenyang enggau ke bukai
tatai	endur ke rata ba sentang tuchung bukit
teberunsai	enda betusun agi
tema	pekara ti nyadi bepelasarka siti-siti cherita
temeran	tali ma ti digaga ari kulit tekalong ti udah dititi lalu diperangkai
terais	munyi panjung ke inggar sereta panjai
tusur	penyadi runtuh ba objek ke renjan baka tebiang, bukit, tugung pasir enggau ti bukai
uda	siti agi leka jaku ke sama reti enggau mensia
volkano	fenomena gunung meletup lalu ngeluaka lava
watak	individu ti bisi dalam sesebengkah cherita tauka novel
winter	musim chelap, laban maya tu menua deka beseleju ke ngasuh balat chelap

Dengan ini **SAYA BERJANJI** akan menjaga buku ini dengan baik dan bertanggungjawab atas kehilangannya serta mengembalikannya kepada pihak sekolah pada tarikh yang ditetapkan.

**Skim Pinjaman Buku Teks**

**Sekolah** \_\_\_\_\_

Tahun	Tingkatan	Nama Penerima	Tarikh Terima

Nombor Perolehan: \_\_\_\_\_

Tarikh Penerimaan: \_\_\_\_\_

**BUKU INI TIDAK BOLEH DIJUAL**